


# HIKAYAT SAIFUL MULUK I



irektorat  
dayaan

DEPARTEMEN PENDIDIKAN DAN KEBUDAYAAN

05

29

xJem

# HIKAYAT SAIFUL MULUK I

W 2242  
RAM  
h

Alih Aksara  
RAMLI HARUN

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1989

Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilindungi undang-undang

## PENGANTAR

Naskah hikayat ini merupakan salinan dari sebuah hikayat lama yang dikerjakan oleh Ishak Peutua Gam dalam tahun 1960. Hal ini diungkapkannya sendiri pada kesempatan bertemu dengan penyunting awal Juli 1985. Beberapa kata dan kalimat yang terdapat dalam naskah lama telah dirubahnya menuruti selera bahasanya sendiri namun tidak merubah isinya.

Naskah huruf Arab bahasa Aceh yang terdiri dari 400 halaman dan berukuran 21,5 cm X 16,5 cm itu, telah kami alihaksarkan ke dalam huruf Latin dengan ringkasan ceritanya dalam bahasa Indonesia.

Hikayat sebagai salah satu bentuk kesusastraan Aceh mempunyai kedudukan tersendiri dalam masyarakat setempat. Meneleiti dan mempelajarinya merupakan suatu usaha yang seharusnya mendapat perhatian dari semua pihak.

Mengadakan penelitian tentang hikayat Aceh berarti membuka salah satu jalan untuk mengetahui seluk beluk kebudayaan daerah ini.

Penyunting.

**RINGKASAN**  
**HIKAYAT SAIFUL MULUK**  
**Jilid I**

Di masa Nabi Sulaiman ada seorang raja yang adil bernama Asim bin Sifun. Raja yang masih menyembah berhala ini merintah empat buah negeri yaitu Mesir, Yaman, Bagdad dan Bani Ara. Ia dibantu oleh seorang menterinya yang sakti bernama Parek Budiman. Raja Sifun tidak mempunyai anak. Demikian pula menteri Budiman. Atas persetujuan raja, Menteri Budiman bersama ribuan rakyatnya pergi ke Baitul Mukaddis untuk bertemu dengan Nabi Sulaiman dan ingin memeluk agama Islam. Di sana mereka disambut oleh rakyat Nabi Sulaiman yang terdiri dari manusia dan hewan. Sesudah Menteri Budiman menyatakan maksud kedatangannya Nabi Sulaiman menyuruh mereka mengucapkan dua kalimah syahadah.

Ketika Menteri Budiman hendak pulang ke Mesir Nabi Sulaiman berpesan agar sesampai di Mesir ia mengajak rajanya pergi ke sebuah hutan. Disana mereka akan menemukan dua ekor ular. Mereka harus membunuh kedua ular itu. Dagingnya harus dimakan oleh isteri raja dan isterinya sendiri. Kemudian Nabi Sulaiman menyerahkan sebuah peti untuk diteruskan kepada Raja Mesir. Peti itu hanya boleh dibuka oleh putra raja yang akan lahir. Didalamnya sudah diisi dengan empat helai kain dan sebentuk cincin.

Tiada berapa lama kemudian Menteri Budiman dan rombongan tiba kembali di Mesir dan menyerahkan pemberian Nabi Sulaiman kepada raja. Raja dan semua rakyat Mesir memeluk agama Islam. Sesudah memakan daging ular isteri raja dan isteri menteri hamil dan tak lama kemudian melahirkan masing-masing seorang putra. Anak raja diberi nama Saiful Muluk dan anak men-

teri dinamakan Said Juhari. Dalam waktu yang bersamaan dua orang kadi raja juga masing-masing mendapat seorang putra dan diberi nama Kunan Syamsi dan Kunan Syahri. Keempat anak tersebut atas perintah raja harus tinggal di istana kerajaan. Ketika berumur empat tahun mereka diserahkan kepada seorang guru. Berbagai ilmu dapat dikuasai mereka dalam waktu empat tahun. Dalam usia dua belas tahun ke empat anak itu nampak mirip satu sama lain.

Tiada berapa lama kemudian Saiful Muluk diangkat menjadi raja menggantikan ayahnya. Pelantikan dilakukan di sebuah istana yang baru dibangun. Ketika itulah peti hadiah Nabi Sulaiman dibuka. Empat helai kain dibagi seorang sehelai di antara empat serangkai itu sedangkan cincin dipakai sendiri oleh Saiful Muluk. Keempat temannya diangkat sebagai menteri.

Pada suatu malam Saiful Muluk bermimpi didatangi seorang putri cantik. Nama putri dan negerinya tertulis pada kain Saiful Muluk. Sebuah lukisan putri juga terdapat dalam peti pakaian Saiful Muluk. Akibat mimpi itu tingkah lakunya berubah. Ia tidak keluar-keluar lagi dari istana. Said Juhari risau memikirkan mimpi tuannya. Demikian juga Kunan Syamsi dan Kunan Syahri. Nama putri itu Badi' Jamaloji yaitu putri Raja Muluk Cahya dan permaisuri Peurami Ratu yang memerintah negeri Idan Gamba. Dalam tulisan yang tercantum pada kain, putri tersebut meminta supaya Saiful Muluk sudi mengambilnya. Said yang membaca surat itu bertambah susah memikirkan dimana negeri putri tersebut berada.

Mendengar mimpi anaknya baginda Raja Sifun menawarkan beberapa orang putri lain yang lebih cantik. Tetapi Saiful Muluk tetap menghendaki putri impiannya. Tiada seorangpun yang mengetahui dimana letaknya negeri Idan Gamba itu. Ada yang mengatakan bahwa negeri tersebut berada di negeri Cina. Mendengar kabar itu Saiful Muluk berangkat ke negeri Cina dengan beberapa buah kapal dan ribuan prajurit. Said Juhari, Kunan Syamsi dan Kunan Syahri juga turut serta.

Empat bulan dalam pelayaran sampailah mereka di negeri Cina. Raja Cina bernama Hung Tiah mengatakan bahwa ia sendiri belum pernah mendengar nama Raja Muluk Cahya. Atas saran seorang juragan, Saiful Muluk pergi ke negeri Hindustan. Tetapi di tengah lautan iringan kapal Saiful Muluk dilanda badai. Semua kapal karam kecuali kapal yang ditumpangi Saiful Muluk. Bersama anak buahnya ia mendarat di sebuah pulau berhutan lebat. Ternyata pulau itu didiami oleh bangsa hantu jahat. Seorang pengikutnya menjadi korban. Demikian pula di pulau berikutnya. Seorang pahlawan bernama Sa'dan ditangkap hantu. Kemudian mereka mendarat lagi di sebuah pulau. Sedang mencari makanan sekawanan hantu datang dan Saiful Muluk ditangkap.

Tersebutlah sebuah kerajaan bernama Nurin Gunung yang diperintah oleh raja hantu bernama Uta'. Ia mempunyai seorang anak perempuan. Semua pengikut Saiful Muluk telah habis dimakan oleh raja hantu, kecuali Saiful Muluk bersama ketiga orang sahabatnya. Mereka dimasukkan ke dalam sebuah sangkar. Anak raja hantu yang berusia enam tahun dan belum pernah melihat manusia meminta kepada ayahnya supaya ia dapat memelihara keempat manusia itu. Dalam waktu yang tidak lama anak hantu sudah akrab dengan keempat manusia itu dan sering dilepas. Akhirnya anak raja hantu itu meminta supaya mereka mengawini-nya. Karena menolak mereka dikurung lagi. Ketika anak hantu itu sedang tidur nyenyak mereka keluar dari istana dan melarikan diri. Dengan sebuah rakit mereka menghayutkan diri ke laut tetapi seekor buaya menelan mereka namun Saiful Muluk terlempar di tepi pantai sedang ketiga temannya masih berada dalam perut buaya. Saiful Muluk akhirnya sampai di sebuah gunung. Ketika menuruni gunung itu kakinya cedera.

Tersebutlah sebuah kerajaan di sebuah gunung dengan rajanya bernama Indra Sakti. Rakyatnya terdiri dari segala macam hewan dan jin. Menteri-menterinya terdiri dari empat ekor beruang. Sedang berjalan-jalan keempat beruang itu melihat seorang manusia tergeletak di kaki bukit. Saiful Muluk dibawa menghadap raja. Ia menceritakan segala hal ihwalnya kepada Indra Sakti. Raja ini-

pun baru mendengar nama negeri yang dimimpikan Saiful Muluk.

Raja Indra Sakti menganggap Saiful Muluk sebagai anaknya sendiri dan berpesan bila ia meninggal Saiful Muluklah sebagai penggantinya. tetapi Saiful Muluk tidak lama berada di negeri itu. Ia pergi lagi menuruti mimpiannya. Indra Sakti menyerahkan sebentuk cincin sakti kepadanya dengan pesan bila memerlukan bantuannya ia segera datang.

Tersebut pula seorang raja bernama Tajul Muluk yang memerintah di negeri Hidustan. Ia mempunyai seorang putri bernama Khatun yang tinggal di sebuah istana dan dijaga oleh ratusan orang dibawah pimpinan seorang syahbandar. Pada suatu hari ketika sedang mandi Putri Khatun diculik oleh Jin Pari. Syahbandar dan sejumlah rakyat mencarinya sampai ke negeri Amariah yang diperintah oleh Raja Muluk Ali yaitu adik Raja Tajul Muluk. Karena usahanya sia-sia syahbandar tidak berani pulang lagi ke Hindustan. Ia bekerja di Amariah sebagai penjaga laut.

Putri Khatun dibawa ke sebuah hutan dan ditempatkan dalam sebuah istana yang dilengkapi dengan segala keperluan. Jin Pari sendiri selalu pergi bertapa. Dalam pengembaraannya Saiful Muluk akhirnya sampai di hutan tempat Jin Pari tinggal. Ia heran melihat sebuah istana yang sepi lalu memberanikan diri masuk ke dalamnya. Ia bertambah heran melihat seorang gadis sendirian dalam sebuah kamar. Gadis itu menjamunya dengan berbagai makanan. Kemudian ia memperkenalkan dirinya sebagai seorang putri bernama Khatun dari negeri Sirindet, Hindustan. Ketika mereka asyik berbicara Jin Pari pulang. Saiful Muluk menyembunyikan diri sehingga tidak terlihat oleh Jin itu. Sesudah Jin Pari itu pergi lagi, Saiful Muluk keluar dari persembunyiannya lalu menceritakan maksud pengembaraannya kepada Putri Khatun. Putri itu mengatakan bahwa gadis impian Saiful Muluk adalah gadis yang pernah dibawa oleh ibunya. Ibu Putri Khatun pernah dibawa oleh Ratu Jin bernama Peurami Ratu.

Saiful Muluk dan Khatun sedang berusaha untuk lari dari cengkeraman jin Pari yang nyawanya ditaruh pada seekor burung

nuri. Dengan mematahkan leher burung nuri itu maka matilah Jin Pari. Kedua anak raja itu segera meninggalkan tempat itu dan dengan menggunakan sebuah rakit mereka berlayar. Tiada berapa lama mereka sampai di negeri Amariah. Oleh syahbandar penjaga pantai Saiful Muluk dituduh membawa lari isteri orang. Putri Khatun diperiksa oleh syahbandar. Sesudah mendengar cerita Putri Khatun, syahbandar meminta maaf karena ia tidak mengenalnya lagi. Mereka sudah berpisah selama delapan tahun. Ia melaporkan kepada raja bahwa Putri Khatun telah datang bersama seorang pemuda. Alangkah senangnya Raja Muluk Ali menerima kedatangan kemenakannya itu. Dengan segera ia mengirim kabar kepada Raja Tajul Muluk.

Raja Tajul Muluk dan permaisurinya beserta rombongan berangkat ke Amariah menjemput putrinya. Suasana haru meliputi keluarga Tajul Muluk. Baginda juga menanyakan tentang Saiful Muluk. Sesudah mendengar keterangan anaknya baginda menyatakan keinginannya untuk mengambil Saiful Muluk sebagai menantu. Tak berapa lama kemudian Tajul Muluk dan rombongan pulang ke negerinya diantar oleh Raja Muluk Ali.

Adapun Said Juhari, Kunan Syamsi dan Kunan Syahri sesudah beberapa lama dalam perut buaya mereka dimuntahkan di tepi pantai. Mereka mencari Saiful Muluk. Di sebuah gunung mereka ditangkap Zanggi pemakan orang dan dimasukkan ke dalam sebuah gua. Disana mereka melihat banyak orang. Mereka adalah rakyat Saiful Muluk yang selamat dari karam dan sedang dipelihara sampai gemuk untuk dimakan. Sebelumnya mereka telah dibuat buta dengan cara diberi minum semacam air. Kepada ketiga anak muda yang baru ditangkap itupun disodorkan tiga cangkir minuman. Mereka berpura-pura minum dan berpura-pura buta. Ketika Zanggi sedang tidur nyenyak mereka mencolok matanya dengan besi panas sehingga mati. Semua rakyat Saiful Muluk keluar dari gua itu. Mereka diobati oleh Said hingga dapat melihat kembali.

Dengan sebuah kapal yang kebetulan liwat dekat pantai mereka berlayar lagi, tetapi di tengah laut kapal itu ditimpa badai

hingga karam. Semua penumpang tewas kecuali Said dan kedua orang temannya. Sampai di sebuah negeri penduduknya melihat ketiga anak mudaitu memiliki kain Nabi Sulaiman. Mereka hendak menjual kain-kain tersebut. Ketika Saiful Muluk melihat ada orang yang menjajakan kain Nabi Sulaiman ia langsung menawarnya. Ia tidak mengenal lagi ketiga orang temannya itu karena mereka sudah jauh berubah. Ia merasa curiga kepada ketiga anak muda itu karena seingatnya yang memiliki kain Nabi Sulaiman hanya ia sendiri dan tiga orang temannya. Ketiga anak muda itu dibawa ke istana dan diperiksa. Alangkah terharunya Saiful Muluk ketika mengetahui bahwa mereka adalah teman-temannya sendiri yang sudah lama berpisah. Saiful Muluk memperkenalkan mereka kepada baginda raja dengan menceritakan semua pengalaman mereka.

Raja Muluk Cahya memerintah empat buah kerajaan yaitu Bustarum, Bombay, Cahya dan Idan Gamba. Rakyatnya terdiri dari bangsa manusia dan jin. Permaisurinya bernama Perami Ratu. Muluk Cahya mempunyai seorang putri bernama Badi' Jamalul. Ia tinggal dalam sebuah istana pemberian ayahnya dan dijaga oleh sejumlah dayang-dayang. Ketika ia mengetahui bahwa Putri Khatun sudah diketemukan ia terbang ke tempat Putri Khatun bersama dayang-dayangnya. Putri Khatun menceritakan kejadian sejak ia diculik oleh Jin Pari dan disimpan selama enam tahun dalam sebuah istana sampai ia dibebaskan oleh seorang anak raja yang sedang mencari putri impiannya. Mendengar cerita itu, putri Badi' ingin mengetahui siapa gerangan anak raja itu. Putri Khatun mengatakan bahwa ia adalah Saiful Muluk anak raja Mesir. Mendengar itu Badi' marah karena ia tidak mau dipersunting oleh bangsa manusia.

Putri Khatun mengatur pertemuan Badi' dengan Saiful Muluk. Ia mengajak Putri Badi' berjalan-jalan di sebuah taman. Ketika Putri Padi' melihat Saiful Muluk yang sedang mandi di kolam ia terpesona dengan ketampanannya. Ia ingin tahu siapa anak muda yang tidak pernah dilihatnya itu. Putri Khatun mengatakan bah-

wa anak muda itu seorang manusia yang lebih tampan dari bangsa Jin. Ketika bertemu, keduanya tak sadarkan diri karena tidak dapat menahan rasa kagum. Setelah sadar Saiful Muluk menceritakan asal usulnya dan mimpiinya serta pengembaraannya selama sembilan tahun. Sesudah memadu janji seia sekata mereka pulang ke istana. Malam hari mereka mengikat janji lagi seraya Putri Badi' minta supaya Saiful Muluk melamarnya melalui neneknya Putri Ajut yang terkenal sakti dan tinggal di kayangan.

Sesudah 40 hari bersama Putri Khatun, Putri Badi' pulang ke negerinya. Ia akan meminta kepada neneknya untuk menjemput Saiful Muluk supaya dapat melamarnya. Sampai di istana, nenek Putri Badi' menyatakan persetujuannya bila cucunya itu dikawinkan dengan Saiful Muluk.

Tersebut pula sebuah kerajaan jin di laut Kalzum yang diperintah oleh seorang raja bernama Arza'. Arkas Zanggi adalah seorang pahlawannya yang terkenal. Pada suatu hari ia mengadakan musyawarah tentang putra raja yang dibunuh oleh seorang manusia. Raja Arza' amat marah lalu ia memerintahkan Arkas Zanggi mencari pembunuohnya. Ketika sedang mandi Saiful Muluk ditangkap olehnya dan dibawa terbang ke laut Kalzum. Menjawab pertanyaan raja, Saiful Muluk mengatakan bahwa ia membunuh anaknya karena ia telah menculik Putri Khatun. Ketika Saiful Muluk hendak dibunuh seorang bujang mencegahnya lalu ia dimasukkan ke dalam tahanan.

**HIKAYAT  
SAIFUL MULUK  
JILED KEU SA**

Alhamdulillah sigala pujoe  
Tuhan sidroe Maha Kuasa  
Rahman Rahim Tuhan sidroe  
Keu geutanyoe bandum hamba

Manusia jen ngon hiwan  
Allah Tuhan nyang peuhamba  
Nyang bri raseuki dum sibarang  
Poku Tuhan laen hana

Wajeb atueuh sikalian  
Sidroe Tuhan Beutathee na  
Oh lheueh pujoe poku Tuhan  
Keu junjongan seulaweuet lon ba

Seulaweuet saleuem atueuh Muhammad  
Pangulee umat dum sineuna  
Allahumma salli 'ala Saidina Muhammad  
Pangulee umat dum sineuna

Nabi Muhammad peusuroh Tuhan  
Ubak gob nyan sigala hamba  
Ya Tuhanku neutamah rahmat  
Ateueh Muhammad saidil anbia

Ateueh wareh sigala sahbat  
Sigala umat Nabi Mustafa  
Insya Allah beutroh hajat  
Lon meusurat saboh calitra

Haba jameun lon riwayat  
Cit ka treb that dilee masa  
Masa keurajeuen Nabi Sulaiman  
Bak masa nyan nyoe calitra

Sidroe raja lon karangan  
That analan hana tara  
Lon mohon tulong bak hadarat  
Beukek tamat ulon rika

Ya Tuhanpo nyang ahad  
Peutroh hajat pinta hamba  
Barangkajan nyang lon harap  
Ya hadarat cit bak gata

Hambateu nyoe nyang hina that  
Laen tan pat lon mupinta  
Neubri sampoe ban nyang hajat  
Beukek tamat surat langka

Neubri ate trang ngon teupat  
Neubri kuat po keu hamba  
Lheueh meulakee ubak Tuhan  
Karangan jinoe lon mula

Teuma laju lon mat kalam  
Lon reugam keuretah safra  
Lon cok dawuet mirah hitam  
Ulon rakam seun sibanja

Bahsa Aceh lon ejaan  
Lon boh padan sanjak gata  
Bahsa Meulayu na meujan-jan  
Mangat reumbang pakhok rika

Lon seumurat hana utoh  
Lon cuba boh lhee pat banja  
Kheut hana get banja han roh  
Lon teungku beh dungoe raya

Meungna sisat deungon salah  
Harap meuah hai seedara  
Bahkeu oh noe nyoe khuteubah  
Alkisah jinoe lon mula

Ajaeb subhanallah  
Lon peugah haba saboh roe  
Sidroe raja ulon kisah  
Meusyeuhurah jeuep-jeuep nanggroe

Rakyat rame that bahrullah  
Mat peurintah peuet boh nanggroe  
Barangkasoe han ek teugah  
Nyan khalifah nyang seureuloe

Mat keurajeun nanggroe Meuse  
Hukum ade hana bagoe  
Hukum that kong raja ade  
Sampoe ugle rame nanggroe

Nanggroe Yaman deungon Bagdad  
Raja deelat nyang hareutoe  
Nyang saboh treuk Buini Ara  
Neumat raja peuet boh nanggroe

Nyankeu teumpat mat neuraja  
Rame banda hana bagoe  
Nama raja Asim bin Sifun  
Ato turun lon hareutoe

Jeuep-jeuep raja keunan jitren  
Oh meuhimpon rame han soe  
Geunap uroe sabé hukum  
Le that kaum hana bagoe

Meuntroe wazi deungon bujang  
Uleebalang nam ribee droe  
Bintara cut bintara blang  
Han ek teelan lon hareutoe

Rakyat laen tan lon peugah  
That bahrullah aneuk nanggroe  
Sidroe wazi nyang that meugah  
Nyang peurintah dum sinaroe

Akaipi jroh tangan murah  
That meutuah hana bagoe  
Parek Budiman nan geurasi  
Nyankeu wazi nyang seureuloe

Le hikeumat deungon sakti  
Geumasehpi hana bagoe  
Raja ade nanggroe makmu  
That meusyeuhu lam alam nyoe

Cina dagang kleng Meulayu  
Barat timu keunan sampoe  
Dum syedaga mangat ate  
Hana wase gle ngon nanggroe

Tan soe reubot sampoe ugle  
Beureukat ade raja nanggroe  
Salah bacut tan Iseulam  
Dara agam dum sinaroe

Seumbah patong barangkajan  
Nyan jikhadam malam uroe  
Judo raja ngo lon rawi  
Peurmaisuri nama putroe

Rupa jroh that hana sakri  
Kilat bibi ban meuk uroe  
Muka rumeh bibi lipeh  
Kulet puteh jeuet talhoh droe

Soe nyang kalon ate gaseh  
Bak taeh-eh roh talumpoe  
Poteu raja that neugaseh  
Cut puteh ceudah han bagoe

Barangkapeue han tom teupeh  
Hana neuweh meung siuroe  
Putroe tuha tan peuduli  
Daok ngon cut ti sinan laloe

Putroe tuha tan neuwoe le  
Sinan sabe malam uroe  
Sabab putroe mantong muda  
Poteu raja galak han soe

Dua reutoh thon umu raja  
Nyang ka tuha nam droe putroe  
Salah bacut raja male  
Han meusampe tan geulantoe

Keu peue meugah oh teupike  
Watee mate soe mat nanggroe  
Bak siuroe teukeudi Tuhan  
Sulotan teuringat keudroe

Oh teuringat aneukneu tan  
Sulotan ka roh bak neumoe  
Ie mata ro basah badan  
Susah han ban raja nanggroe

Uroe malam teungeutneu han  
Neumeulawan neupoh-poh droe  
Tuan putroe tanyong yoh nyan  
Ceupet badan deungon jaroe

Pakon judo that dukaan  
Peue ingatan tuanku droe  
Nyang dilee kon han tom meunan  
E junjongan pakon meunoe

Meunyo salah ulon tuan  
Judo badan neupoh jinoe  
Meunan neukheun peurmaisuri  
Cut putroe ti su sira neumoe

Teuma seuot meukuta duli  
Bak putroe ti peugah meunoe  
Hana salah bungong pade  
Bek tamoe le hai sambinoe

Dilon putroe susah ate  
That teupike keu inong droe  
Oh lon ingat han meusampe  
Sabab male lon hai putroe

Lon that susah hana lawan  
Aneuk badan tan meung sidroe  
Kadang mate lon hai intan  
kadang pajan nyawong sampoe

Oh mate lon puteh licen  
Soekeu laen teuma gantoe  
Nyankueu sabab lon that ngeuren  
Bintang canden pakri jinoe

Meunan neukheun le khalifah  
Seuot pantah tuan putroe  
Ampon deelat sialam syah  
Ngo lon peugah tuan droe

Yue hei nujum Faki Syiah  
Deelat yue krah jeuep-jeuep nanggroe  
Neukhanduri bri seudeukah  
Faki Syiah dum sinaroe

Yue meukaoi ngon meudoa  
Aneuk beuna keu geutanyoe  
Meunan nyang got bak lon kira  
Dum peundita yue hei keunoe

Han jan habeh putroe peugah  
Khalifah neuhei le meuntroe  
Bak peurdahna neukheun pantah  
Faki syiah tahei keunoe

Meuntroe beudoh laju bagah  
Nujum jikrah dalam nanggroe  
Jikrah nujum timu barat  
Haba deelat jihareutoe

Han padum treb hingga lambat  
Ubak deelat ka troh sampie  
Dalam kuta ka meusapat  
Hadap deelat raja nanggroe

Ampon tuanku po meukuta  
Peue neusabda tuanku droe  
Deelat peugah jinoe sigra  
Peue keurija neuhei kamoe

Soe tuanku nyang ka mate  
Lon peurae hareuta jinoe  
Meunan seumbah bandum sare  
Neuseuot le raja nanggroe

Nyang lon meuhei gata dumna  
Tameudoa keu lon sidroe  
Lakee keu lon aneuk beuna  
Nyankeu pinta hajat kamoe

Teuma seuot dumna syiah  
Han peue salah tuanku droe  
Kamoe lakee jinoe pantah  
Deelat syah hajat sampie

Poteu raja ate dasyah  
Deelat syah hajat sampie  
Neusie keubeue lumo bubiri  
Neukhanduri raja nanggroe

Mangat ate Alim Faki  
Pengpi geubri pruetjih ka troe  
Lakee doa dum jirata  
Aneuk raja beuna sidroe

Uroe malam tango subra  
Agam dara dum sinaroe  
Seumbah patong beungoh seunja  
Bak beurala jipeujok droe

Mangat ate poteu raja  
Han neukira hareuta rugoe  
Bak taingat bit-bit ek na  
Dum ulama jileueng jaroe

Ka peuet buleuen lakee doa  
Han cit ek na hame putroe  
Tango kiroh jeuep-jeuep gampong  
Jeuep-jeuep jurong meunasah sagoe

Faki Syiah lakee tulong  
Ubak patong jilungkob droe  
Umu sithon meunan sabé  
Jimeudike cula-caloe.

Ka jitapa jeuep luak gle  
Bak jipike sang ek sampoe  
Bitpi meunan aneukneu tan  
Kon bak Tuhan jileueng jaroe

Raja susah hana lawan  
Aneukneu tan hareuta rugoe  
Poteu raja marit nyoe ban  
Di hadapan wazi meuntroe

Dinab geusyik uleebalang  
Waki bujang imam sagoe  
Turon sabda bak sulotan  
Pakri padan wahe meuntroe

Han troh hajat ulon tuan  
Aneuk lon tan hareuta rugoe  
Teungoh-teungoh duek meututo  
Ka teupako raja nanggroe

Yub keurus ka meutajo  
Ka a ka o dum sinaroe  
Kulah kama ka meuhambo  
Ka teupeuro intan pудое

Hana mumet meung sigeutu  
Tuanku reubah teupipoe  
Wazi meuntroe habeh karu  
Ka'ka'u hana bagoe

Wazi Budiman beudoh laju  
Mueng tuanku raja nanggroe  
Jimueng ulee laju rijang  
Ka jitatang deungon jaroe

Wazi kheun bak uleebalang  
Jak tariwang bandum tawoe  
Jibeudoh le teuma rijang  
Dum sibarang bandum tawoe

Habeh dum a woe sikalian  
U bineh blang baro sampoe  
Muwoe kisah Parek Budiman  
Mueng junjongan raja nanggroe

Banta tinggai dua gob nyan  
Nyang laen tan le meung sidroe  
Jipeubeudoh duli sulotan  
Jilatatang jitumpang bak dhoe

Raja teuduek tahe mandang  
Wazi rijang tanyong meunoe  
Deelat ampon po junjongan  
Pakon bimbang tuanku droe

Peuekeu sabab po jeunulang  
Nyang jeuet bimbang payong nanggroe  
Meunan neukheun wazi budiman  
Seuot yoh nyan peugah meunoe

Deungo wazi lon peugah ban  
That syugulan ulonteu nyoe  
Oh lon ingat aneuk lon tan  
Hana lawan susah kamoe

Adat mate ulon tuan  
Aneuk lon tan soe nyang gantoe  
Nyanteu sabab ulon susah  
Pakri ilah peugah jinoe

Deelat ampon sialam syah  
Bit nyo susah tuanku droe  
Ulon sidroepi cit meunan  
Ngon junjongan saban that roe

Hana aneukpi meung sikhan  
Ka sipadan duateu nyoe  
Neupateh lon po meukuta  
Na bicara bak lon sidroe

Bah le taproh patong beurala  
Bek le puja tuanku droe  
Hana sapeue manfaat na  
Padum lama ka tapujoe

Cuba pike wahe deelat  
Sapeue hajat han ek sampoe  
Jinoe tuanku ta Iseulam  
Bah tahantam patong jinoe

Bandum rakyat yue Iseulam  
Dara agam dum sinaroe  
Meunan nyang got bak ulon pham  
Bah tahantam patong pindoe

Bek pujoе le deelat makam  
Ta Iseulam dum geutanyoe  
Hana guna seumbah patong  
Neupateh lon tuanku droe

Hana sapeue ek jitulong  
Uleh patong keu geutanyoe  
Poteu raja salah waham  
Tanyong rijang teuma meunoe

Paki rupa ta Iseulam  
Pakri macam kheun bak kamoe  
Wazi seuot teuma nyoe ban  
Ngo lon tuan peugah jinoe

Nyang Iseulam po junjongan  
Raja Sulaiman lon ngo bunyoe  
Hana nyang sa ngon Sulaiman  
Hai junjongan barangkasoe

Lam donya nyoe nyan sulton  
Pujoе Tuhan malam uroe  
Baitulmukaddis nanggroe gob nyan  
Sulaiman raja seureuloe

Nyankeu raja nyang Iseulam  
Nyang geunggam langet ngon bumoe  
Ateueh angen geumeukandran  
Han soe lawan gob nyan sidroe

Hana sapat na teuladan  
Han ek bintang barangkasoe  
Asoe rimba dum binatang  
Jen hewan ban sinaroe

Bandum sujud bak Sulaiman  
Hana nyang han keunan jiwoe  
Meunan wazi geupeugah ban  
Syahi alam seuot meunoe

Ulonteu nyoe salah waham  
Hana troh pham pike lon nyoe  
Meunyo meunan ban tapeugah  
Rakyat takrah bak uroe nyoe

Bak Sulaiman lon meulangkah  
Raja meugah nibak kamoe  
Seuot wazi teuma pantah  
Bek khalifah neujak keudroe

Bek tuanku neumeulangkah  
Jeuoh leupah teumpat nanggroe  
Bah le lon jak deungon rakyat  
Tinggai deelat di meuligoe

Sabab nanggroe hana mupat  
kadang sisat roh meupaloe  
Baitulmukaddis bit jeuoh that  
Tan soe tupat barangkasoe

Meunan wazi dum riwayat  
Seuot deelat teuma meunoe  
Meunyo meunan wahe sahabat  
Bungka leugat kaman jinoe

Beudoh laju bek le lambat  
Taba rakyat bek le laloe  
Meunan sabda nibak deelat  
Beudoh leugat dum sinaroe

Hingga teuma haba nyang rab  
Geukrah rakyat bungka jinoe  
Dalam kuta teubiet leugat  
Tinggai deelat di meuligoe

Wazi Budiman le beurangkat  
Deungon rakyat nam ribee droe  
Ban sinaroe cukop leungkap  
Deungon alat cokma beusoe

Peudeueng khanja beusoe bulat  
Cukop alat leumbeng cakcoe  
Uroe malam geuberangkat  
Miseue rakyat jak prang nanggroe

Padum na treb geujak sabe  
Sampoe ugle ujung nanggroe  
Jak Iseulam ureueng Meuse  
Mangat ate dum sinaroe

Na peuet buleuen geujak sabe  
Didalam gle huteuen duroe  
Teutap geujak ureueng Meuse  
Laen syawe lon hareutoe

Nyang lagee nyoe han kureule  
Bak lon pike wahe adoe  
Ragam laen ulon rawi  
Han le meukri nyang lagee nyoe

Bukon sayang lon eu campli  
Ngon boh sunti tapeulawan  
Ammabakdu ureueng male  
Peugot sure di ureueng nyan

Ulon peugah Sulaiman Nabi  
Ngo lon rawi jinoe kaman  
Bak siuroe tren jibrai  
Ubak nabi neukheun nyoe ban

Hai Sulaiman deungo kamoe  
Lon peurunoe sikalian  
Ureueng Meuse teuka keunoe  
Bak uroe nyoe sikalian

Peu Iseulam dum sinaroe  
Tayue pujoe sidroe Tuhan  
Lheueh Jibrai dum neupeugah  
Sahbat pantah neuhei keunan

Wahe sahbat ngo lon peugah  
Rakyat takrah keunoe rijang  
Ban jideungo jijak pantah  
Rakyat jikrak dum sibarang

Jeuep-jeuep nanggroe jijak peugah  
Bue ngon reungkah eungkot insan  
Rakyat jitren that bahrullah  
Han ek peugah wahe rakan

Bimatang gle badeuek gajah  
Lutong reungkah kala pisan  
Nyang dilaot han ek peugah  
Blah bicah eungkot sibarang

Laen nibak nyan han lon peugah  
Panyang kisah wahe rakan  
Dum binatang ka meusapat  
Bak deelat raja Sulaiman

Yoh nyan nabi neukheun leugat  
Ubak rakyat dum sibarang  
U bineh gle tabeurangkat  
Jak preh sahbat wahe rakan

Meunan nabi neuriwayat  
Beudoh leugat sikalian  
Hingga sampoe ubak teumpat  
Piyoh rakyat didalam blang

Didalam blang peunoh sarat  
Ka meusapat bandum keunan  
Rakyat nabi teuduek siat  
Laen sahbat lon karangan

Ureueng Meuse lon riwayat  
Bandum rakyat teungoh jalan  
Tujoh buleuen geujak sabe  
Didalam gle rimba Tuhan

Hingga sampoe Tuhan neubri  
U bineh gle keunan datang  
Teuma beudoh sahbat nabi  
Geueumpeueng le dum ureueng nyan

Tahe mandang ureueng Meuse  
Dalam ate geulahe han  
Ban geukalon binatang gle  
Kuyu ate sikalian

Nyum teumakon ureueng Meuse  
Binatang gle peutoe keunan  
Peurab laju ureueng nanggroe  
Mumat jaroe yoh nyan rijang

Didalam blang meusoe geumoe  
Ret deh ret noe ka troh keunan  
Ureueng Meuse dum sinaroe  
Jipujoe nabi Sulaiman

Teuma geuba dum ureueng nyoe  
Jipuwое laju u dalam  
Hingga seupot asa uroe  
U meuligoe ka troh datang

Dalam kuta tamong leugat  
Bak deelat nabi Sulaiman  
Mideuen peunoh blangpi sarat  
Le that rakyat han tatuban

Neupeujamee uleh nabi  
Ureueng Meuse nyang jak keunan  
Neupeuindah jroh han sakri  
Uleh nabi Rasul Tuhan

Ureueng Meuse mangat ati  
Pujoе nabi dum ureueng nyan  
Padum na treb teuma lawi  
Tanyong nabi teuma yoh nyan

Na tadeungo ureueng Meuse  
Lon tanyong kri tapeugah ban  
Peue meukeusud tajak keunoe  
Ubak kamoe peue na padan

Wazi Budiman jawueub neubri  
Ampon kami po junjongan  
Raya hajat tuanku droe  
Deungo jinoe lon peugah ban

Asim bin Sifun raja kamoe  
Ulonteu nyoe wazi gob nyan  
Oh nan baro kheun po wazi  
Seuot nabi laju rijang

Hajat gata ka lon tukri  
Ngo lon rawi wahe rakan  
Asim bin Sifun raja male  
Susah ate hana lawan

Oh teuringat han meusampe  
Gob male aneukkeu tan  
Nyanteu sabab susah ate  
Oh teupike hanco badan

Kareuna geutueng agama kafe  
Sabab male aneukkeu tan  
Nyanteu wazi ka lon lahe  
Cuba pike nyo lagee nyan

Parek Budiman ka teupike  
Jiseuot le teuma rijang  
Deelat ampon sialam syah  
Dibawah kadam junjongan

Pakri neuthee hai khalifah  
Neuphom sudah boh sidum nan  
Hajat kamoe ka neutukri  
Wahe duli soe peugah tan

Teuma neukheun uleh nabi  
Tango wazi lon peugah ban  
Jeuet lon tuban wahe wazi  
Jeuet lon tukri sikalian

Tren pireuman nibak Rabbi  
Troh Jibrai bak lon tuan  
Nyankeu sabab jeuet lon tukri  
Laen wazi soe peugah tan

Tahe mandang dum na rakyat  
Seuot leugat Parek Budiman  
Ampon tuanku raja deelat  
Neupeusyahdat ulon tuan

Jak Iseulam kamoe hajat  
Galak meuthat po junjongan  
Meuboh gampong deungon teumpat  
Kamoe hajat jak Iseulam

Bek le kamoe dalam siasat  
Neupeusyahdat laju rijang  
Yoh nyan nabi neupeusyahdat  
Bandum rakyat neuajaran

Neuyue pujoe Allah nyang ahad  
Neupeusyahdat dum ureueng nyan  
Nyang peujeuet alam dum lat batat  
Allah nyang ahad nyang laen tan

Bek taseumah patong-patong  
Wahe kaum manfaat tan  
Hana sapeue ek jitulong  
Uleh patong wahe rakan

Han ek jibri seunang meularat  
Sangat sisat hana lawan  
Habeh nabi bri nasihat  
Ate mangat sikalian

Ka Iseulam ureueng Meuse  
Beureukat nabi Allah Sulaiman  
Ka meutuah ureueng Meuse  
Tan le jahe ka na iman

Dum sinaroe mangat ate  
Ucap zike pujoe Tuhan  
Na peuet buleuen sinan lawi  
Sajan nabi dum ureueng nyan

Teuma lheuh nyan keumeung jak woe  
U nanggroe droe sikalian  
Ubak nabi geumohon droe  
Ampon kamoe po junjongan

Idin deelat bandum kamoe  
Hajat jinoe kheundak riwang  
Meunan wazi kheun hareutoe  
Geulakee droe kheundak pulang

Seuot nabi neukheun meunoe  
Deungo kamoe wahe teelan  
Bek taubah wasiet lon nyoe  
Lon kheun jinoe saboh padan

Yue Iseulam asoe nanggroe  
Yue pujoe po sidroe Tuhan  
Agam inong dum sinaroe  
Jeuh ngon toe dum sibarang

Nyoe saboh treuk wasiet kamoe  
Tango jinoe wahe teelan  
Oh troh gata woe u nanggroe  
Bandua droe ngon sulotan

Tajak laju dalam rimba  
Deungon raja taba sajan  
Tame busu dua gata  
Bek tababa laen rakan

Bineh huteuen kayee raya  
Batee hampa diyub nyan  
Ateueh batee yue duek raja  
Deungon gata dua sajan

Teuma dudoe uleue teuka  
Dua-dua jijak keunan  
Tapeubusu laju sigra  
Bandua tapoh uleue nyan

Saboh sapeue deungon raja  
Bek meutuka ban aturan  
Ubak judo tayue pajoh  
Tet beurapoh sie sikhan-khan

Supaya got mangat tuboh  
Nyankeu suroh ulon tuan  
Peue nyang hajat Tuhan peutroh  
Lheueh tapajoh sie uleue nyan

Habeh wasiet dum sinaroe  
Neujok peutoe teuma lheueh nyan  
Euncien saboh dalam peutoe  
Hu sang uroe mata intan

Ija peuet krak nabi pasoe  
Bak sagoe neukue euncien nyan  
Nabi kheun lom teuma meunoe  
Peutoe lon nyoe keu haluan

Nyoekeu nyang na nibak kamoe  
Takheun meunoe bak sulotan  
Oh na aneuk raja nanggroe  
Pulang peutoe keu aneuk nyan

Bek bri buka barangkasoe  
Seulama kamoe takheun meunan  
Meulaenkan aneuk khalifah  
Nyang jeuet peuhah peutoe intan

Meung soe laen hana ilah  
Bah meugah raya angkatan  
Habeh wasiet dum sinaroe  
Beudoh geuwoe teuma rijang

Oh lheueh idin nabi sidroe  
Beudoh geuwoe sikalian  
Puwoe sajan saboh peutoe  
Bungong jaroe keu sulotan

Mangat ate hana bagoe  
Hajat sampoe dum sibarang  
Dalam rimba ka troh sampoe  
Malam uroe geubeujalan

Hana sapeue haro hara  
Dalam rimba harong padang  
Padum lawet teuma dudoe  
Ka troh sampoe ubak makam

Dalam kuta tamong laju  
Bak tuangku syahi alam  
Parek Budimanpih ka ngadu  
Bak tuanku peuseumbahan

Wasiet nabi peugah laju  
Ban nyang laku nabi peusan  
Jok ngon peutoe teuma laju  
Tuanku neusambot rijang

Lom wazi kheun teuma meunoe  
Tuanku droe syahi alam  
Nyan haluan bungong jaroe  
Tuanku droe bak Sulaiman

Didalam saleh peue asoe  
Bandum kamoe tan mupandang  
Wazi peugah sigala syoe  
Mula sampoe keusudahan

Rajo deungo dum sinaroe  
Hana bagoe ate deundam  
Peu Iseulam teuma dudoe  
Ureueng nanggroe inong agam

Ucap syahdat dum sinaroe  
Ka geupujoe sidroe Tuhan  
Ka Iseulam raja nanggroe  
Tuhan sidroe geumeu iman

Dan sigala asoe nanggroe  
Jeuoh ngon toe inong agam  
Hukum agama dum sinaroe  
Habeh sampie dum geutuban

Agama kafe habeh neuboh  
Neuteuoh nabi Sulaiman  
Sayang patong dum nyang jroh-jroh  
Habeh geuproh geutot yoh nyan

Tan le tinggaipih meung saboh  
Ka neuproh uleh junjongan  
Lawet Iseulam raja nanggroe  
Malam uroe ate seunang

Jeuet keu dum nan saboh bagoe  
Han ek adoe le lon rakam  
Ayat laen ulon gantoe  
Bek treb meunoe han meukri ban

Mukim limong Teuku Bin Reubee  
Gampong Aree Teuku Geumpa  
Ammabakdu laen lagee  
Mukim lhee Teuku Bintara

Asim bin Sifun lon peuteuntee  
Tango sampe lon calitra  
Ka teuringat wasiet dilee  
Oh troh watee uroe asa

Neumeukeumah dalam juree  
Neusok bajee pinggang ija  
Deungon wazipih teuntee  
Hana lagee ate suka

Neucok busu ka neupangkee  
Tren lam juree ureueng dua  
Neupeuseutot janji dilee  
Neujak teuntee dalam rimba

Oh sare troh uyub kayee  
Ka meuteumee batee hampa  
Neuek neuduek ateueh batee  
Neueu lagee pakri rupa

Ban dua droe ateueh batee  
Piyoh dilee sikutika  
Na sijamong sinan teuntee  
Neueu lagee uleh raja

Teubiet uleue diyub batee  
Santeuet uleue jieue dua  
Neucok busu ka neutimbak  
Kcunong talak le bandua

Uleue mate ka teupipak  
Raja tren bak batee raya  
Ubak uleue laju neujak  
Raja rinthak laju sigra

Raja ngon wazi ate galak  
Teuma neujak woe ban dua  
Oh sare troh u meuligoe  
Neuhei putroe teuma sigra

Neubeudoh le tuan putroe  
Ka neupeutoe ubak raja  
Sabda raja ubak putroe  
Tot uleue nyoe laju sigra

Di wazipih meunan bagoe  
Saboh sapo uleue geuba  
Oh masak uleue tapajoh  
Tot beurapoh judo muda

Putroe cok le uleue biyoh  
Neutot sunggoh hana tara  
Masakpih got uleue rapoh  
Putroe pajoh mangat rasa

Meutamah jroh puteh lusoh  
Mangat tuboh hana tara  
Jiek jahet meuh sineupoh  
Hu s umeuloh cahya muka

Meukilat hu cahya tuboh  
Sang peuridoh nanggroe Cina  
Poteu raja that tawajoh  
Putroe that jroh nibak nyang ka

Hingga malam ka poh siploh  
Puteh lusoh eh ngon raja  
Bak masa nyan meung seutuboh  
That tawajoh hana tara

Hingga lheueh nyan teungeut layoh  
Cut haloh dua ngon raja  
Oh ka beungoh uroe mureh  
Beudoh bak eh ureueng dua

Neujak manoe laju keudeh  
Cut puteh dua ngon raja  
Neurah ngon ok bandum habeh  
Kalangpih gleh jeuep anggeeta

Oh lheueh manoe bungong puteh  
Neukek keudeh u astana  
Ban dua deungon sultan  
Seumayam di atueh geuta

Deundayang beuet teuma hidang  
Makeuen rijang poteu raja  
Deungon putroe dua sajan  
That sukaan hana tara

Oh lheueh makeuen pinah hidang  
Tarek puan makeuen sigra  
Muwoe kisah putroe seudang  
Cut bulan pruet ka raya

Lahe hame putroe ceudah  
Khalifah ate that suka  
Di wazipih meunan ulah  
Hame zaujah sigo dua

Galak ate han peue peugah  
Peugot nicah hana reuda  
Poteu raja ate dasyah  
Pujo Allah Po nyang ahad

Ucap syuko pujo Allah  
Ate dasyah dalam dada  
Neukhanduri bri seudeukah  
Faki syiah le nyang kaya

Neusie keubeue leumo kibah  
Nam limong blah dua ploh sa  
Lakee doa uroe malam  
Cut intan beuleupah bahya

Meunankeu hai ureueng nanggroe  
Malam uroe jimeudoa  
Tujoh buleuenh hame putroe  
Geunap uroe ureueng teuka

Rakyat jitron jeuep-jeuep sagoe  
Khadam putroe judo raja  
Jime tabak hidang meuasoe  
Watee jiwoe geubri ija

Buleuen tujoh geuseumanoe  
Cut putroe beuleupah bahya  
Hingga geunap buleuen sampie  
Saket putroe budak ka na

Teungoh beukah matauroe  
Samlakoe jipandang donya  
Lahe budak ureueng lakoe  
That seureuloe hana tara

Rupa jroh that hana bagoe  
Sang meuk uroe cahya muka  
Kulet puteh jeuet talhoh droe  
That samlakoe aneuk raja

Poteu raja ate deundam  
Aneuk agam po karonya  
Rupa jroh that hana macam  
Dalam alam hana ngon sa

Poteu raja oh neupandang  
Syuko keu Tuhan Allah Akbar  
Paleuet jaroe jroh meugulam  
Lidah hitam meukeumala

**Suroh raja ubak bujang**  
Tot meuriam dalam kuta  
Nyang phon jitot jira hitam  
Geunta alam sikhan donya

Habeh jithee inong agam  
Deelam makam aneuk ka na  
Parek Budiman jak u dalam  
Bak sulotan peugah sigra

Deelat ampon syahi alam  
Dilon beuklam aneuk ka na  
Tuhan neubri aneuk agam  
Hana macam ceudah rupa

Ulonteu nyoe ate deundam  
Aneuk agam Tuhan karonya  
Ban raja ngo meunan macam  
Seuot rijang poteu raja

Meunyo meunan rupa jroh that  
Jak cok leugat keunoe taba  
Ngon aneuk lon tapeusapat  
Taba leugat aneuk gata

Meunan sabda raja deelat  
Wazi leugat geujak gisa  
Jak cok manyak teuma leugat  
Me bak deelat dalam kuta

Raja kalon rupa jroh that  
Sambut leugat neucom neuwa  
Ngon aneuk droe neupeusapat  
Rupa sa that manyak dua

Poteu raja ate mangat  
Ka neumat-mat budak ban na  
Han tom jarakpih meung siat  
Galakneu that bijeh mata

Neupeugah lom ubak meuntroe  
Jak lam nanggroe jinoe gata  
Tamita manyak dua droe  
Nyang siuroe pandang donya

Nyang seulayeue ngon sinyak nyoe  
Aneuk meuntroe boh peurdahna  
Beuthat aneuk barangkasoe  
Puwoe keunoe laju sigra

Keu ngon aneuk ulonteu nyoe  
Jeuep-jeuep nanggroe tajak mita  
Meunan titah raja nanggroe  
Beudoh meuntroe yoh nyan sigra

Lakee idin angkat jaroe  
Di meuligoe jitron lanja  
Meuntroe geujak laju sidroe  
Malam uroe keumeung safra

Habeh geujak jeuep-jeuep nanggroe  
Samlakoe meuteumeung dua  
Geulakee le cok geupuwoe  
Ayah bunda droepih seureuta

Raja sambot po samlakoe  
Neutanyong soe ibu bapa  
Soe po aneuk wahe meuntroe  
That samlakoe nyan bandua

Teuma seuot teungku wazi  
Aneuk kadi po meukuta  
Raja boh nan aneuk kadi  
Kunan Syamsi geuhel geular

Nyang sidroe treuk Kunan Syahri  
Aneuk wazi meuntroe neugara  
Lheueh nibak nyan teuma dudoe  
Samlakoe neupeukek sigra

Neupeusapat ngon aneuk droe  
Raja nanggroe ate suka  
Han teungeut le malam uroe  
Budak peuet droe neucom neuwa

Poteu raja ate laloe  
That samlakoe ban peuet banta  
Puteh hijo taeu kulet  
Han tom saket aneuk raja

Neuboh tumpoe ija sungket  
Jiek jahet that bak nyang ka  
Padum lawet teuma dudoe  
Ka neumuproe poteu raja

Neumeung boh nan cut samlakoe  
Raja nanggroe neumeusabda  
Tahei nujum bandum keunoe  
Ubak kamoe tayue teuka

Oh lheueh titah nibak deelat  
Beudoh leugat le bintara  
Jikrah nujum timu barat  
Jipeusapat tuha muda

Beudoh nujum teuma leugat  
Gapiet kitab geujak lanja  
Troph bak raja ka meusapat  
Timu barat habeh teuka

Jidong diyub ka jideelat  
Jiangkat jaroe bandua  
Jitanyong le teuma leugat  
Ampon deelat peue na sabda

Poteu raja neukheun teupat  
Buka kitab teungku dum na  
Aneuk ulon na siurat  
Teungku lihat soe bu nama

Soe meutaboh nama intan  
Teungku pandang dalam dapta  
Meunan sabda bak sulotan  
Nujum yoh nyan kitab buka

Dum na nujum peuhah kitab  
Geukalon bab pupoh angka  
Habeh geueu sigala bab  
Lam pirasat lahe nyata

Ka meuteumeung dalam surat  
Geutob kitab geuhadap raja  
Ampon tuangku nan ka meuhat  
Dalam surat lon pareksa

Lahe lon eu lam pirasat  
Meutuah that aneuk dua  
Tuah raya leubehpih that  
Dudoe meuhat gob nyan raja

Gob nyan raja sigala don  
Keunoe jitron bak meukuta  
Habeh reule dum na patong  
Panyot tanglong that peukasa

Saiful Muluk nan lon rasi  
Ampom duli nyankeu nama  
Le hikeumat deungon sakti  
Raya bagi po meukuta

Han soe lawan barangkari  
Le that sakti po bintara  
Nyang sidroe treuk aneuk wazi  
Said Juhari lon boh nama

Meutuah that hana sakri  
Aneuk wazi mubahgia  
Ban raja ngo nujum peugah  
Ate dasyah dalam dada

Neucok ringget bri seudeukah  
Nujum syiah sambot sigra  
Lakee idin bak khalifah  
Beudoh pantah nujum gisa

Teungku nujum neuwoe leupah  
Deelat syah tinggai lam kuta  
Bukon sayang lon eu gajah  
Jikeumeung plah bak me raya

Kadang hanco me han reubah  
Sayang gajah gadoh manta  
Ammabakdu nyak Salibah  
Rasa kuah leupah sira

Putroe madeueng muwoe kisah  
Tuwo leupah lon seedara  
Tan lon peugah masa bunoe  
Silab kamoe roh meutuka

Lawet madeueng tuan putroe  
Ureueng nanggroe sabé teuка  
Bandum jiba bungong jaroe  
Jak eu putroe sinyak ka na

Nyoe goh jiwoe laen ka troh  
Han tom putoh sikleb mata  
Uroe malam kapah kapoh  
Tango riyoh hana reuda

Tamong po nyoe teubiet po jeh  
Jak meulapeh santeut banja  
Jeuetkeu dum nan ulon rinteh  
Han ek habeh lon calitra

Lon peuriwang keu Cut Bungsu  
Judo teungku raja raya  
Troh peuet ploh peuet geulhoh dапу  
Cut meulu ka leupah mara

Ka seulamat bintang timu  
Bri Tuhanку leupah bая  
Mangat ate kon sigeutu  
Tuanku ngon putroe muda

Neueu sinyak rayek laju  
Ate seueu du deungon ma  
Tan le ingat neupajoh bu  
Laloe rindu com po banta

Di meuligoe jareueng neutron  
Cok neuukoni boh ate ma  
Neucok sinyak boh lam ayon  
Sae panton putroe muda

Ngo suara jroh meualon  
Tulak ayon su meugeunta  
Meung neudeungo nyum bek tatron  
Akhe ngon phon got suara

Cut putroe kheun meunoe phon-phon  
Neumeupanton ayon banta  
Alah hai jak kutimang phon  
Taloe ayon meuh suasa

Ka rab ruha umu dilon  
Aneuk loh phon nyoe baro na  
Jak kukheun doda ido  
Boh tulo boh cicempala

Bek kamoe-moe hai aneuk e  
Linto baro goh lom raya  
Jak lon kheun doda ido  
Peuraho bak meudang ara

Kaeh aneuk uroe luho  
Lon jak boh bu duteu raja  
Jak lon kheun doda idi  
Bijeh campli beurijkek ba

Simanyak cut han peue lon bri  
Beu Allah bri rijang raya  
Sinyak cut doda idi  
Bijeh sawi bijeh langla

Watee rayek bungong giri  
Nanggroe lon bri bak taraja  
Jak lon kheun doda idang  
Seulayang jipo dalam hawa

Beurijang rayek cut buleuen trang  
Gampong ngon blang hukum gata  
Jak lon kheun doda idang  
Cicem subang po meugisa

Bumeutuah banta seudang  
Beukek taprang jeuep-jeuep raja  
Cok lam ayon ka neutimang  
Ka neusayang po bintara

Neutimang le bungong uroe  
Tuan putroe panton neuba  
Jak lam timang bungong geutoe  
Keunong uroe habeh mala

Buphet kulet mangat asoe  
Samlakoe beurijang raya  
Jak lon timang bungong uroe  
Reudok tampoe han le cahya

Beuna umu po samlakoe  
Tujoh nanggroe kaoi lon ba  
Jak lon timang bungong awe  
Didalam gle angen tampa

Lon peutimang bumeusampe  
Boh ate beurijang raya  
Alah e jak kutimang be  
Jih digle boh jeuoh mara

Wahe aneuk jantong ate  
Bek tamoe le cahya mata  
Jak lon timang bungong sukon  
Lon hayon bungong seulanga

Beuna aneuk puteh sabon  
Galak that lon nyak keu gata  
Mata layoh bungong sukon  
Boh lam ayon uleh po ma

Tuan putroe lom meupanton  
Meutulak cron ayon banta  
Jak lon hayon bungong meulu  
Sret meutabu dalam tika

Beungoh seupot poma bri bu  
Lon bri susu nak rijang raya  
Jak lon hayon bungong meulu  
Sret meutabu dalam tika

Beurjang rayek bintang timu  
Poma rindu that keu gata  
Jak lon timang bungong teusok  
Lam lipat ok habeh mala

Wahe aneuk Saiful Muluk  
Mateu mabok that keu gata  
Nibak ulee lon boh pupok  
Nak bek sijuek boh ate ma

Jak lon hayon seukeum bangoe  
Ie unoedidalam kaca  
Beungoh seupot ma seumanoe  
Bumangat asoe bijeh mata

Jak lam hayon rubang taloe  
Beuragoe jipo meugisa  
Beurijang rayek po samlakoe  
Malam uroe ma meujaga

Jak lon timang putik rambot  
Aneuk got-got dicong ara  
Lon seumanoe beungoh seupot  
Lon peulimbot deungon ija

Jak lon timang bungong kipah  
Dalam grah habeh mala  
Beurijang rayek nyak meutuah  
Ma that payah bak meujaga

Jak lon timang bungong tupah  
Sinyak ceudah goh lom raya  
Beungoh seupot ma that payah  
Lam lon papah po bintara

Ka jaga lom uleebalang  
Neucok rijang uleh poma  
Neutimang lom ka neutatang  
Poma julang bijeh mata

Alah e jak kutimang crang  
Bungong kathang habeh mala  
Beurijang rayek bungong keumang  
Boh ate nang mubahgia

Jak lon timang bungong macang  
Lam keunarang habeh mala  
Oh na gata banta seudang  
That sukaan ayah bunda

Jak kutimang pade adang  
Aneuk dagang hidong raya  
Ma meujaga uroe malam  
Lam lon khadam bijeh mata

Jak lon timang bak jeuraloh  
Han tom taboh rok-rok masa  
Ok ka puteh gigoe teulhoh  
Gata saboh nyoe baro na

Jak lon timang bungong kubet  
Dilanget na awan miga  
Ate mangat gaduh binget  
Puteh mublet lon eu gata

Alah e jak kutimang pruet  
Boh gruk-gruk dalam piala  
Teupeuen lon brok han jeuet lon pok  
Laloe lon cok cahya mata

Samlakoe cut dang lon timang  
Dalam ilang teuduek sutra  
Barangkapeue buet tinggai malang  
Laloe timang po bintara

Jeuetkeu meunan haba timang  
Ka panyang bacut lon rika  
Tuan putroe ate seunang  
Bungong keumang laju raya

Maken rayek ho siuroe  
Tuhan sidroe nyang peulara  
Miseue ujeuen kulat baroe  
Meunan bagoe aneuk raja

Ho siuroe maken leubeh  
Tamse bijeh lheueh kuala  
Barangkapeue buet han jeuet teupeh  
Gaseh leubeh du deungon ma

Miseue pade teungoh lhu  
Leubeh laju kureueng hana  
Mangat ate ma deungon du  
Watee neueu nyan aneukda

Tilo-tilo jeuet jimeusu  
Aneuk teungku raja raya  
Galak ate barangkasoe eu  
Maken laju indah rupa

Siuroe laen simalam bukon  
Soe nyang kalon ate suka  
Han tom saket badan geuhon  
Meung asoe bronpih han tom na

Hingga peuet thon umu sampoe  
Po samlakoe laju raya  
Sabe-sabe banta peuet droe  
Ulah bagoe sang saboh ma

Aneuk wazi aneuk meuntroe  
Jeuep-jeuep nanggroe keunan teuka  
Ka na rakan seureutoh droe  
Ngon samlakoe aneuk raja

Jijak meuen dalam nanggroe  
Geunap uroe jak poh panta  
Meunan sabé wahe adoe  
Samlakoe teutap calitra

Boh bidara teupin sungoe  
Manyak manoe di mideuen raja  
Ragam laen lon boh jinoe  
Bek sa ngon nyoe kureueng gura

Di Simpang peuet Pulo sampoe  
Tilam woe raja langkat  
Ammabakdu jak cot uroe  
Tajeb adoe nyang mameh that

Poteu raja kisah muwoe  
Ngon cut putroe neumeupakat  
Meung yue jak beuet po samlakoe  
Ujong nanggroe tajak intat

Neupeugah le ubak putroe  
Peukeumah droe gata leugat  
Meunan raja neuhareutoe  
Seuot putroe ampon deelat

Ban hajat meukuta nanggroe  
Nibak lon nyoe ikot pakat  
Hingga teuma haba nyang toe  
Peuhase droe ban nyang babat

Hase keumah bak lhee uroe  
Samlakoe laju geuintat  
Oh sare troh bak peundita  
Si Cut Banta peujok leugat

Teungku sambot aneuk raja  
Rakyat gisa woe u teumpat  
Teutap sinan peuet droe banta  
Bak ulama yue ibadat

Teungku peubeuet phon alef ba  
Aneuk raja ate trang that  
Han jan siat ka troh bak ya  
Si Cut Banta kheun le leugat

Oh ban jibeuet jeuet le sigra  
Kuruan raya peubeuet leugat  
Peungeuh ate hana tara  
Ban peuet banta ate trang that

Uroe malam jimeuhija  
Peuet bulan sampoe tamat  
Masailalpih ka sudah  
Lheueh Bidayah peubeuet sirat

Troh nahu teungku peugah  
Matan surah jeuet le siat  
Lheueh nibak nyan peubeuet fikah  
Kitab tufahpih ka tamat

Ileumee grak falak nujum  
Habeh maklum dum jitupat  
Bhaih akherat habeh muphom  
Buatan hukumpih ka teupat

Mutammimah deungon tafeuse  
Bhaih peuraepih utoh that  
Umu peuet thon jibeuet sabe  
Habeh sare bandum kitab

Teungku Syiah mangat ate  
Ka meusampe bak neuingat  
Umu peuet thon sinan laloe  
Jilakee woe teuma siat

Teungku wasiet teuma meunoe  
Ngo samlakoe lon amanah  
Beukit aneuk takheundak woe  
Jak samlakoe beuseulamat

Oh troh aneuk u meuligoe  
Com bak jaroe bunda leugat  
Seumbah aneuk bandua droe  
Mateu putroe deungond deelat

Nyankeu aneuk wasiet kamoe  
Idin tawoe aneuk siat  
Lheueh nibak nyan teuma dudoe  
Po samlakoe beudoh leugat

Seumbah guree banta peuet droe  
Beudoh jak woe putik langsat  
Jijak tajam hana tara  
Jalan raya rot ueh get that

Oh sare troh peuet seureuta  
Dalam kuta tamong leugat  
Seumbah ayah deungon bunda  
Bandua neuduek meusapat

Putroe neukheun mubahgia  
Bijeh mata meutuah that  
Mangat ate poteu raja  
Ban peuet banta neucom leugat

Teungoh-teungoh peugah haba  
Hidangpih ka troh jiangkat  
Jipeudeuk dikeue cut Banta  
Putroe buka teuma leugat

Makeuen laju si Cut Banta  
Ngon ayahanda sinan sapat  
Oh lheueh makeuen poteu raja  
Putroe bawa puan leugat

Pajoh ranub dum geurata  
Malam jula jak eh leugat  
Putroe beudoh jak leueng tika  
Eh cut Banta peuet meusapat

Hingga beungoh uroe faja  
Dum sineuna beudoh leugat  
Mangat ate poteu raja  
Lawet gisa putik langsat

Han tom jarak meung sideupa  
Ban peuet banta neugaseh that  
Sabe-sabe indah rupa  
Sang seedara aneuk deelat

Soe nyang kalon ate suka  
Si Cut Banta rayek leugat  
Leumah pike poteu raja  
Bak bintara neukheun leugat

Dum pahlawan taseuranta  
Jinoe sigra bek le lambat  
Ban jideungo sabda raja  
Bintara beudoh le leugat

Jeuep-jeuep nanggroe jibri haba  
Jiseuranta timu barat  
Dum pahlawan jiyue teuka  
Suroh raja syah beudeelat

Padum na treb teuma dudoe  
Dum sinaroe troh beurangkat  
Dum pahlawan keunan sampoe  
Jeuep-jeuep nanggroe ka meusapat

Jihadap le raja nanggroe  
Angkat jaroe ban nyang adat  
Deelat ampon payong nanggroe  
Lon ka sampoe peue na pakat

Peue na hajat neuhei kamoe  
Peugah jinoe wahe deelat  
Turon sabda raja nanggroe  
Deungo jinoe lon riwayat

Nyang lon pangge gata keunoe  
Ulonteu nyoe raya hajat  
Si Cut Banta aneuk kamoe  
Tapeurunoe meuen silat

Meunan sabda raja nanggroe  
Dum sinaroe seuot leugat  
Insya Allah tuanku droe  
Lon peusampoe teubiet leugat

Lheueh nibak nyan teuma dudoe  
Po samlakoe teubiet leugat  
Bandum teubiet u geulanggang  
U teungoh blang saboh teumpat

Ateueh guda ka jipasang  
Taloë keukang mat le leugat  
Ban peuet banta ka jimeucang  
Jimeuwayang meuen silat

Keudeh keunoe: muwoe ulang  
Sang seulayang angen get that  
Ngon peudeueng taeu jisanang  
Meutang kumang di blang barat

Ureueng keumalon dong meureuntang  
Mata u blang bandum rakyat  
Jimeurunoe meuen dayang  
Silat padang meuen tungkat

Guda jiplueng meuyub manyang  
Jisanang peudeueng raya that  
Di ateueh rueng banta seudang  
Jimeucang jilumpat-lumpat

Soe nyang kalon ate bimbang  
Tahe mandang dum na rakyat  
Jimeutaktham deungong peudeueng  
Bandum ureueng galak jithat

Hana keunong sinyak meugleueng  
Miseue udeueng oh jilumpat  
Oh jibeuo t langkah sikureueng  
Leumah peudeueng meuble kilat

Bandum ureueng jimeukheun-kheun  
Hana soe theun aneuk deelat  
Ka utoh that banta peuet droe  
Dum sinaroe jeuet le siat

Mangat ate raja nanggroe  
Cut samlakoe neugaseh that  
Neueu aneuk sangat ragoe  
Buka peutoe teuma leugat

Raja cok meuh siploh katoe  
Laen bagoe jeuneh alat  
Keu pahlawan neupeujaroe  
Upah peurunoe meuen silat

Galak ate raja nanggroe  
Hadiah nyoe neubri leugat  
Jisambot le pantah han soe  
Beudoh jiwoe galak jih that

Teutap raja di meuligoe  
Ngon aneuk droe peuet meusapat  
Saboh haba seungab oh noe  
Payah kamoe bak seumurat

Sang han mangat le lagee nyoe  
Bah le jinoe balek ayat  
Beungoh-beungoh puta taloe  
Oh cot uroe tateumarah

Ammabakdu kuweut jaroe  
Malam sampoe poh dua blaih  
Meuwoe kisah keu samlakoe  
Tango adoe ulon peugah

Dua blah thon umu sampoe  
Tan sidroe bulee reubah  
Sang saboh ma meunankeu proe  
Banta peuet droe saban ceudah

Kulet puteh jeuet talhoh droe  
Miseue uroe teungoh beukah  
Diyub langet atueh bumoe  
Han tom meunoe taeu ceudah

Hana nyang sa barangkasoe  
Padok uroe cahya teuplah  
Rupa saban banta peuet droe  
Sang-sang bagoe sidroe ayah

Poteu raja lon hareutoe  
Tango jinoe ulon peugah  
Suroh raja ubak meuntroe  
Sinaroe rakyat neuyue krah

Tayue jitron keunan leugat  
Timu barat tayue peukrah  
Hingga teuma haba nyang rab  
Bandum rakyat ka troh langkah

Baroh tunong timu barat  
Ka meusapat dum bahrullah  
Mideuen peunoh blangpih sarat  
Le that rakyat han ek peugah

Hadap raja dum sinaroe  
Wazi meuntroe beuot kupiah  
Ampon deelat tuanku droe  
Keu peue kamoe dum neuyue krah

Peue meukeusud neuhei kamoe  
Neukheun jinoe hai deelat syah  
Siri nanggroe neukeumeung prang  
Uleebalang habeh neukrah

Meunan seumbah dum sibarang  
Bah lon reupang pha jih siblah  
Deelat peugah laju rijang  
Sulotan neuseuot pantah

Hana nanggroe ulon yue prang  
Tan meusugang dum blah bicah  
Nyang lon pangge dum sibarang  
Uleebalang keunoe lon krah

Lon meunapsu dua bagoe  
Tango jinoe ulon peugah  
Peutama phon hajat kamoe  
Saboh meuligoe ta Iseulam

Lon keumeung bri keu samlakoe  
Peugot jinoe laju bagah  
Beucukop ngon bale pudoe  
Sinaroe deungon peukakah

Nyang keu dua tango jinoe  
Napsu kamoe boh khalifah  
Raja laen lon boh jinoe  
Aneuk kamoe banta indah

Meunan sabda raja deelat  
Seuot rakyat insya Allah  
Ban nyang titah meukuta deelat  
Lon peusiap hai khalifah

Hingga teuma haba nyang rab  
Beudoh rakyat dum meukeumah  
Teungoh u gle dum meuree-ree  
Jak koh kayee laju geuploh

Maseng tukang ka meuteuntee  
Hana lagee sunggoh leupah  
Geukeurija seupot beungoh  
Nyang ladom goh ladom tarah

Peue-peue nyang jeuet po boh sunggoh  
Hana piyoh reuoh reuah  
Limong uroe didalam gle  
Kakeu hase papeuen geuplah

Hingga teuma geupuwoe le  
Hana lale pubuet bagah  
Habeh kayee rakyat gisa  
Dalam kuta bak khalifah

Dum na tukang meuribee laksia  
Ka jirungka laju pantah  
Hana panyang lon calitra  
Oh mumada ulon kisah

Nyang meukeusud lon boh sahja  
Lompih hana bak naseukkah  
Hana jeuet bak ulon surat  
Akai gaduh ulon susah

Peue cit meung roe bek tatuoh  
Teugantoh lon takot reubah  
Bak siploh-ploh lon boh saboh  
Meung bek gaduh bak peuneugrah

Soe nyang deungo bek meureuoh  
Ka gaduh ka putoh kisah  
Nyankeu sabab lon kheun bacut  
Nyang meukeusuh ulon peugah

Padum lawet teuma dudoe  
Meuligoe ka hase sudah  
Jipeudong meujandreng toe-toe  
Ngon meuligoe di khalifah

Rupa jroh that hana bagoe  
Tan lam nanggroe meunan ulah  
Hana panyang lon hareutoe  
Ka seuleusoe meuligoe indah

Cukup leungkap sikalian  
Jinoe tukang ulon peugah  
Oh lheueh hase dum sibarang  
Bak junjongan jijak peuseumbah

Oh sare troh dong meureuntang  
Angkat tangan bandua blah  
Deelat ampon payong nanggroe  
Dum sinaroe hase sudah

Ka hase kuta meuligoe  
Ban suroh nyoe bak deelat syah  
Raja deungo mangat ate  
Raja duli lom neupeugah

Meunyo meunan bandum gata  
Si Cut Banta taba pantah  
Disinan tatabai raja  
Bak astana nyang jroh indah

Lheueh nibak nyan raja nanggroe  
U meuligoe neuwoe bagah  
Neupeugah le bak aneuk droe  
Hai samlakoe tango ayah

Lon han ek le kumat nanggroe  
Lon meuduek droe meusyahadah  
Jinoe aneuk gata gantoe  
Bah samlakoe keu khalifah

Nyanpat kuta ngon meuligoe  
Nyanpat nanggroe tapeurintah  
Teuma seuot po samlakoe  
Beuot jaroe bandua blah

Ampon ayah du dikamoe  
Tango jinoe ulon peugah  
Bek hai ayah neuboh jinoe  
Ulon nyoe umu dibawah

Hana tuoh laba rugoe  
Jeuoh ngon toe hana leumah  
Meung na idin Tuhan sidroe  
Uroe dudoe hom hai ayah

Teuma seuot raja nanggroe  
Hai aneuk droe bek tabantah  
Raja peugah meudeh meunoe  
Ka neuiem droe nyak meutuah

Han le dawa bak samlakoe  
Takot dudoe teuma salah  
Neuhei wazi raja nanggroe  
Neukheun meunoe laju pantaih

Jinoe taba banta peuet droe  
Bak meuligoe rupa ceudah  
Ka lon pulang keu samlakoe  
Ban sinaroe ngon peukakah

Lom neubri deungon dendayang  
Kunangan ureueng nyang papah  
Ban peuet banta jiba rijang  
Rakyat sajan that bahrullah

Beudoh raja di beulakang  
Peutoe Sulaiman neucok bagah  
Meuligoe baro neubeujalan  
Troh datang duli khalifah

Akan aneuk neujok peutoe  
Sira meunoe ban neupeugah  
Wahe aneuk nyang samlakoe  
Nyoe peutoe wasiet amanah

Raja peugah dum sinaroe  
samlakoe ka hireuen dasyah  
Jinoe aneuk buka keudroe  
Laen han soe jeuet seuleuah

Asim bin Sifun meunan kheun proe  
Samlakoe gata nyang peuhah  
Saleh peue didalam asoe  
Hana kamoe kalon leumah

Ban neudeungo meunan bagah  
Samlakoe ate ka susah  
Badan han meuoh tutop han meukri  
Deungon kunci hana leumah

Po banta cut susah pike  
Meuraweh ate beulisah  
Bak masa nyan ka teupike  
Pane kunci ulon peuhah

Allah-allah ya Rabbi  
Gata gani sangat meugah  
Neupeleumah keu lon dali  
Aneuk kunci ngon lon peuhah

Banta susah hana sakri  
Tren Jibrai teuma jak seurah  
Wahe banta Saiful Muluk  
Pakon daok ate gundah

Kunci ka lheueh Sulaiman jok  
Yoh masa troh keudeh langkah  
Dalam jaroe ka lheueh masok  
Bek le daok ate susah

Ateueh peutoe cuba tumbak  
Bungong tajok bek le gundah  
Ngon sajan seubut Sulaiman  
Peutoe nyan tatumbak bagah

Jibrai neupeugah meunan  
Banta yoh nyan maken susah  
Hana hiro dum haba nyan  
Banta seudang tan meulintah

Jibrai lom peugah rijang  
Bungong karang maken gundah  
Ka troh lhee seun peugah sabé  
Teupike banta meutuah

Kadangpih nyo soe jak tukri  
Tiga kali geujak peugah  
Meunyo syaitan jen idadi  
Han jijak le sigo keumah

Meunyo meunan bah ulon ci  
Kadang jadi kheundak Allah  
Habeh pike banta seudang  
Neukheun rijang ngon Bismillah

Seureuta seubot ngon Sulaiman  
Peutoe nyan neutumbak pantah  
Ban neutumbak deungon tangan  
Kheundak Tuhan laju teuhah

Padum lawet peutoe keunan  
Bak uroe nyan ka neupeuhah  
Tahe rakyat dum pandangan  
Peutoe nyan ajaeb sileupah

Ija peuet krak lam peutoe nyan  
Neucok rijang banta indah  
Incien saboh mata intan  
Hana lawan rupa ceudah

Ate rindu banta seudang  
Neusok yoh nyan laju pantah  
Ija peuet krak dalam peutoe  
Keu rakan droe neubri bagah

Sikrak sapeue ngui u asoe  
Hana bagoe rupa ceudah  
Ban peuet banta neuseunalen  
Ban siseun tren saban ulah

Banta bacut nyang meulaen  
Puteh licen aneuk khalifah  
Sineuk euncien rupa canden  
Nyankeu laen bacut salah

Ngon cahya hu jiek jitren  
Hana bandeng ngon tapeugah  
Ban peuet banta saban canden  
Sang kon laen saboh ayah

Soe nyang kalon ate meusyen  
Puteh licen rupa ceudah  
Aneuk dara dum keureuleng  
Peukhem-khem tob-tob babah

Habeh jingui dum u asoe  
Han le uroe cahya tumpah  
Geupeudeuk bak batee pudoe  
Po samlakoe gantoe ayah

Kulah kama geupeuseun  
Jihei ampon dum kafilah  
Wazi meuntroe dong meususon  
Jiseuen jaroe dua blah

Lua dalam dum meuron-ron  
Jihei ampon boh khalifah  
Ka jihadap puteh sabon  
Bungong sukon gantoe ayah

Banta lhee droe boh keu wazi  
Said Juhari nyan nyang meugah  
Dum kafilah dong meuriti  
Junjong duli beuot kupiah

Ngon peurasan han tatukri  
Meuseudati Syeh Beuransah  
Tarek alam ngon pupanji  
Jipeunari ija mirah

Ngon surak na miseue zike  
Jihei sare boh khalifah  
Tot meuriam meukheulafe  
Jitot beude ngon keumurah

Tujoh uroe meunan sabe  
Sang prang kafe meunan ulah  
Lheueh geudeelat bintang timu  
Tuanku peutoe neupeuhah

Neubri salen teuma laju  
Ban nyang laku maseng ulah  
Dum na rakyat ate seu u  
Ka'a Ka'u han peue peugah

Jeuet keu dum nan saboh haba  
Hana gura panyangkisah  
Ragam laen **ulon** tuka  
Ngo seedara ban nyang mudah

Baroh Tidi **gampong** Gajah  
Paya Singkah meujen raya  
Amma bakdu leumiek meuntah  
Gampong arah toe cot ara

Saiful Muluk muwoe kisah  
Ngo lon peugah hai seedara  
Teutap banta mat peurintah  
Badai ayah mat neuraca

Hukum ade han peue peugah  
That meutuah hana nyang sa  
Geunap uroe bri seudeukah  
Tangan murah po jroh rupa

Rukon limong tan neukeubah  
Suroh Allah neukeurija  
Lawet keurajeuen po samlakoe  
Aman nanggroe hana nyang sa

Hukumpih kreuh hana bagoe  
Leubeh bak droe raja tuha  
Mangat ate ureueng nanggroe  
Lawet gantoe raja muda

Teutap keurajeuen po samlakoe  
Peuet boh nanggroe mat neuraca  
Umu peuet thon neumat nanggroe  
Tango adoe lon calitra

Grak teukeudi Tuhan Sidroe  
Samlakoe leumah rasia  
Nakeu watee teungoh malam  
Masa nyan Tuhan peunyata

Banta neueh teungeut pangsan  
Sidroe Tuhan bri rasia  
Suluih nyang akhe watee sunyoe  
Mureh uroe ka rab faja

Na nyum teuka sidroe putroe  
U meuligoe jiek lanja  
Rupa jroh that hana bagoe  
Lam donya nyoe hana ngon sa

Kulet puteh ban meuk uroe  
Kilat gigoe dum peurmata  
Tahe mandang po samlakoe  
Neungieng putroe ceudah rupa

Puleh hireuen deungon laloe  
Sinyak putroe geudrob geuwa  
Geuwa geucom hana bagoe  
Galak han soe banta muda

Jimeoseunda keudeh keunoe  
Cut sambinoe deungon banta  
Sang-sang neueh lam meuligoe  
Deungon putroe sapat dua

Lheueh nibak nyan teuma siat  
Beudoh leugat putroe muda  
Ija banta jicok leugat  
Putroe surat nibak ija

Nanggroe mupeue gampong mupat  
Jisurat bak ija banta  
Jisurat nan deungon nanggroe  
Jigamba droe saleuke rupa

Mangat neungieng le samlakoe  
Singoh uroe watee jaga  
Jicok gamba boh lam peutoe  
Putroe pasoe sajan ija

Lheueh jikeubah dalam peutoe  
Duek cut putroe sajan banta  
Tahe hireuen po samlakoe  
Neungieng putroe keubah gamba

Teuma jikheun haba meunoe  
Lon kujak woe po meukuta  
Tinggai teungku lam meuligoe  
Idin jinoe lon jak gisa

Lheueh jikheun nyan bak samlakoe  
Cut sambinoe han meuho ka  
Teuka suah po samlakoe  
Gadoh putroe dikeue muka

Ka neuraba keudeh keunoe  
Dalam lumpoe teupet mata  
Raba sabé barat timu  
Lam keulambu tiree rawa

Tan meuteumeung bungong meulu  
Teubiet laju troh u lua  
Jak raba u likot pinto  
Dara baro han meuho ka

Mita keunoe mita keudeh  
Lam-lam binteh neujak raba  
Neuriwang lom bak tika eh  
Cut puteh meuteumeung hana

Beudoh sinan bungong siron  
Jak kalon u miyub tika  
Ateueh geuta ka neuek lom  
Sret meuseumpon u bawah nya

Bukon sayang putik rambot  
Ka uroe tot habeh mala  
Mita putroe kalang kalot  
Dalam seupot meuraba-raba

Raba ukeue roh u likot  
That meupot-pot po jroh rupa  
Teupeh bantai deungan teuot  
Ka teukeujot banta muda

Duek teusimpon putik rambot  
Po bintang sret han le haba  
Ka teuringat po samlakoe  
Lon meulumpoe peue lon mita

Hingga beungoh puteh uroe  
Samlakoe peutoe neubuka  
Leumah neue gamba putroe  
Samlakoe reubah teuhanta

Reubah pangsan bungong geutoe  
Neueu putroe dalam gamba  
Sang han le roh meunankeu proe  
Meuloe-loe meunan teuhanta

Na sijamong teuma dudoe  
Po samlakoe puleh sigra  
Beudoh laju banta seudang  
Tajo rijang teugom gamba

Rupa jroh that sang buleuen trang  
Banta seudang pungo gila  
Banta muda ate bokbang  
Uleebalang neumoe rukha

Neucok laju ka neutatang  
Neujulang neucom neuwa  
Sira neumoe bungong sukcon  
Gamba neucomhana reuda

Neutatang neuhayon-hayon  
Neuukon neucom ngon neuwa  
Ngon sajan neukheun le panton  
Sira hayon com han reuda

Lheueh jikheun nyan bak samlakoe  
Cut sambinoe han meuho ka  
Teuka suah po samlakoe  
Gadoh putroe dikeue muka

Ka neuraba keudeh keunoe  
Dalam lumpoe teupet mata  
Raba sabé barat timu  
Lam keulambu tiree rawa

Tan meuteumeung bungong meulu  
Teubiet laju troh u lua  
Jak raba u likot pinto  
Dara baro han meuho ka

Mita keunoe mita keudeh  
Lam-lam binteh neujak raba  
Neuriwang lom bak tika eh  
Cut puteh meuteumeung hana

Beudoh sinan bungong siron  
Jak kalon u miyub tika  
Ateueh geuta ka neuek lom  
Sret meuseumpon u bawah nya

Bukon sayang putik rambot  
Ka uroe tot habeh mala  
Mita putroe kalang kalot  
Dalam seupot meuraba-raba

Raba ukeue roh u likot  
That meupot-pot po jroh rupa  
Teupeh bantai deungon teuot  
Ka teukeujot banta muda

Duek teusimpon putik rambot  
Po bintang sret han le haba  
Ka teuringat po samlakoe  
Lon meulumpoe peue lon mita

Hingga beungoh puteh uroe  
Samlakoe peutoe neubuka  
Leumah neue gamba putroe  
Samlakoe reubah teuhanta

Reubah pangsan bungong geutoe  
Neueu putroe dalam gamba  
Sang han le roh meunankeu proe  
Meuloe-loe meunan teuhanta

Na sijamong teuma dudoe  
Po samlakoe puleh sigra  
Beudoh laju banta seudang  
Tajo rijang teugom gamba

Rupa jroh that sang buleuen trang  
Banta seudang pungo gila  
Banta muda ate bokbang  
Uleebalang neumoe rukha

Neucok laju ka neutatang  
Neujulang neucom neuwa  
Sira neumoe bungong sukcon  
Gamba neucom hana reuda

Neutatang neuhayon-hayon  
Neuukon neucom ngon neuwa  
Ngon sajan neukheun le panton  
Sira hayon com han reuda

Wahe putroe cut meuayon  
Bak sitahon di kuala  
Pakon putroe bagah tatron  
Takeubah lon tajak gata

E hai putroe bungong sukon  
Angen hayon habeh mala  
Habeh buleuen meugantoe thon  
Gata dilon kujak mita

Bineh pasi timoh aron  
Meususon dimieng kuala  
Saleh nanggroe dilon apon  
Kujak dilon seutot gata

Bukon sayang bungong teusok  
Didalam ok bee meubura  
Bukan sayang Saiful Muluk  
Cit lam daok neumoe rukha

Bukon sayang bungong panjoe  
Geunap uroe angen tampa  
Bukon sayang po samlakoe  
Neupoh-poh droe hana reuda

Han le neuthee malam uroe  
Ingat putroe ate luka  
Hana neutron le meung oh yub  
Po banta cut susah raya

Muka pucat badan pijuet  
Bu dalam pruet sineuk hana  
Uroe malam han le teungeut  
Teupet teubleuet moe han reuda

Bleut han jaga eh han teungeut  
Badan krot kreuet ate luka  
Badan aoh laju pijuet  
Sayang nyak cut banta muda

Teueh linteueng cut Budiman  
Jagapih han teungeut hana  
Uroe malam sabe meunan  
Lem banta ngon po jroh rupa

Tan neutupeue uroe malam  
Sikeujab han jitem jaga  
Bukon sayang matauroe  
Reudok tampoe han le cahya

Bukon sayang cut samlakoe  
Ingat lumpoe ro ie mata  
Nyang hana bu ka peuet uroe  
Samlakoe susah lageena

Dendayang dum lam meuligoe  
Habeh wawoe tuha muda  
Han jeuet jarak meung siuroe  
Po samlakoe jiduek lingka

Hana jieh malam uroe  
Ceupet asoe banta muda  
Teutap susah po samlakoe  
Laen adoe lon calitra

Sungoe raya Neubok Punti  
Nanggroe Idi taseumuga  
Ammabakdu Blang Sikunci  
Bineh pasi toe kuala

Muwoe kisah Said Syamsi  
Nyankeu wazi banta muda  
Kunan Syamsyi Kunan Syahri  
Said Juhari nyan nyang tuha

Susah jih that hana sakri  
Lhee droe wazi susah raya  
Yoh nyan Said ka jirawi  
Ubak Syamsi banta muda

Wahe adek jinoe pakri  
Lon eu duli hana jaga  
Saleh raja susah ate  
Hana tom le tron u lua

Nibak gata pakri pike  
Cuba lahe hai seedara  
Banta dua seuot meunoe  
Bak kamoe hana bicara

Ban nyang pike gata sidroe  
Nibak kamoe hana dawa  
Teuma Said marit meunoe  
Tango kamoe hai seedara

Bah lon tamong dilee sidroe  
Gata adoe dong dilua  
Tinggai gata dilee sinoe  
Bah le kamoe jak peunyata

Said tamong laju sidroe  
Bak samlakoe raja muda  
Said kalon po samlakoe  
Teueh sidroe mumet hana

Peurab laju jijak peugoe  
Com bak jaroe po cut banta  
Ampon deelat po dikamoe  
Pakon méunoe hai meukuta

Nyang ka han tom lon eu meunoe  
Pakon nyang nyoe han le haba  
Peuekeu sabab tuanku droe  
Peue saket roe po meukuta

Deelat peugah ubak kamoe  
Ubat jinoe lon jak mita  
Dua lhee seun beuot jaroe  
Po samlakoe hana haba

Said jimat nibak teuot  
Jiurot sampoe u dada  
Bek antara na neuseuot  
Han meung neubeuot bulee mata

Yoh nyan Said that meupot-pot  
.Jisurot teubiet u lua  
Jicok peudeueng jisuet laju  
Bak tuangku tamong lanja

Dalam lumueng jieh sulu  
Kheun bak teungku banta muda  
Deelat ampon hai tuangku  
Habeh umu lon lam donya

Pakon deelat hai neumeusu  
Han mee neueu lon meukuta  
Lon uroe nyoe habeh umu  
Hai tuanku ka troh masa

Habeh langkah ngon raseuki  
Hai ya Rabbi ajai teuka  
Lon kupoh droe wahe duli  
Tanol wazi po meukuta

Said jieh dalam leumueng  
Bungong yueng-yueng han cit jaga  
Said mat le peudeueng bak rueng  
Boh bak rukueng jipet mata

Meunyo deelat lon han neutueng  
Lon koh rukueng jinoe sigra  
Oh ka mate lon seulinteueng  
Mayet lam krueng neutiek sigra

Banta deungo meunan jikheun  
Teujeunun muda bahlia  
Neubeudoh le mameueng-mameueng  
Teuma neukheun meunoe haba

Hai adek cut po samlakoe  
Bek tapoh droe hai seedara  
Wahe Said hek tapoh droe  
Ulonteu nyoe susah teuka

Hana salah gata adoe  
Lon sidroe leumah rasia  
Tango adek lon hareutoe  
Dum sinaroe ubak gata

Lon hai Said nyang jeuet meunoe  
Ate wawoe susah raya  
Beuklam adek leumah lumpoe  
Tuhan sidroe bri rasia

Na nyum teuka sidroe putroe  
Lam meuligoe jiek sigra  
Jimeuseunda meudeh meunoe  
Deungon kamoe peugah haba

Lheueh nibak nyan putroe jiwoe  
Beungoh uroe ulon jaga  
Ban teukeujot bak meulumpoe  
Lon eu putroe han meuho ka

Lon eu hana lam meuligoe  
Lon poh-poh droe lagee raya  
Ulon susah hana bagoe  
Sabab putroe han meuho ka

Bukon wayang nyang lon lumpoe  
Jak eu keudroe hai seedara  
Cuba adek buka peutoe  
Sinan putroe taeu rupa

Meunan neukheun po samlakoe  
Yoh nyan peutoe Said buka  
Leumah jieu gamba putroe  
Said wawoe meugeugisa

Said reubah ka teupipoe  
Meuloe-loe sinan teuhanta  
Han jeuet jingieng mata sipu  
Putroe meulu ceudah rupa

Kulet puteh ban keululu  
Ban panyot hu tujoh mata  
Yoh nyan Said reubah laju  
Mata sipu jingieng rupa

Dum dendayang habeh karu  
Ka jisibu minyeuk ata  
Said puleh beudoh laju  
Duek rab teungku banta muda

Hana sapeue jeuet jipeugah  
Ate dasyah ingat gamba  
Dalam ate Said meugah  
Ka meulintaih meunoe kira

Patot keu bit raja susah  
Putroe ceudah silageena  
Yoh nyan Said ate hireuen  
Lom banta kheun panton neuba

Takueh tanoh tambak keu lon  
Rambideuen jikumpui sutra  
Wahe Said tango lon kheun  
Bek that hireuen tangieng gamba

Teungoh u gle koh beuraleuen  
Cicem hujeuen po lam hawa  
Meuhan meuteumeung putroe buleuen  
Hareuem mideuen han lon gisa

Bah le mate rimueng makeuen  
Jeuep-jeuep huteuen lon jak mita  
Bak seurapet bulat-bulat  
Meuneukat rugoe ngon laba

Meuhan meuteumeung pirak lipat  
hareuem teumpat han lon gisa  
Meunyo mantong neubri hayat  
Barangkapat lon jak mita

Meunan banta neukheun teupat  
Said leugat jaweueb haba  
Tuanku preh dilee siat  
Lon beuet surat nibak ija

Meunoe haba dalam surat  
Tango sahbat lon calitra  
Teungoh u gle koh beurahoi  
Uram keu toi ujung keu bara

Nama putroe Badi Jamaloi  
Aneuk kaoi Muluk Cahya  
Lam ceumara saboh cumboi  
Lam seulanggoi ok meutia

Nyankeu nama lon tuanku  
Peurami Ratu nama bunda  
Neujak cok lon jinoe laju  
Lon tuanku judo gata

Nan Bumi Tarum nama nanggroe  
Lon cut putroe aneuk raja  
Nyang saboh treuk nanggroe bombai  
Nyang lhee nanggroe nama cahya

Nanggroe nyang peuet ngo lon peugah  
Nanggroe indah Idan Gamba  
Muluk Cahya nama ayah  
Keurajeuen luah hana tara

Nyan tuanku ka lon peugah  
Teumpat ayah du lon raja  
Lon tuanku judoneu sah  
Beudoh langkah Idan Gamba

Neujak cok lon jinoe bagah  
Neumeung- langkah hai meukuta  
Meunyo sayang bunda ayah  
Putroe ceudah meuhat gob ba

Sibeuna buet ulon peugah  
Bek jeuet teulah akhe masa  
Meunan haba dalam surat  
Said lihat sret ie mata

Teuma ija Said lipat  
Keubah leugat sajan gamba  
Said susah hana bagoe  
Ingar putroe pat jimita

Tan le geutron di meuligoe  
Ban dua droe deungon raja  
Teutap haba siat oh noe  
Sabe lam moe aneuk raja

Ayat laen lon boh jinoe  
Siat sapeue ulon tuka  
Bukon sayang bongong jeumpa  
Lam ceumara layee keudroe

Ammabakdu pura-pura  
Kon lon saja roh bak jaroe  
Muwoe kisah banta muda  
Susah raya hana bagoe

Jieu Said deungon raja  
Hana jaga ban dua droe  
Kunan Syamsi tanyong haba  
Toh bicara wahe adoe

Lon Said deungon banta  
Ka teuhanta bandua droe  
Seuot Syahri meunoe haba  
Tajak gata u meuligoe

Tajak peugah bak meukuta  
Raja muda ka meupaloe  
Keumah pakat ureueng dua  
Geujak lanja u meuligoe

Jihadap le raja tuha  
Di jeumala jibeuot jaroe  
Deelat ampon po meukuta  
Raja muda ka meupaloe

Deungon Said sinan dua  
Hana jaga ka peuet uroe  
Neupoh-poh droe hana reuda  
Nadak raya po samlakoe

Oh lon meuhei tan suara  
Hai meukuta pakri jinoe  
Meunan seumbah ureueng dua  
Poteu raja meuhei putroe

Sinyak saket nadak raya  
Hana reuda jipoh-poh droe  
Meunan neukheun le meukuta  
Beudoh sigra tuan putroe

That meularat kon sigeutu  
Nyang hana bu ka peuet uroe  
Poteu raja lheueh neupeugah  
Cok kupiah mat u jaroe

Tuan , putroe beudoh bagah  
Neujak pantah bak samlakoe  
Ngon dendayang na limong blah  
Neujak pantah ka troh sampoe

U meuligoe neuek sigra  
Bungkoh sutra sret bak jaroe  
Bungkoh ka sret bak seulasa  
Han neukira tuan putroe

U dalam neutamong lanja  
Bak aneukda ka neupeutoe  
Neumueng ulee si Cut Banta  
Bak dada neupuba jaroe

Ka neugusuek bak-bak muka  
Hana reuda com samlakoe  
Ka neubae putroe muda  
Neueu banta ka meuloe-loe

Allah-Allah bijeh matai  
E aneukda pakon meunoe  
Sabab saket peue kareuna  
Peugah bak ma po samlakoe

E hai aneuk bungong mancang  
Boh ate nang maen kamoe  
Peuekeu saket bungong keumang  
Peugah bak nang laju jinoe

Wahe aneuk banta seudang  
Uleebalang tanglong nanggroe  
Pakon aneuk tahe mandang  
Ate leukang mateu putroe

E hai aneuk putik rambot  
Beungoh seupot ma seumanoe  
Poma tanyong han taseuot  
Hai aneuk cut peue taiem droe

Bukon sayang aneuk got-got  
Puyoh meulot atueh taloe  
Pakon meunan hai bintang srot  
Han taseuot hai samlakoe

Oh lon tanyong han taseuot  
Putik rambot cit taiem droe  
E hai aneuk tangke ate  
Nyum sang mate mateu putroe

Peugah aneuk bek taiem le  
Kadang mate ngon sabab nyoe  
Lon hai aneuk reuloh ate  
Sang ka page nyan donya nyoe

Aneuk tiyong di cong tampu  
Leuek jikutru dicong panjoe  
Putroe tanyong laju-laju  
Tan neumeusu po samlakoe

Susah ate bintang timu  
Sangat tunu ingat lumpoe  
Bunda kalon tan neumeusu  
Tanyong laju le ayah droe

Neutanyong le poteu raja  
E bintara aneuk kamoe  
Peugah aneuk laju sigra  
Lon yue mita ubat jinoe

Dua lhee seun tanyong raja  
Baro jaga po samlakoe  
Deungon Said sigo jaga  
Ngon ia mata dum teupipoe

Oh ban sare teubleut mata  
Ayah bunda jingieng neumoe  
Seuot laju po bintara  
Ngo ayahanda lon hareutoe

Ate peudeh dum geuleupah  
Ceuret muntah ka peuet uroe  
Nyankeu saket lon hai ayah  
Reuoh reuah malam uroe

Ban raja ngo banta peugah  
Teuka susah hana bagoe  
Ubak wazi neukheun leugat  
Tapeusapat nujum keunoe

Meunan sabda nibak deelat  
Beudoh leugat tuan meuntroe  
Jikrah nujum jipeusapat  
Timu barat jeuoh ngon toe

Han padum treb teuma lambat  
Ubak deelat nujum sampoe  
Poteu raja peugah leugat  
Neuriwayat buet samlakoe

Aneuk ulon that meularat  
Kalon ubat siat jinoe  
Meunyo ek na mantong ubat  
Neupeugah pat ubak kamoe

Meunan sabda nibak deelat  
Buka kitab dum sinaroe  
Jeuep-jeuep bintang jipeusapat  
Jitakat jeuoh deungon toe

Habeh jitimu barat  
Jisasat rata jeuep sagoe  
Dum ka lahe dalam kitab  
Hana ubat lam donya nyoe

Hana saket pane ubat  
Habeh jeuep bab jieu sampie  
Nyang na meuteumeung lam pirasat  
Aneuk deelat jimeulumpoe

Habeh nyata jeuoh ngon rab  
Geutob kitab angkat jaroe  
Deelat ampon hai tuanku  
Mantong umu po samlakoe

Hana saket meung sigeutu  
Gob nyan rindu susah keudroe  
Sabab han ek neupajoh bu  
Ate tunu ingat lumpoe

Nyankeu sabab puteh licen  
Hana laen tuanku droe  
Nujum peugah lahe baten  
Ate ngeuren po samlakoe

Poteu raja yoh nyan neutron  
Said canden neuhei sidroe  
Said beudoh pantah sigra  
Poteu raja mat bak jaroe

Dalam bilek laju neuba  
Neupareksa buet samlakoe  
Wahe Said tacalitra  
Pakon duka banta sidroe

Geutanyong thee keu hai banta  
Peugah sigra ubak kamoe  
Seuot Said teuma sigra  
Dum peukara jihareutoe

Hana saket po meukuta  
Raja muda leumah lumpoe  
Sidroe putroe aneuk raja  
Na nyum teuka lam meuligoe

Dalam peutoe saboh gamba  
Saleuek rupa sinyak putroe  
Meusurat nan nibak ija  
Geucalitra gampong nanggroe

Ayah putroe Muluk Cahya  
Bangsa Indra tuanku droe  
Mat keurajeuen 'Idan Gamba  
Nanggroe cahya nanggroe bumboe

Lom Bustarom po meukuta  
Gob raja peuet boh nanggroe  
Badi' Jamaloi geurasi nan  
Po junjongan nama putroe

Hana nyang sa ngon putroe nyan  
Lon eu sinan gamba putroe  
Putroe laen hana meunan  
Leubeh that nyan tuanku droe

Oh takalon rupa gob nyan  
Ek bantangan barangkasoe  
Nyankeu saket po junjongan  
Rindu gob nyan keu cut putroe

Ban raja ngo Said peugah  
Teuka susah hana bagoe  
U meuligoe neukek pantah  
Ka neupeugah bak samlakoe

Wahe aneuk nyang meutuah  
Pakon ayah tapeuwawoe  
Pakon tasom han tapeugah  
Gata susah e samlakoe

Bak ate lon bit-bit saket  
Lon eu tapet malam uroe  
Seuum asoe muntah ceuret  
Babah teuphet bu hana toe

Pakon aneuk tameusulet  
Gata saket tameulumpoe  
Jinoe aneuk bek that ngeuren  
Puteh licen tango kamoe

Wahe aneuk bintang canden  
Hai teungku ben nyang samlakoe  
Meunyo aneuk tameukawen  
Jinoe laen kubri putroe

Bek meugalak keu putroe jen  
Kubri laen jinoe gantoe  
Rupa that jroh puteh licen  
Leubeh canden bak talumpoe

Gata aneuk sangat lon chen  
Lon peukawen po samlakoe  
Jinoe aneuk lon bri laen  
Bek le ngeuren nyang talumpoe

Lon bri laen putroe ceudah  
Bek that susah hai aneuk droe  
Cuba jak eu nyak meutuah  
Tameulangkah dalam nanggroe

Ri nyang galak lon peunikah  
Toh nyang ceudah bak ate droe  
Aneuk raja meugah-meugah  
Ka lon keubah sireutoh droe

Bandum jroh-jroh ceudah-ceudah  
Lon peunikah ngon samlakoe  
Han jan habeh raja peugah  
Seuot pantah bungong geutoe

Neudeungo lon wahe ayah  
Bek neupeugah laen putroe  
Putroe insan beuthat ceudah  
Han hai ayah laen putroe

Lam nanggroe han lon meukawen  
Bah putroe jen nyang lon lumpoe  
Bah siribee neubri laen  
Lon han kutem barangkasoe

Bah le dilon jeuet putroe jen  
Ate ngeuren malam uroe  
Nyang lon lumpoe teuringat sabé  
Meung goh mate nyawong sampe

Bah le lon jak mita ugle  
Han lon woe le meutan putroe  
Meunan neukheun bungong pade  
Susah ate raja nanggroe

Neuseuot lom poteu raja  
E bintara tango kamoe  
Lon meutanggoh sikleb mata  
Lon bicara peurintah nyoe

Meunan narit poteu raja  
Si Cut Banta ka neuiem droe  
Raja peugah bak bintara  
Dum nanghuda tahei keunoe

Tayue jitron keunoe sigra  
Taseuranta jeuep-jeuep nanggroe  
Sabdapi lheueh bak khalifah  
Beudoh pantah teungku meuntroe

Dumji rakan laju jikrah  
Ka jipeugah jeuep-jeuep nanggroe  
Oh noe saboh habeh kisah  
Kalam patah lon di jaroe

Malam jula poh dua blah  
Lon reubah teungeut teupipoe  
Beungoh uroe beudoh pantah  
Cok keureutah mat u jaroe

Lon cok kalam jak lon keubah  
Lon meung kisah haba bunoe  
Kupi hitam jeb saboh glah  
Teubleut pantah mangat asoe

Nyang pip rukok han lon peugah  
Sang beurakah le that rampoe  
Keu juragan muwoe kisah  
Raja yue krah bak po meuntroe

Hingga teuma ka troh langkah  
Bak khalifah keunan sampie  
Nanggroe Meuse nanggroe ceudah  
Nanggroe Kufah dum sinaroe

Lua dalam peunoh limpah  
That bahrullah meuploh katoe  
Jidong diyub peuek seumah  
Dua blah jibeut jaroe

Deelat ampon sialam syah  
Keu peue neukrah bandum kamoe  
Pat peuraho nyang ka beukah  
Toh ka bicah kapai beusoe

Ubak kamoe deelat peugah  
Nak lon jak plah kayee jatoe  
Poteu raja seuot pantah  
Ngo lon peugah dum sinaroe

Lon meutanyong ubak gata  
Saboh raja that: seureuloe  
Nama geuhe Muluk Cahya  
Meugah Raya hana bagoe

Biek raja jen bangsa Indra  
Pat nanghuda tahareutoe  
Mat keurajeuen 'Idan Gamba  
Cahya nanggroe Bumboi

Lom Bustarom nanggroe raya  
Gob nyan raja peuet boh nanggroe  
Pat nanggroe nyan hai nanghuda  
Peugah sigra ubak kamoe

Saboh putroe aneuk raja  
Hana nyang sa lam donya nyoe  
Nyang jilumpoe uleh banta  
Hai nanghuda peugah jinoe

Oh na jeuoh peugah sigra  
Nak tabungka keunan jinoe  
Ban jideungo meunan sabda  
Dum nanghuda teukab jaroe

Tan jiseuot sikrak haba  
Tuha muda ka jjiem droe  
Lom neutanyong uleh raja  
Pat nanghuda teumpat putroe

Neutanyong lom uleh deelat  
Tapeugah pat laju jinoe  
Dumji rakan susah jih that  
Han jitupat nanggroe putroe

Teuma seuot sidroe juragan  
Ulee kawan jih nyan sidroe  
Ampon deelat patik laman  
Ngo junjongan ulonteu nyoe

Han soe tupat hai sulotan  
Han tom keunan meujak kamoe  
Han tom lon ngo gob peuhaba  
Ulon bungka jeuep-jeuep nanggroe

Bitpi meunan po meukuta  
Neubicara nibak lon nyoe  
Nanggroe Cina tajak bungka  
Tapareksa sinan putroe

Di Cina ladom nanghuda  
Jeuoh bungka nibak kamoe  
Jirakan meunan meuhaba  
Poteu raja ka neuiem droe

Susah neuthat hana tara  
Teuma banta seuot meunoe  
Neubri idin hai ayahanda  
Kheundak bungka ulon jinoe

Nanggroe Cina ulon bungka  
Lon jak mita nyang lon lumpoe  
Meunan seumah Si Cut Banta  
Poteu raja seuot meunoe

Tadeungo lon bijeh mata  
Bek tabungka po samlakoe  
Putroe hai nyak lon jak mita  
Lon pareksa jeuep-jeuep nanggroe

Tinggai gata sinoe raja  
Ulon bungka mita putroe  
Meunan neukheun uleh banta  
Banta muda seuot meunoe

Hana patot hai ayahanda  
Droe nyan mita lon meulumpoe  
Bah le ayah droe lon mita  
Tinggai ayahanda droe nyan sinoe

Teuboh nanggroe deungon kuta  
Haro hara aneuk nanggroe  
Tinggai ayah sinoe raja  
Bah lon bungka jinoe keudroe

Meunan narit banta muda  
Poteu raja seuot meunoe  
Meunyo aneuk gata bungka  
Bijeh mata tango kamoe

Lon meutanggoh siklep mata  
Kapai raja goh seuleusoe  
Raja peugah bak nanghuda  
Peugot bahtera laju jinoe

Jak taili u kuala  
Tapeulingka kapai beusoe  
Juragan ngo sabda raja  
Dum nanghuda peukeumah droe

Jijak laju u kuala  
Tuha muda dum sinaroe  
Phon jipeugot kapai raya  
Bak duek raja nyang samlakoe

Nabiullah Nuh po hareuta  
Yoh masa tufeuен saboh roe  
Nyang na tinggai bruekji saja  
Laen hana dum sinaroe

Suroh raja yue peulingka  
Kapai raya nyang seureuloe  
Lapeh pirak ngon suasa  
Dilua geulapeh beusoe

Sidah Mabus geuboh nama  
Yoh masa dilee saboh roe  
Layeue ia meuh ban silingka  
Teumaga jiboh keumedoe

Tujoh boh jipeudong tihang  
Kapai prang banta samlakoe  
Oh hase nyan dum sibarang  
Kuangkang jipeugot dudoe

Peugot seumidok ngon beuncalang  
Dum sibarang ka seuleusoe  
Peudeueng beude ngon seunapang  
Ngon meuriam meuploh bagoe

Sare cukup beulanja prang  
Bandum tukang teuma jiwoe  
Jihadap le poteu raja  
Dum nanghuda jikheun meunoe

Deelat ampon po meukuta  
Ka leungka kapai sinaroe  
Nam ploh limong bak keunira  
Dum seumua ka seuleusoe

Ban raja ngo kheun nanghuda  
Bak bentara neukheun meunoe  
Takrah rakyat jinoe sigra  
Taseuranta jeuep-jeuep nanggroe

Tayue jime ngon seunjata  
Cokma khanja tungkat beusoe  
Sabdapi lheueh nibak raja  
Bintara jijak lam nanggroe

Jijak peugah bandum rata  
Suroh raja beutroh sampoe  
Han padum treb troh le rakyat  
Ka meusapat jeuoh ngon toe

Tunong baroh timu barat  
Meusapat lam kuta nanggroe  
Di jaroe rata dum alat  
Peudeueng tungkat cokma beusoe

Mideuen peunoh blangpi sarat  
Miseue lalat rakyat ka dhoe  
Wazi meuntroe junjong deelat  
Ban nyang adat reusam nanggroe

◎  
Ampon tuanku po meukuta  
Peue na sabda tuanku droe  
Nyang jeuet kamoe neuseuranta  
Siri raja nyang kreueh gigoe

Toh siri prang neuyue ngaza  
Meukuta neupeugah jinoe  
Turon sabda nibak raja  
Hai seedara tango kamoe

Nyang lon pangge keunoe gata  
Seumua panglima meuntroe  
Aneuk ulon jimeung bungka  
Jijak mita sinyak putroe

Nam ploh ribee rakyat taba  
Hai bintara pileh jinoe  
Takalon nyang teuga-teuga  
Nyang raja nyang guntoe-guntoe

Nyang ek me brat limong gunca  
Cok nyang teuga lam kawan nyoe  
Keu ngon aneuk lon bintara  
Jimeung bungka jeuep-jeuep nanggroe

Sabdapi lheueh nibak raja  
Po bintara seuot meunoe  
Insya Allah po meukuta  
Ban nyang sabda tuanku roe

Kamoe seutot ho nyang geuba  
Sajan banta nyang samlakoe  
Hingga teuma pileh sigra  
Nyang teuga-teuga dum sinaroe

Hana panyang lon calitra  
Bah lon tuka laen jinoe  
Siat-siat ayat lon tuka  
Mangat gura hikayat nyoe

Ragam bunoe lon peugisa  
Bek treb raya le nyang meunoe  
Gampong Calang rab ngon Buloh  
Meusaboh deungan Blang Kuala

Ammabakdu seun-seun saboh  
Deungo beujroh bek meutuka  
Muwoe kisah keu putroe jroh  
Lon meuteuoh ma po banta

Dalam ate neuthat reuloh  
Aneuk saboh jimeung bungka  
Oh roh aneuk cit nyan saboh  
Peue han reuloh dalam dada

Neuruet-ruet ok badan neupoh  
Srot meukuboh ngon ie mata  
Reuloh ate tuan putroe  
Bandua droe deungon raja

Oh teuringat keu samlakoe  
Cut putroe bukon that rukha  
Ate rusak tuan putroe  
Ban dua droe deungon raja

Neucok gunci mat u jaroe  
Ceuiet peutoe le neubuka  
Buka peutoe ceuiet beureukhang  
Teudong tumpang tujoh banja

Putroe cok seuluweue meujuhang  
Ngui ija plang kulah kama  
Putroe cok lom kreh meudulang  
Ngon ija plang kulah kama

Keu samlakoe putroe pulang  
Cut intan buka lom haba  
Wahe aneuk bungong peukan  
Ngui pakaian bijeh mata

Gantoe aneuk lon peukawen  
Puteh licen nyan hajat ma  
Gata aneuk sangat lon chen  
Ngui seunalen hai bintara

Mateu putroe ate ngeuren  
Puteh licen tameung bungka  
Uroe nyoe ka gata tatron  
Teungku Ben pajan tagisa

Ngui peukayan bintang canden  
Mateu meuchen that keu gata  
Sabab gata takeumeung tren  
Tangui salen po bintara

Banta deungo narit ma droe  
Samlakoe titek ie mata  
Banta ngui le dum sinaroe  
Dikeue ma droe po bintara

Euncien Sulaiman sok bak jaroe  
Mata pudoe hu meuahya  
Oh sare lheueh ngui u asoe  
Padum uroe han le cahya

Neutob ulee kayen hijo  
Tiek di baho mirak diwangga  
Soe nyang kalon tahe gante  
Bagoe linto lheueh boh gaca

Hana sapat na teuladan  
That analan hana tara  
Oh sare lheueh ngui peukayan  
Banta seudang seumbah poma

Banta neukheun teuma nyoe ban  
Ile sajan ngon ie mata  
Neuidin lon ma jeunulang  
Ulon tuan keumeung bungka

Meunan narit bungong peukan  
Cut bangsawan ro ie mata  
Kruseumangat kheun cut putroe  
Sira moe neucom aneukda

Sira neucom sira neumoe  
Neukheun meunoe po jroh rupa  
E hai aneuk po samlakoe  
Beutroh tawoe jak tanom ma

Bu phet kulet mangat asoe  
Samlakoe bumeubahgia  
Buphui langkah bungong geutoe  
Beutroh tawoe po bintara

Tajak aneuk bauselamat  
Beujeuoh laknat jarak mara  
Weueh that ate oh lon ingat  
Nyum sigo meuhat lon bupana

Lheueh meuteumeung banta seudang  
Ulee balang neutron sigra  
Deungon panton neukheun rijang  
That neusayang tinggai bunda

Ceumpala cut po meulinggang  
Cicem subang po meugisa  
Meuntuah tuboh meuteumeung riwang  
Meunyo malang tan meugisa

Teungoh ugle koh keutapang  
Awe sungsang boh bak dada  
Neuidin lon ma jeunulang  
Lon jeumeurang laot raya

Teungoh u gle koh beureuhei  
Uram keutoi ujung keu bara  
Beulon teumeung Badi 'Jamaloi  
Neumeukaoi wahe bunda

Jeuep aulia neumeukaoi  
Jamaloi beulon teumeung ba  
Awe lilen puta taloe  
Awe jatoe sok keuraga

Meunyo han lon teumeung putroe  
Hareuem nanggroe han lon gisa  
Han jan habeh kheun samlakoe  
Moe cut putroe lagee raya

Ka neubae neukheun meunoe  
Neupoh-poh droe tumbok dada  
Wahe aneuk po samlakoe  
Ho troh kamoe oh tan gata

Oh lon ingat ate seungkoe  
E samlakoe ka tabungka  
E hai aneuk tangke ate  
Han meusampe lon peulara

Oh lon ingat reuloh ate  
Bungong pade oh tan gata  
E hai aneuk uleebalang  
Banta seudang boh ate ma

Saleh uroe nyoe lheueh lon pandang  
E buleuen trang cahya mata  
Hai ya Allah po ku Tuhan  
Keubajikan neukaronya

Uroe nyoe cre aneuk badan  
Saleh pajan nyak tagisa  
Allah Allah ya Tuhanku  
Pakri laku kamoe hamba

Oh lon ingat ate tunu  
Bintang timu ka tabungka  
Allah Allah ya Allah  
Ban peurintah po lon gata

Mateu putroe ate bicah  
Nyang meutuah ka tabungka  
Bukon sayang buleuen peuet blah  
Han le leumah ka geurana

Ma deungon du ate susah  
E meutuah gata hana  
Adat meung na tanoh nyang crah  
Kulob bagah meunan rasa

Bukon sayang bungong keumbbee  
Meuhambo bee angen ba - ba  
Tuan putroe moe meuree-ree  
Antok ulee tumbok dada

Neuruet-ruet ok neuploh bajee  
Hana neuthee beungoh seunja  
Neumoe bae dalam juree  
Seudu ratee ma po banta

Dum deundayang lam meuligoe  
Jipoh-poh droe tango subra  
Bandum jimoe jipoh-poh droe  
Lam meuligoe haro hara

Nyang that rukha tuan putroe  
Malam uroe tumbok dada  
Oh teuringat keu samlakoe  
Moe cut putroe sang ka gila

Dileuen rumoh pula cuko  
Tob reumpah le jak meuupa  
Jeuetkeu dum nan haba bae  
Meunyo that le han le gura

Di Utue na cuko lipah  
Gampong gajah manok panyang pha  
Ureueng inong han peue peugah  
Dum jikisah kayee rimba

Adat mate aneuk mirah  
Taeu jiplah bajee ija  
Asam eungkot taboh ie kruet  
Asam daruet boh me tuha

Bek antara sidumnan buet  
Meung saket pruet geumoe rukha  
Nyankeu teungku ulon seubot  
Lon boh bacut canek haba

Aneuk got-got dicong jaloh  
Aneuk bakoh dicong ara  
Han ek le ulon meurawoh  
Bungkong keuboh teungeut mata

Aneuk bayam saboh reugam  
Boh mamplam na saboh raga  
Lon seumurat meujan-jan malam  
Mata reukam teungeut mata

Uroepi na wahe rakan  
Pajan-pajan na kuasa  
Adat silab teungku riwang  
Neuulang neukira-kira

Jeuet keu dum nan saboh karang  
Lon peuriwang lom bak nyang ka  
Gampong lada toe ngon Usi  
Paloh Tinggi toe Jong Rimba

Ammabakdu hai nyak binti  
Get that tari lon eu gata  
Muwoe kisah cut puteh di  
Aneuk duli raja raya

Oh lheueh seumah ma ngon abi  
Po juhari meuseumpeuna  
Ya Ilahi wa ya Rabbi  
Po ku neubri ban lon pinta

Bijeh lon tanom beu meunjadi  
Pucok neubri beu keulua  
Bek jeuet aeb deungon keuji  
Lon bek neubri malee mata

Bumeuteumeung bintang pari  
Beureukat abi deungon bunda  
Lheueh meuinsan po samlakoe  
Rahob jaroe ubak muka

Lheueh nibak nyan teuma dudoe  
Samlakoe beudoh le sigra  
Deungon rakyat dum sinaroe  
Wazi meuntroe dum sineuna

Bineh pasi rakyat ka dhoe  
Ka troh sampoe mieng kuala  
Ek lam sampan dum na rakyat  
Peunoh sarat sampan dum na

Geudayong le teuma leugat  
Geutakat bak kapai raya  
Rakyat rame ngon pahlawan  
Han tatuban le calitra

Cukup alat dum di badan  
Peukayan bajee meulila  
Bajee zirah keutupong beusoe  
Dijaroe peudeueng ngon khanja

Sang miseue geujak prang nanggroe  
Meunan bagoe rakyat geuba  
Kutika jroh ka cot uroe  
Po samlakoe laju bungka

Geubot saoh kapai beusoe  
Weng keumudoe buet nanghuda  
Peuhah layeue boh taloe klat  
Angen got that reumbang peusa

Tot meuriam deungon nubat  
Bungka leugat raja muda  
Beungoh-beungoh angen barat  
Seupot meuhat barat daya

Kapai jiplueng that teudhab-dhab  
Tajampi that miseue guda  
Ie di ulee ban bungong meulu  
Ie di iku meukipah Cina

Bandum rakyat ate seuu  
Bungka laju raja muda  
Dalam laot ka meutabu  
Ate seuu si Cut Banta

Ban jibeudoh nanggroe Meuse  
Puleh ate nibak luka  
Jipeh tambo jitot beude  
jisurak le dum lasyeuka

Dalam kapai jihei sare  
Meukheulafe layeue raya  
Dua buleuen cre di nanggroe  
Samlakoe teuringat keu ma

Meutamah lom ate seungkoe  
Neungieng putroe dalam gamba  
Teuka susah po samlakoe  
Malam uroe ro ie mata

Neumoe sabe cut meutuah  
Ate bicah ingat keu ma  
Allah-Allah ya Allah  
Lon pakri bah ya Rabbana

Oh lon ingat ate beukah  
Ma lon keubah di astana  
Allah hai ma ma jeunulang  
Lon jeumeurang laot raya

Oh lon ingat ate leukang  
Lon meuriwang malee mata  
Meunan neukheun banta seudang  
Ate bok bang raja muda

Said Juhari marit- rijang  
Bek le bimbang po meukuta  
Bek le susah tuanku droe  
Jeuoh nanggroe ka tabungka

Meunan Said neuhareutoe  
Po samlakoe seuot sigra  
Oh na Said ka geutanyoe  
Peugah jinoe lon ngo nyata

Seuot Said teuma laju  
Preh tuanku lon pareksa  
Lheueh neukheun nyan bungong meulu  
Beudoh laju tajam raya

Said jak le duek bak kurong  
Mat teurupong jilhoh donya  
Deuh jikalon ka deuh pusong  
Leumah ujung nanggroe Cina

Said keubah le teurupong  
Jijak kunjong banta muda  
Ampon meuah deelat payong  
Tuhan tulong han binasa

Leumah neueu ngon teurupong  
Ka deuh ujung nanggroe Cina  
Bek le susah deelat payong  
Lob lam kurong eh po banta

Jibeudoh le bungong tanjong  
Tob keulubong eh meukuta  
Kapai jiplueng that meulambong  
Teuntang ujung nanggroe Cina

Ngon riyeu meugulong-gulong  
Bungong tanjong ate lia  
Saiful Muluk tob keulubong  
Eh lam kurong kapai raya

Banta neueh ateueh kaso  
Meutajo lam bilek bahtra  
Ka teukeujot linto baro  
Bungong keundo beudoh sigra

Teuduek tahe bungong keumang  
Ulee mumang banta muda  
Kapai jiplueng miyub manyang  
Bungong keumang ate lia

Na peuet buleuen peulayaran  
Sampoe datang nanggroe Cina  
Geulhom saoh teuma rijang  
Geupasang deungon beundera

Ka meusapat dum sibarang  
Dong meureuntang di kuala  
Ate seunang bandum girang  
Ka jireugam tunom raya

Ka jitot le ngon meuriam  
Rasa nyum lham nanggroe Cina  
Ka jitot lom jira hitam  
Keunira alam sigom donya

Saiful Muluk ate ka seunang  
Teuduek oh nan dilee haba  
Teuduek on nan dilee kisah  
Nyoe lon peugah ureueng Cina

Tueng Peuria toe Gle Siblah  
U barat leupah gampong raya  
Ammabakdu geukoh ulee mbah  
Sinyak midah jicarot ma

Raja Cina ulon kisah  
Meusyehugah sigala donya  
Nama raja nyan Huang Tiah  
Kaya limpah hana nyang sa

Seumah patong uroe malam  
Nyankeu Tuhan dum jipujoe  
Beungoh seupot nyan jikhadam  
meuntroe bujang ngon bintara

Meuploh ribee ngon pahlawan  
Laen rakan han teukira  
Ban jideungo su meuriam  
Raja yoh nyan jimeusabda

Ubak wazi jikheun rijang  
Ili rakan u kuala  
Lon ngo beude ngon meuriam  
Uroe malam hana reuda

Han tom lon ngo meunan macam  
Pane kadang ureueng teuka  
Tajak tanyong wahe bujang  
Kadang lawan jak prang kuta

Meunyo jikheun peumusuhan  
Bah talawan di kuala  
Meunyo jikheun na peurasan  
Dalam peukan tayue jiba

Meunyo kapai ba meuneukat  
Lagee adat wase raja  
Tayue teungoh jih u darat  
Bek jimeukat dikuala

Meunyo kapai jak meureubot  
Preh dilao tapeuhaba  
Ili laju bek teumakot  
Yoh goh seupot jak pareksa

Oh lheueh titah bak sulotan  
Beudoh bujang jijak sigra  
Jijak laju pantah rijang  
Jime sajan peudeueng raya

Troh u pasi jibeujalan  
Deuh jipandang kapai that bha  
Jieu kapai peunoh laot  
Tihang seupot dum bak nangla

Bujang kalon nyum teumakot  
Bak teuot jipeugot geumpa  
Jiriwang le lom u likot  
Jisurot dua lhee deupa

Teuma bujang leumah pike  
Adat matepi kurila  
Jijak laju peukreuh ate  
Ka jiek le sampan raya

Ka jidayong pantah leugat  
Jikarat bak kapai raya  
Ubak kapai ka jirapat  
Jikheun leugat bak nanghuda

Ho ka gata wahe sahbat  
Talhom siat rinyeun bahtra  
Ulonteu nyoe na peue hajat  
Suroh deelat ubak gata

Meunan jikheun uleh meuntroe  
Rinyeun taloe jilhom sigra  
Jiek laju sidroe meuntroe  
Jitanyong soe le nanghuda

Ho tameujak wahe sahbat  
Peugah leugat lon ngo nyata  
Jipeugah le teuma leugat  
Lon hai sahbat suroh raja

Hajat jinoe jak meuhadap  
Taba siat ubak raja  
Ban jideungo kheun po meuntroe  
Mat bak jaroe le nanghuda

Jiba laju bak samlakoe  
Jihareutoe dum peukara  
Teuma marit po nyak meuntroe  
Angkat jaroe di jeumala

Deelat ampon tuanku droe  
Pane nanggroe keunoe teuka  
Peue meukeusud neujak keunoe  
Lam nanggroe nyoe peue neumita

Meunyo deelat neuprang nanggroe  
Neupreh sinoe di kuala  
Lon meutanggoh tujoh uroe  
Bah lon jak woe peukong kuta

Han jan habeh kheun po meuntroe  
Po samlakoe seuot sigra  
Kon hai sahbat lon prang nanggroe  
Peumeuen droe jak meusuka

Saiful Muluk nama kamoe  
Ulonteu nyoe aneuk raja  
Jeuoh gampong lon hai meuntroe  
Matauroe lon boh tanda

Nanggroe Meuse teumpat kamoe  
Meujak keunoe meudiwana  
Dalam laot lon jeumeurang  
Kon lon jak prang nanggroe gata

Jinoe sahbat tajak riwang  
Bak sultanan tapeuhaba  
Hajat ulon keumeung tamong  
Pakri keunong nibak gata

Cuba riwang tajak tanyong  
Jeuet lon tamong sikleb mata  
Meunyo han jeuet bah lon jak woe  
U nanggroe teumpat lon raja

Meunan sabda po samlakoe  
Bujang Jiwoe pantah sigra  
Dalam sampan ka troh siat  
Riwang leugat woe bak raja

Han padum treb teuma lambat  
U darat ka troh jihala  
Dalam kuta jipeuteupat  
Troph bak deelat raja Cina

Dua jaroe le jiangkat  
Ka jideelat poteu raja  
Deelat ampon tuanku boh  
Bukon musoh keunoe teuka

Saboh raja nanggroe jeuoh  
Keunoe ka troh bak meukuta  
Saiful Muluk nama geuboh  
Hu seumeulhoh ban meutia

Kulet badan sang meuh seupoh  
Tuanku boh hana ngon sa  
Mat keurajéuen nanggroe Meuse  
Hana sabe luah banda

Jak meuen peuseunang ate  
Meunan duli geupeuhaba  
Ubak deelat keumeung tanyong  
Geuyue tanyong bak sroepada

Meunyo deelat neuteurimong  
Kheun beukeunong po meukuta  
Jikalee han bah geujak woe  
U nanggroe teumpat keu raja

Meunan deelat geuhareutoe  
Lon geuyue woe bak meukuta  
Han jan habeh kheun po meuntroe  
Raja nanggroe seuot sigra

Wahe meuntroe jak tueng keunoe  
Ubak kamoe dalam kuta  
Kadang geutem dong disinoe  
Aneuk kamoe na nyang dara

Tapeukawen deungon gob nyan  
Jak tueng kaman keunoe sigra  
Ban meuntroe ngo kheun sulton  
Ili rijang u kuala

Tujoh reutoh rakyat ili  
Sajan wazi u kuala  
Meuntroe ka troh bineh pasi  
Ek sikuci dayong sigra

Jidayong le pantah leugat  
Jikarat bak kapai banta  
Bineh kapai ka jirapat  
Bandum rakyat ek lam bahtra

Ka jijunjong po samlakoe  
Angkat jaroe di jeumala  
Deelat ampon tuanku droe  
Narit baroe lon peugisa

Saleuem seumah raja kamoe  
Meujak keunoe tueng meukuta  
Neuyue tamong u meuligoe  
Dum sinaroe rakyat neuba

Han neubri treb le disinoe  
Raja nanggroe jeuheut nama  
Aeb keuji jeuep-jeuep nanggroe  
Tuanku droe gob ceureuca

Sang han deelat muliakan  
Bak lon tuan meunan kira  
Meunan meuntroe peuseumbahan  
Beudoh yoh nyan banta muda

Deungon rakyat bandum sajan  
Tron lam sampan dayong sigra  
Bineh pasi ka troh sampoe  
Teungoh jinoe dum sineuna

Troh lam kuta cut samlakoe  
Mumat jaroe deungon raja  
Bandum rakyat jipioh droe  
Seupot uroe le hu seunja

Raja Cina lon hareutoe  
Samlakoe jigaseh raya  
Jipeujamee geunap uroe  
Ureueng nanggroe jiseuranta

Jiyue kunjong bungong keumbee  
Meuree-ree rakyat dum teuka  
Got jiseuboe hana lagee  
Kafe asee galak raya

Jikeumeung tueng keu meulintee  
Meunan lagee pike raja  
Han jibri tren dalam juree  
Wazi nyan lhee sidroe banta

Raja Cina aneukjih lhee  
Tango sampee lon calitra  
Nyang ubit ka baleh asee  
Nyang ulee ka baleh raya

Pike raja meunan lagee  
Keu meulintee jitueng banta  
Jipeujamee geunap uroe  
Hareuta rugoe han jikira

Padum lawet teuma dudoe  
Bak samlakoe jipareksa  
Wahe aneuk deungo kamoe  
Lon tanyong nyoe ubak gata

Pakon aneuk taboh nanggroe  
Nyang troh keunoe peue jak mita  
Siri teumpat gampong nanggroe  
Namateuh soe hai bentara

Toh dairah siri sagoe  
Ayahteuh soe geuheu nama  
Meunan sabda raja nanggroe  
Seuot meunoe banta muda

Deelat ampon tuanku droe  
Deungo jinoe lon calitra  
Sira beuet dua jaroe  
Suara bagoe su biola

Saiful Muluk nama kamoe  
Meuse nanggroe nama banda  
Asim bin Sifun ayah kamoe  
Raja nanggroe nyang teurawala

Lon boh gampong deungan nanggroe  
Seutot lumpoe lon meukuta  
Badi' Jamaloi ulon lumpoe  
Nyan keuh putroe ceudah rupa

Muluk Cahya ayah putroe  
Peuet boh nanggroe gob nyan raja  
Mat keurajeuen nanggroe Bumboe  
Saboh nanggroe nama Cahya

Lom Bustarum teuma dudoe  
Nyang peuet nanggroe Idan Gamba  
Pat nanggroe nyan tuanku droe  
Neuhareutoe ubak hamba

Meunan seumbah po samlakoe  
Raja nanggroe jaweueb sigra  
Wallahu alam bungong geutoe  
Han tom puroe lon ngo haba

Lon deungo gah bak uroe nyoe  
Sabab nyoe ka tapareksa  
Bitpi meunan hai samlakoe  
Lon hareutoe ubak gata

Tapreh siat teungku kamoe  
Lon hei keunoe dum nanghuda  
Lheueh nibak nyan raja nanggroe  
Ubak meuntroe neubri haba

Dum juragan tahei keunoe  
Ubak kamoe tayue teuka  
Sabdapi lheueh beudoh meuntroe  
Jak lam nanggroe meuseuranta

jeuep-jeuep seugi jeuep-jeuep sagoe  
Laju keunoe jiyue teuka  
Hingga teuma ka troh sampoe  
Nam ribee droe dum nanghuda

Jingadap le raja nanggroe  
Dua jaroe di jeumala  
Deelat ampon payong nanggroe  
Dum na kamoe ka troh teuka

Peue na hajat neuhei kamoe  
Peugah jinoe po meukuta  
Raja Cina seuot yoh nyan  
Raya padan po meukuta

Lon meutanyong hai juragan  
Pat sulutan Muluk cahya  
Mat keurajeuen . peuet boh nanggroe  
Tango jinoe lon calitra

Phon Bustarum dua bumboi  
Keu lhee nanggroe nama Cahya  
Nan nyang keu peuet ngo lon peugah  
Nanggroe Indah 'Idan Cahya

Muluk Cahya nyang peurintah  
Nanggroe luah siblah donya  
Peuet keurajeuen nanggroe Bumboi  
Ubak kamoe tacalitra

Ubak kamoe tahareutoe  
Siri sagoe arah data  
Tan jiseuotpi meung sidroe  
Ban sinaroe seungab rata

Raja tanyong laju-laju  
Ate tunu dum nanghuda  
Dum sinaroe tan jimeusu  
Rab neubalu uleh raja

Poteu raja mata ka hu  
Ate kuyu dum nanghuda  
Teuma seuot sidroe juragan  
Ngon tangan buju ban dua

Ampon tuanku syahi alam  
Pakri padan po meukuta  
Tan jitupat dum juragan  
Nanggroe tuan Muluk Cahya

Han tom meugah tuanku droe  
Jeuep-jeuep nanggroe kamoe bungka  
Lon deungo gah bak uroe nyoe  
Han tom peue roe dilee nyang ka

Meunyo deelat mita putroe  
Laen nanggroe bah tabungka  
Tajak jinoe u Hindustan  
Bak lon tuan meunan kira

Nanggroe luah hana macam  
Le juragan jeuoh bungka  
Kadang ek na di nanggroe nyan  
Bak sulotan neupeuhaba

Ampon deelat po junjongan  
Idin laman jinoe bungka  
Hana guna lon dong sinoe  
Hajat kamoe goh lom nyata

Neuidin lon kaman jinoe  
Uroe nyoe jadeh lon bungka  
Meunan seumah po samlakoe  
Raja nanggroe seuot sigra

Idin bak lon hak budiman  
Lon pakri ban dilon teuma  
Meung tabungka u Hidustan  
Beule rakan ngon beulanja

Meuhan jibri sinyak putroe  
Taprang nanggroe tapoh raja  
Meunan nyang got bak lon sidroe  
Hai samlakoe beudoh bungka

Meunan raja jihareutoe  
Ka neuiem droe banta muda  
Pante Raja Mon Keulayu  
Lueng Putu rab Teupin Raya

Keu Si Nyak Syah Amma Bakdu  
Nanggroe Paru toe ngon Musa  
Saiful Muluk lon kheun laku  
Deungo teungku lon calitra

Treb di Cina peuet ploh uroe  
Po samlakaoe kheundak bungka  
Treh bak teungku raja nanggroe  
Cut samlakoe laju bungka

Geubet saoh kapai beusoe  
Guyang keumodoe buet nanghuda  
Peuhah layeue boh taloe klat  
Angen got that reumbang peusa

Geubangka laju u darat  
Geupeuteupat laot raya  
Jipt angen bacut-bacut  
Layeue tirut keumang rata

Beungoh-beungoh timu laot  
Oh seupot jipot utara  
Jipot angen timu jatoe  
Oh cot uroe barat daya

Jiplueng tajam kapai beusoe  
Angen tanggoe silagoena  
Uroe malam geumeulayeue  
Angen that kheue reumbang peusa

Dalam laot meuseuerabeue  
Ka meusiseue kapai dum na  
Padum lawet peulayaran  
Peujam daratan safan safra

Ka rab sampie u Hindustan  
Teukeudi Tuhan po nyang Esa  
Grak tekeudi nibak Tuhan  
Cut bangsawan keunong banya

Jipot angen seubak seubok  
Laot harok nyum keunong sa  
Ka teumakot Saiful Muluk  
Tam-tum reudok ujeuen raya

Teuka ribot ngon geulumbang  
Meuguncang laot si katra  
Beukah layeue patah tihang  
Meuwoe ulang kapai raya

Kapai jiplueng meuyub manyang  
Ulee mumang dum lasyeuka  
Saiful Muluk susah hate  
Neumoe sabe aneuk raja

Teungoh teuduek ka meugule  
Sang ka mate meunan rupa  
Laot harok seuntok sabe  
Rabbul Kade neubri bala

Dum na kapai habeh cre-bre  
Jiseupot le bakat raya  
Tihang patah keumudoe hanco  
Ka'a ka'u dum nanghuda

Dum juragan tahe gante  
Jimoe bae dum lasyeuka  
Jiba u keue roh u likot  
Ka meupot-pot dum nanghuda

Meujak meuwoe teungoh laot  
Angen bapot meugeugisa  
Dum juragan hate gigeng  
Patah ganceng kapai raya

Jitamah lom angen puseng  
Ka meutunggeng kapai bahtra  
Habeh karam bandum kapai  
Nyang na tinggai bak duek raja

Laen bandum hana tinggai  
Meunankeuh hai lam calitra  
Sidan Mabus nyang na tinggai  
Kapai asai yoh jeuet donya

Nam ploh peuet boh kapai padee  
Meuseubee lam laot raya  
Rakyat mate nam ploh ribee  
Allah nyang thee tu 'oh kira

Ka teukeujot bungong pade  
Neubeudoh le ngieng ulua  
Neungieng kapai saboh han le  
Susah hate banta muda

Ubak Said tanyong meunoe  
Kapai kamoe ho leupah ka  
Lon eu han le lam laot nyoe  
Peugah jinoe ho jibungka

Said seuot geukheun meunoe  
Ampon kamoe po meukuta  
Habeh karam dum sinaroe  
Sideh paloe laot sikatra

Meunan Said dum hareutoe  
Moe samlakoe sangat rugha  
Oh teuingat le that rugoe  
Goh lom putroe neueu rupa

Nyang na tinggai kapai beusoe  
Bak neuduek droe bangta muda  
Jimeulayeue malam uroe  
Angen tampoe hana reuda

Breueh ka habeh iepi han le  
Susah hate rakyat dumna  
Saiful Muluk neumoe sabé  
Bungong pade susah raya

Dua buleuen dalam laot  
Angen bapot hana reuda  
Saiful Muluk muka lucot  
Kapai ka sret bak saboh rimba

Troh bak pulo huteuen sirahet  
Leumah buket geueu rupa  
Bak gunong nyan geupeuteupat  
Kapai leugat keunan geuba

Geuteungoh le dum u darat  
Bandum rakyat jak lam rimba  
Geujak mita dum boh kayee  
Hana lagee deuek lagoena

Geukarat meudilee-dilee  
Pot boh jambee seuleueng para  
Oh meuteumeung geupajoh le  
Boh kayee gle mangat raya

Bandum rakyat mangat hate  
Ban saboh gle geujak mita  
Ladom puwoe boh lam sampan  
Ladom rakan lom jak mita

Meuteumeung le kayee sibak  
Boh nyang masak jai lageena  
Bandum ureueng hate galak  
Jimeukhem khak dalam rimba

Bak peureudee ka meusak-sak  
U cong bak laju'geuhala  
Di cong kayee saboh hantu  
Badan sulu panýang raya

Sapai mantong ube bak u  
Matajih hu ube raga  
Dum ureueng nyan hana geueu  
Geuwiet laju cabeueng nyang na

Ban jikalon geuwiet cabeueng  
Hantu bajeueng meuhei sigra  
Wahe rakan bandum ureueng  
Taek mamong keunoe gata

Boh nyang masak nyoe pat le that  
Taek leugat he seedara  
Ka jiek le bandum rakyat  
Meukarat meulumba-lumba

Nyang ek dilee nama Juhan  
Cit pahlawan bangta muda  
Troph u pucok jiek yoh nyan  
Jieu sinan hantu rimba

Badan raya hana lawan  
Sapaijih ban bak u dara  
Kuletjih ban ija gafan  
Matajih ban aneuk saga

Aneuk jaroe siyah panyang  
Bulee keumang na sideupa  
Ruhung hidong ube gantang  
Uleejih sang krong meugunca

Jieu Juhan ka troh keunan  
Jidrop yoh nyan laju sigra  
Keudeh keunoe jimeulawan  
Sayang Juhan ka binasa

Jiikat ban saboh badan  
Jiwiet meukhan gaki dua  
Sira jikheun meunoe macam  
Wahe insan manusia

Ka pot boh kayee han kapeugah  
Nyan meunalah kah karasa  
Kah kupajoh mangat leupah  
Kujep darah mameh raya

Pakon kapot dum boh kayee  
Nyan atra kee kaseurapha  
Sikrak haba han kalakee  
Kuplah ulee manusia

Bek kasangka tan ureueng po  
Barangkaho dheuen kahila  
Yoh nyan Juhan teungoh jilho  
Allah hai po sayang raya

Jilho Juhan uleh hantu  
Jiwiet laju jaroe ngon pha  
Juhan jiklik kon sigeutu  
Neuplueng laju po meukuta

Lon jipajoh uleh hantu  
Habeh umu lon lam donya  
Bek le neudong neuplueng ; laju  
Lon tuanku ka binasa

Ban neudeungo Juhan meusu  
Neuplueng laju u kuala  
Saiful Muluk moe meu'u'u  
Hate tunu aneuk raja

Sira neuplueng neukheun nyoe ban  
Gata rakan ka binasa  
Oh tan gata wahe juhan  
Siblah badan lon ka hana

Troh u pasi bandum rakyat  
Geukarat bak kapai raya  
Teuma bungka yoh nyan leugat  
Geupeuteupat ho angen ba

Hana meuho timu barat  
Angen intat saboh rimba  
Habeh jimoe dum na rakyat  
Teumakot that hana tara

Bit sidum nan tan teuringat  
Sabab deuk that bu han tom na  
Geupeudong le kapai leugat  
U darat geuteungoh lanja

Geujak laju dalam uteuen  
Peue meuteumeung geujak mita  
Tan teuringat hantu makeuen  
Han ingat le theun deuk lageena

Sibak kayee ka meuteumeung  
geumeuplueng-plueng keunan sigra  
Geuplueng laju uyub jambee  
Hana lagee boh le raya

Geukarat meudilee-dilee  
Bak peureudee ka troh teuka  
Geupajoh le dum boh jambee  
Hana lagee deuk lagee na

Saboh hantu dicong kayee  
Hana geuthee dumgeu rata  
Rakan banta nama Saidan  
Cit pahlawan lagi teuga

Jiek laju cong jambee nyan  
Jieu sinan hantu rimba  
Jitron laju atueh bumoe  
Miseue tungoe hitam sukla

Jidrob laju Saidan sidroe  
Hantu pindoe ikat lanja  
Jimeulawan cula caloe  
Saidan jimoe lagee raya

Jiklikpi that hana bagoe  
Hantu pindoe laju raya  
Taeu kulet miseue adang  
Mata jih sang aneuk saga

Tajam gukee miseue parang  
Ube tungkang badan raya  
Ruhung idong lot boh mancang  
Ulee jih ban karong lhee gunca

On geulinyueng troh u gaki  
Bineh bibi ube-be pha  
Gigoe haloh miseue baci  
Ngon gusi ban bantai raya

Leumah neueu le samlakoe  
Rakan sidroe ka binasa  
Neungieng Saidan jiboh taloe  
Plueng samlakoe laju sigra

Troh u pasi bandum rakyat  
Geuek leugat dalam bahtra  
Saiful Muluk teumakot that  
Geubeuot leugat saoh bahtra

Geubungka le teuma leugat  
Geukarat u laot raya  
Gampong nanggroe hana mupat  
Bungka leugat ho angen ba

Ie ka habeh ngon boh kayee  
Hana lagee deuk lageena  
Bandum rakyat moe meuree-ree  
Hana geuthee beungoh seunja

Seubak-seubok angen tufeuen  
Jitoh hujeuen hana reuda  
Dalam laot na peuet buleuen  
Leumah uteuen geueu rupa

Saboh gunong manyang han soe  
Pucak sampoe awan mig  
Nyankeu teumpat hantu pindoe  
Hana sidroe manusia

Han tom soe jak barangkasoe  
Sabab nanggroe jeuoh raya  
Nama geukheun pulo Darata  
Teumpat syaitan hantu rimba

Geuba laju kapai keunan  
Bak pulo nyan uteuen raya  
Bandum rakyat jiteungoh le  
Nyang keu mate han geukira

Geujak laju u dalam gle  
Han ek theun deuk lageena  
Sabab deuk pruet tan teumakot  
Habeh lupot dum peukara

Meuteumeung le sibak rambot  
Geukugot cabeueng nyang raya  
Keunong laju geupajoh le  
Nyang mate han le geukira

Mamehpi that hana sab  
Boh kayee gle salang para  
Ladom rakan ek ujung bak  
Nyang got masak geujak mita

Bandum ureueng meukhem meukhak  
Deungon surak that meutaga  
Teungoh laloe pot boh kayee .  
Hana geuthee hantu teuka

Hantu jijak limong ribee  
Saboh sukee wazi raja  
Dijih sabe jaga nanggroe  
Nyang neumat droe raja raya

Leumah jieu po samlakoe  
Hantu pindoe jidrob sigra  
Han jan jiplueng dum sinaroe  
Po samlakoe phon jihila

Ka jiikat dum sinaroe  
Jiboh taloe bandum rata  
Ubak raja jimeueng puwoe  
Cut samlakoe ka binasa

Saiful Muluk ka meupaloe  
Teuduek oh noe dilee haba  
Alue batee toe ngon Adan  
Gampong Asan toe Meurasa

Ulon peugah bah sikhan-khan  
Wahe rakan bek meutuka  
Di Blang Bunur geuceumacah  
Blang Keuleudah ka seumula

Ajaeb didalam kisah  
Ngo lon peugah saboh raja  
Raja hantu ulon kisah  
Meusyeuhugah sigala donya

Timu barat jih peurintah  
Mambang meugah saboh raja  
Jeuep-jeuep gunong jeuep-jeuep uteuen  
Jih keurajeuen jeuep-jeuep rimba

Barangkasoe han ek linteueng  
Hana soe theun sicilaka  
Raja hantu jipet jibleuet  
Jaga teungeut sabe tapa

Han tom jitronpi meung uyub  
Jipiep curap ube raya  
Nama nanggroe Nurin gunong  
Han jeuet tamong manusia

Jeuohpi that han peue tanyong  
Peuet ploh gunong laen lingka  
Nama geuheu raja Utak  
Biek jen Unag meugah raya

Aneuk raja mantong manyak  
Teungoh leumak jimom bak ma  
Na limong thon baro umu  
Peumom laju troh ngon raya

Jigaseh that kon sigeutu  
Ate seu'u du deungon ma  
Aneuk raja ureueng binoe  
Tango jinoe lon calitra

Rupa jroh that hana bagoe  
Barangkasoe hana nyang sa  
Kulet licen miseue paroe  
Takalon dhoe ube tika

Puteh kuneng sang jambee kleng  
Hana bandeng ngon tapeusa  
Badan ubit ceudah rampeng  
Ube kateng mom jih dua

Punggong siblah ube rumoh  
Ban jaroe noh bulee nata  
Miseue suda muka peunoh  
Han soe teuoh saleuek muka

Ok diulee sang bulee joh  
Ngon rusok ube bleuet raya  
Ngon seulanggoi ube numbock  
Lapang pupok ube tika

Ube tabak mata rayek  
That bit ilok aneuk raja  
Watee jikhem miseue reudok  
Oh jibatok miseue lila

Gukee tajam sang peunyuko  
Kulet kundo sang meurua  
Soe nyang kalon tahe gante  
Bit teungku e kon duseuta

Muka rumeh miseue boh kruet  
Leupek pruet jeuet tasrom guda  
Nyang na salah ubit bacut  
Goh lom kong ruet pinggang ija

Limong deupa panyang tapak  
Ube tabak aneuk mata  
Badan ceudah jroh meusigak  
Puteh muprak miseue baja

Rupa got that hana sakri  
Puteh sang ri rungoe bangka  
Ruhueng hidong lot sak guci  
Bineh bibi na ube pha

Puteh kuneng na miseue hueng  
On geulinyeng ube raya  
Tangieng dinab sang peunutong  
Tangieng dirueng miseue waba

Nyankeu rupa ka ulon kheun  
Putroe buleuen aneuk raja  
Nyankeu teungku ka lon peugah  
Kon beurakah ngon duseuta

Jeuet keu dum nan ulon kisah  
Raja meugah hantu rimba  
Puteh-puteh bungong langsat  
Nyang puteh that bungong jeumpa

Saiful Muluk lon riwayat  
Hantu ikat po buet banta  
Ubak raja jiba leugat  
Deungon rakyat ban sineuna

Jingadap le raja nanggroe  
Beuot jaroe peugah haba  
Deelat ampon tuanku droe  
Neukalon nyoe saboh rupa

Nyoe binatang ka lon puwoe  
Lon drob baroe lam beuluka  
Oh jideungo dum hareutoe  
Raja pindoe jibleuet mata

Ban jikalon po samlakoe  
Keutep jaroe po cilaka  
Ka teusinyom raja biyoh  
Beureuseun troh dalam rimba

Sicut banta jimeung pajoh  
Ma teungku boh sayang raya  
Ka troh ajai sampoe tanggoh  
Puteh leusoh ka binasa

Jimarit le raja hantu  
Me noe kueu pakri rupa  
Sabab dikee hana lom bu  
Kabri laju deuk lageena

Hawa kuthat kon sigeutu  
Me noe laju kumeung rasa  
Ban jideungo raja lakee  
Jicok dilee raja muda

Raja sambot bungong keumbee  
Moe meuree-ree po cut banta  
Laen rakan jijak dudoe  
Ban sinaroe ube nyang na

Jieu rupa that samlakoe  
Raja pindoe tanyong sigra  
Binatang nyoe pat meuteumeung  
Sang-sang ureueng manusia

Jiseuot le aneuk bajeueng  
Ulon teumeung cong peungeuta  
Ban jideungo wazi peugah  
Jicok pantah dua-dua

Jingieng banta rupa ceudah  
Jikeubah u geunireng sigra  
Jicok laen laju pantah  
Han peue peugah galak raya

Na ube krong ruhung babah  
Panyang lidah na lhee deupa  
Dua-dua sigo jiab  
Habeh ranab dum ban nyang na

Ban sinaroe ka jilhab  
Oh jikeucab jipet mata  
Tujoh reutoh nyang ka habeh  
Raja paleh goh mumada

Habeh rotnoe jicok rotdeh  
Sicut puteh ka jihila  
Jicok laju banta peuet droe  
Raja pindoe jihah sigra

Saiful Muluk neukheun meunoe  
Sira neumoe alet ie mata  
Allah-Allah Tuhan kamoe  
Lon ka sampie ajai teuka

Habeh umu lon uroe nyoe  
Jiseudoe le hantu rimba  
Allah-Allah ya Tuhanku  
Habeh umu lon lam donya

Lon jipajoh uleh hantu  
Ya Tuhanku tulong hamba  
E hai untong pike keudroe  
Ku pakri roe ka troh masa

Ya Tuhanku po dikamoe  
Peulheueh kamoe leh gata  
E hai untong naseb badan  
Lon pakri ban ya Rabbana

Lon jipajoh leh syaitan  
Wahe Tuhan tulong gata  
Allah-Allah hu ya Rabbi  
Gata gani that kuasa

Pakri lon bah ka teukeudi  
Ka troh janji ajai teuka  
Allah-Allah ya Rabbun  
Gata po lon nyang kuasa

Ya Tuhanku lon neutulong  
Bek roh ulon seurapa  
Meunan neukheun puteh sabon  
Mohon tulong bak Rabbana

Saiful Muluk teungoh neumoe  
Raja pindoe sayang teuka  
Raja kalon jroh samlakoe  
Ban peuet droe rupaji sa-sa

Tan jipajoh banta peuet droe  
Kheun bak meuntroe po cilaka  
Bah le tinggai insan peuet droe  
Taboh jinoe dalam cintra

Sayang lon that hana bagoe  
Insan peuet droe got that rupa  
Suara mangat miseue bangsi  
Hana sakri mangat raya

Jibeudoh le teuma wazi  
Po juhari jijak sigra  
Banta peuet droe ka jicok le  
Bungong pade boh lam cintra

Jilhat nibak lasa rinyeun  
Boh eumpeuen boh salang para  
Boh langsat ngon rambot uteuen  
Boh timon ngon boh peungata

Raja hantu ate hireuen  
Jingieng buleuen dalam cintra  
Beungoh seupot jiboh eumpeuen  
Banta makeuen peue-peue nyang na

Teutap banta dalam mideuen  
Laen lon kheun hai seedara  
Ulon kisah putroe meugleueng  
Nyang teubileueng hantu rimba

Teupin Raya toe Lueng Putu  
Nanggroe Paru rab ngon Musa  
U baroh nyan keude Cot U  
Amma bakdu leupah isya

Muwoe kisah putroe hantu  
Nam thon umu aneuk raja  
Bak siuroe jak bak abu  
Teubiet laju ulua kuta

Troh bak ayah putroe hantu  
Leumah jieu po cut banta  
Putroe kalon bungong meulu  
Ate rindu galak raya

Sang ka seudee putroe hantu  
Jingieng teungku dalam cintra  
Palakji that keu samlakoe  
Gila putroe hantu rimba

Putroe hantu tanyong meunoe  
Hai du kamoe peue lam cintra  
Dalam cintra peue binatang  
Peugah rijang hai du raja

Rupa jroh kon bubarang  
Galak lon sang hai ayahanda  
Jiseuot le raja Suang  
Hai cut bintang manusia

Biek pajoh bu aneuk badan  
Nyankeu insan bijeh mata  
Ban putroe ngo jikheun insan  
Ka jiwan-wan lagee raya

Wahe ayah bri keu kamoe  
Insan peuet nyoe lon peulara  
Kon lon pajoh hai ayah droe  
Galak putroe aneuk gata

Meuhan neubri insan peuet nyoe  
Mate kamoe hai ayahanda  
Jiseuot le raja pindoe  
Bek tapoh droe hai nyak dara

Bek antara insan peuet droe  
Gampong nanggroe cok keu gata  
Meunan narit raja pindoe  
Beudoh putroe jicok cintra

Jiwoe laju u meuligoe  
Po samlakoe sajan jiba  
Putroe ka troh ubak teumpat  
Jitron jilhat bak seulasa

Jiboh eumpeuen teuma leugat  
Boh langsat boh salang para  
Meunan sabe geunap uroe  
Han ek adoe lon calitra

Padum lawet teuma dudoe  
Reumeh putroe deungon banta  
Ka jipeulheueh po samlakoe  
Lam meuligoe kon u lua

Putroe hantu kheun le meunoe  
Tango kamoe manusia  
Gata ngon lon ta meukawen  
Ngon soe laen han kurila

Barangkasoe han le kutem  
Gata dalem dilon suka  
Ban peuet gata lon meukawen  
Puteh licen bek meudawa

Saboh inong peuet boh agam  
Galak meunan di lon suka  
Simalam sapo taeh sajan  
Meunan insan keu po jeumba

Sidroe malam sidroe uroe  
Saboh putroe peuet droe gata  
Meunan adat nibak kamoe  
Atoran nyoe got lagoena

Teuma seuot po samlakoe  
Kheun bak putroe hantu rimba  
Wahe putroe bintang canden  
Bek meukawen lon ngon gata

Hana patot tameukawen  
Puteh licen aneuk raja  
Hukom inong wahe putroe  
Saboh lakoe han jeuet dua

Meunan reusam jueub-jueub nanggroe  
Baranggasoe kon meunggata  
Saboh inong peuet droe agam  
Pane reusam nyan di gata

Sidroe uroe sidroe malam  
Bak ulon pham hana gura  
Ban jideungo kheun samlakoe  
Beungeh putroe hantu rimba

Teuma jikheun laju meunoe  
Bit insan nyoe le that haba  
Han katu'oh di kah bandum  
Hana maklum manusia

Gata insan hana muphom  
Nyankeuh hukom asoe neuraka  
Lheueh jikheun nyan uleh putroe  
Bangta peuet droe jidrob lanja

Jipeukek le u meuligoe  
Jiboh taloe ban peuet bangta  
Sabab bangta that samlakoe  
Galak putroe hantu rimba

Sinan sabe lam meuligoe  
Hantu putroe jimeuseunda  
Hana rila peuet samlakoe  
Tuhan sidroe goh neukada

Meudeh meunoe ka jiujoe  
Hantu putroe susah raya  
Hana jieh malam uroe  
Daok laloe ngon cut bangta

Grak teukeudi nibak Tuhan  
Neubri jalan nyang sijahtra  
Hana roh buet keujahatan  
Sidroe Tuhan nyang peulara

Deungon kheundak bak Tuhanku  
Putroe hantu teungeut indra  
Ateueh geuta teueh sulu  
Lam keuleumbu nyang meusuja

Teungeut pangsan lam keuleumbu  
Putroe hantu lheueh meuseunda  
Bangta peuet droe hate tunu  
Pakri laku ya Rabbana

Teuka susah po samlakoe  
Takot paloe akhe masa  
Ngon ie mata sret meataloe  
Hana sunyoe sikleb mata

Leumah pike po samlakoe  
Tuhan sidroe bri rahsia  
Ubak Said neukheun meunoe  
Tango kamoe he seedara

Jinoe taplueng bak teumpat nyoe  
Bek le sinoe lam astana  
Lon takot roh teuma dudoe  
Meupaloe asoe neuraka

Bak lon ingat wahe adoe  
Got taboh droe dalam rimba  
Takoh kayee peue nyang jadi  
Tapeuili u kuala

Peugot raket tapeuili  
Peue nyang jadi Tuhan kada  
Meunan sabda po samlakoe  
Rakan peuet droe tren astana

Putroe hantu teungeut keudroe  
Tan jitupeue kanu-kana  
Ban peuet bangta geujak leugat  
Sikeujab troh lam rimbaa

Yoh nyan hate siat teutap  
Cre bak teumpat hantu rimba  
Ban peuet bangta hate mangat  
Ban pakat hase keureuja

Geukoh kayee dum ube-be  
Meurante ngon meudang ara  
Cukop kayee tarek awe  
Geupeugot le raket sigra

Raket hase dalam sungoe  
Makanan nyoe geujak mita  
Pot boh kayee jeuneh bagoe  
Geupuwoe lam raket sigra

Troh lam raket dum meusapat  
Ile leugat u kuala  
Geudayong le habeh kuat  
Geukarat u laot raya

Uroe malam tan le ingat  
Puteh lumat dayong lanja  
Raket jiplueng buju laot  
Nyum teumakot bangta muda

Jitoh ujeuen angen jipot  
Jitron ribot angen raya  
Meujak meuwoe dalam laot  
Jibapot le angen raya

Baroh tunong han meuho le  
Gunong ngon gle han meuho ka  
Bitpi meunan han geupike  
Dayong sabé hana reuda

Bangta ka troh laot tuwi  
Han le meuri gle ngon rimba  
Ka meulang-lang teungoh laot  
Angen bapot hana reuda

Geuba u keue roh u likot  
Hate kalot moe dum rugha  
Na peuet buléuen dalam laot  
Angen bapot peuet droe bangta

Ie ka habeh ngon boh kayee  
Hana lagee duek lageena  
Ubak Tuhan neumeulakee  
Sret meuree-re ngon ie mata

Ya Tuhan ku po si kamoe  
Hambaneu nyoe neupeulara  
Han lon tupat gampong nanggroe  
Kamoe peuet droe ka binasa

Ya Tuhan ku Rabbon kade  
Bek lon eu le laot raya  
Gampong nanggroe han meupat le  
Gotkeu mate lon nyoe sigra

Allah-allah ya Rabbi  
Gata gani Maha Kaya  
Uroe malam han le meuri  
Lon ya Rabbi deuek lageena

Bukon sayang bungong panjoe  
Keunoe uroe habeh mala  
Bukon sayang bangta peuet droe  
Ka meupaloe aneuk raja

Bukon sayang buleuen peuet blaih  
Han le leumah ka geurana  
Ka teukeudi nibak Allah  
Banta indah lom meubahya

Ka meunan grak nibak Tuhan  
Banta peuet nyan teuka bala  
Saboh buya teuka keunan  
Bak raket nyan jijak lanja

Jieu raket teungoh ile  
Buya lisi ban seulingka  
Ka jicok phon aneuk wazi  
Said Juhari ka jihila

Said Juhari ka jitugom  
Jipeunom lam laot raya  
Na sikeujab jiriwang lom  
Ka jireungkhom banta dua

Ji'uet laju banta lhee droe  
Buya pindoe galak raya  
Jigisa lom teuma dudoe  
Po samlakoe lom jihila

Oh ban sare ka troh jikab  
Ka meukeumat bak babah buya  
Bak babah sinan meukeumat  
Aneuk deelat banta muda

Keundak Tuhan po nyang ahad  
Ngon sabab malakat raja  
Sabab euncien bak Sulaiman  
Sok bak tangan aneuk raja

Buya susah hana lawan  
Keunoe keunan ka jipeuba  
Ji'uet han jeuet ulepi han  
Cit lam meunan ka jiba-ba

Rukueng saket meuganceng gigoe  
Buya pindoe susah raya  
Apoh apah buya Sidroe  
Sang sang bagoe han le nyawa

Keudeh keunoe jisumpom droe  
Meuwoe-woe lam laot raya  
Jiplueng sabe malam uroe  
Laot ceukoe sang ie raya

Nibak babah po samlakoe  
Nyang lhee droe ka lam pruet buya  
Ka neubae cut samlakoe  
Bungong geutoe ro ie mata

Neumeulawan keudeh keunoe  
Sira neumoe bak babah buya  
Hana neuthee malam uroe  
Po samlakoe buya ba-ba

E ya Allah po alam nyoe  
Neutueng kamoe ya Rabbana  
Meungka ajai umu sampoe  
Bek le meunoe lon peurasa

E hai Said tangke hate  
Ka troh janji ajai teuka  
Oh lon ingat that meusampe:  
Jinoe hase sampoe masa

Bukon sayang bungong giri  
Mirapati po meugisa  
Bukon sayang cut puteh di  
Dalam sabe buya ba-ba

Bukon sayang gapeueh panjoe  
Angen tampoe rok-rok masa  
Bukon sayang cut samlakoe  
Buya tampoe lam laot rayu

Bukon sayang bak seumatok  
Aneuk jampok di cong pala  
Bukon sayang Saiful Muluk  
Cit lam suntok neumoe rugha

Bukon sayang bungong awe  
Sret meugule angen tampa  
Oh teuingat reuloh hate  
Ka jadeh cre ibu bapa

Uroe malam neumoe sabé  
Bungong pade sayang raya  
Dalam laot meute kuble  
Cit lam sabé buya- ba-ba

Jipeunom meujan jipeudu  
Barat timu baplueng sigra  
Buya susah kon sigeutu  
Sang geulayu meunan rasa

Didalam pruet sang sang ka ju  
Sang apui hu nyang dilua  
Pruetjih ka deuek han peue peugah  
Lom deungon grah tan umpama

Jimeung pajoh han jeuet jihah  
Nibak babah banta muda  
Ule han jeuet 'uet han leupah  
Buya susah hana nyang sa

Meunan teukeudi bak Tuhaniku  
Bintang timu han binasa  
Yoh nyan pangsan bungong meulu  
Tuanku bak babah buya

Tan le ingat meung sigeutu  
Buya tunu hana nyang sa  
Jisempom droe barat timu  
Seuuem laju sang neuraka

Apoh apah amat sangat  
Sang sang ranab badan nyawa  
Keudeh keunoe buya lumpat  
Hana meuhat sini sana

Ngon kheundak po Rabbul ibad  
Aneuk deelat leupah banya  
Keudeh keunoe buya seupot  
Ka teugeunsyot bak babah buya

Na kri-kri Tuhan bri rot  
Ka teugeunsyot aneuk raja  
Sret u darat po juhari  
Bineh pasi ka teuhanta

Sinan pangsan bungong giri  
Buya ili ka jigisa  
Bacut buya mangat hate  
Oh hana le banta muda

Tapi buya badan krot kreuet  
Mantong lam pruet lhee droe banta  
Pajoh makanan ji'uet han jeuet  
Mareh meucuet meunan rasa

Meunan sabé dalam deuek pruet  
Badan pujuet buya ceulaka  
Dalam laot meutuet aruet  
Eumpeuen han jeuet nyan jirasa

Sabab ija bak Sulaiman  
Sabab nyan buya binasa  
Meunan sabé barangkajan  
Seungab 'oh nan lhee droe banta

Jinoe laen lon hareutoe  
Deungo adoe dum seedara  
Cut Fatimah rumoh sagoe  
Kuta Sumboe toe Rambayan

Amma Bakdu roh bak sagoe  
Pakri adoe ulon paban  
Tango jinoe lon hareutoe  
Keu samlakoe lon peuriwang

Bineh pasi sinan sidroe  
Dalam uroe sinan pangsan  
Hingga teuma padum na treb  
Bungong kawet puleh rijang

Ka teukeujot bungong ruseb  
Moe meureb-reb cut bangsawan  
Pruetpi ka deuk badan saket  
Buya apet uroe malam

Ban teukeujot bintang pari  
Bineh pasi duek teusimpan  
Ngon ie mata sajan ili  
Ingrat abi bunda sajan

Ingrat rakan sidroe han le  
Reuloh ate cut analan  
Allah Allah hu ya Allah  
Lon pakri bah wahe Tuhan

Oh lon ingat ma ngon ayah  
Ate beukah dalam badan  
Nyokeu masa baro teulah  
Lon paban bah untong malang

Habeh raseuki deungon langkah  
Bunda ayah apon tangan  
Han lon pateh gob nyan peugah  
Nyoe meunalah dilon tuan

Ya Tuhan ku po lon sidroe  
Nyoe ka paloe lon pakri ban  
Tinggai ayah ma lon putroe  
Seutot lumpoe napsu syeitan

Rakyat habeh lom sinaroe  
Goh lom putroe lon tupat tan  
Gotkeu mate lon uroe nyoe  
Gampong nanggroe lon tupat han

Neumoe sabe po samlakoe  
Tinggai sidroe han le rakan  
Rakyat han lepi meung sidroe  
Po samlakoe han le rakan

Teuduek sidroe bineh laot  
Putik rambot hana rakan  
Hana teudoh ie mata srot  
Bintang kutob cahya padam

Tho ngon reuoh puteh muprak  
Beudoh neujak cut bangsawan  
Dalam uteuen laju neujak  
Neupeutak lam rimba Tuhan

Neuteungoh cot tron buket  
Badan saket bungong peukan  
Habeh neublooh duroe kawet  
Ret meusaket hana lawan

Hana piyohpi meung siat  
Beurangkat dalam uteuen  
Tan neutuho timu barat  
Bak hadarat neujok badan

Dalam rimba banta sisat  
Bit sayang that wahe rakan  
Hana piyoh malam uroe  
Bloh samlakoe rimba Tuhan

Ija bajee ruya rayoe  
Ngon duroe ban saboh badan  
Habeh neubloh lam-lam duroe  
Teupipoe reubah le pangsan

Meuteugom reubah teukekeueng  
Seulinteung diyub palangan  
Ka meuseumpom ateueh bateueng  
Bungong seumpeueng leupah sayang

Habeh keumong jeuep-jeuep tuleueng  
Hana peue kheun saket badan  
Neubeudoh le teuma laju  
Moe meu'u-u cut bangsawan

Ka treb han tom neupajoh bu  
Lawet umu han le rakan  
Oh teuingat nyan keu untong  
Meugulon ie mata sajan

Dalam rimba banta jamprong  
Lakee tulong nibak Tuhan  
Na peuet buleuen didalam gle  
Neujak sabe uroe malam

Tan teuingat le keu mate  
sidroe han le tinggai rakan  
Oh meuteumeu boh-boh awe  
Neupajoh le deuek hana ban

Neujak laju didalam gle  
Meute guble dalam hutan  
Troph banta bak saboh gunong  
That teuceungong cut bangsawan

Manyang leusoh han peue tanyong  
Si cut cungong peurab keunan  
Gunong manyang that meuhalak  
Kayee sibak tan disinan

Tahe mandang bungong meurak  
Neueu pucak sampoh awan  
Neungieng kareueng dum meulapeh  
Puteh-puteh na dum intan

Saiful Muluk hate peudeh  
Deukekneu habeh hana lawan  
Ateueh batee siat neueh  
Bungong puteh teungeut pangsan

Oh ban jaga bungong puteh  
Beudoh bak eh duek meusimpan  
Yoh nyan neumoe bungong keumbee  
Tumpang ulee gundah ban ban

Sret ia mata basah bajee  
Neumeulakee ubak Tuhan  
Neumeuinsan po samlakoe  
Neuleueng jaroe do'a sajan

Ya Tuhanku po di kamoe  
Ulonteu nyoe peularakan  
Beureukat ayah ma lon putroe  
Beuek sampie ban pintaan

Lheueh meuinsan po samlakoe  
Rahob jaroe dua tangan  
Oh sare lheueh neumuhon droe  
Neuek jinoe gunong manyang

Neumumat le nibak kareueng  
Bungong seupeueng neuek rijang  
Na peuet langkah banta tempeueng  
Keunong tuleueng saket badan

Beuthat meunan han teumakot  
Bacut-bacut neuek rijang  
Badan lipeh sang peunyekuet  
Bu dalam pruet sianeuk tan

Padum ngon deuk meutamah grah  
Uroe tampah hana lawan  
Neupeujok droe ubak Allah  
Ban peurintah sidroe Tuhan

Uroe tarek han peue peugah  
Reuoh reuah hana lawan  
Bit sidum nan hana gundah  
Banta gagah ek gunong nyan

Hana teudoh pujoe Allah  
Nyan dibabah barangkajan  
Gidong kareueng mumat kareueng  
Saket tuleueng rumon badan

Bacut-bacut banta timpeueng  
Cut meugleueng teumakot han ban  
Badan lipeh sang boh seupeueng  
Tinggai tuleueng asoeji tan

Tujoh uroe neuek sabé  
Han neupike saket badan  
Tan teuringat le keu mate  
Peusak ate ek gunong nyan

Gunong kareueng jroh meuhalak  
Kayee sibak tan disinan  
Banta rab troh atueh pucak  
Deungon kheundak sidroe Tuhan

Kuweuet teuot saket tapak  
Bungong meurak susah han ban  
Hankeu ek le gunong neurhak  
Piyoh nibak kareueng tajam

Silab bacut bungong seupeueng  
Leukang kareueng ube cawan  
Ka meugule sicut meugleueng  
Keunong kareueng rumon badan

Gaki beukah keumong tuleueng  
Cengkheng-cengkheung srot disinan  
Dalam alue ka meugule  
Bungong pade sayang han ban

Gadoh ingat payong kande  
Sang ka mate nyawong hilang  
Hana mumet jaroe gaki  
Tujoh uroe sinan pangsan

Deungon kheundak Tuhan sidroe  
Hana paloe bit sidum nan  
Tujoh uroe pangsan sabe  
Teukeujot le cut analan

Beudoh laju bungong pade  
Darah ile nibak badan  
Oh teuringat that meusampe  
Reuloh ate bungong peukan

Bitpi meunan han neupike  
Neubeudoh le ek gunong nyan  
Lom ka neuek bacut-bacut  
Ate kuyut cut bangsawan

Banta muda meunyum kuyut  
Neupeujok droe nibak Tuhan  
Neuek gunong ka neupeupruet  
Sababpi peujuet kuweut badan

Ka rab leupah gunong neuek  
Ka meubalek srot lom sinan  
Keumong teuot patah gitek  
Bungon rubek sayang han ban

Gigoe leungo gaki beukah  
Ngon darah ban saboh badan  
Bitpi meunan han neugundah  
Beudoh pantah cut bangsawan

Neumeulakee ubak Allah  
Cut meutuah pujoe Tuhan  
Ya Ilahi wa ya Rabbi  
Keu lon neubri hajat simpan

Ya Ilahi wa ya Rabbi  
Keu lon neubri ban pintaan  
Beureukat bunda peurmaisuri  
Beureukat abi ayah laman

Beuek leupah bak gunong nyoe  
Tulong kamoe wahe Tuhan  
Lheueh meuinsan rahob jaroe  
Seubot pujoe deungon lisan

Kheun Bismillah pirak lipat  
Sira peurab bak gunong nyan  
Bacut-bacut neukek leugat  
Neumeung tungkat nibak Tuhan

Neukek laju ka neukarat  
Yo meutat-tat banta seudang  
Reuoh reuah uroe kheue that  
Aneuk deelat sayang han ban

Tujoh uroe ek neukarat  
Troh ban hajat banta seudang  
Troh u pucak piyoh siat  
Payahneu that kuweuet badan

Na sikeujab banta piyoh  
Dang tho reuoh darah sajan  
Puleh payah puteh leusoh  
Sampoh reuoh darah sajan

Hek ka puleh puteh licen  
Gunong neutron laju rijang  
Nyum teumakot bintang canden  
Ate ngeuren that dukaan

Saket tapak yo ngon atut  
Kuweuet atot banta intan  
Silab bacut putik rambot  
Banta ka srot lom disinan

Ka meugule dalam alueue  
Srot meuhueue-heue mumetpi han  
Saket ulee keumong takueue  
Bungong geutueue laju pangsan

Sinan pangsan dalam alueue  
Hana meupeue le neutuban  
Ija puteh peukayan syiah  
Ija mirah keu syuruban

Saiful Muluk sayang leupah  
Meudarah ban saboh badan  
Puleh pangsan beudoh pantah  
Neueu patah gaki tangan

Banta beudoh keumeung langkah  
Lom ka reubah laju sinan  
Tuleueng teuot ka meusalah  
Sayang leupah soe kalon ban

Teuduek tahe cut meutuah  
Deuk deungan grah hana lawan  
Ingam keudroe banta indah  
Pujoe Allah sidroe Tuhan

Banta neumoe meusok-meusok  
Nam uroe rok sabe meunan  
Dalam alueue Saiful Muluk  
Han saho troh dalam utan

Bukon sayang aneuk jampok  
Meureubok nanggroe Asahan  
Teiduek siat Saiful Muluk  
Lon pakhok laen karangan

Gampong iboh kuta Tufah  
Gampong Gajah toe keumangan  
Amma Bakdu hai nyak ibah  
Tacok kuah boh bak pinggang

Sidroe raja ulon kisah  
Meusyeuhurah hana lawan  
Jeuep-jeuep nanggroe cit geuturi  
Indra Sakti nan sulotan

Ngon meugah that hana sakri  
Barangkari hana lawan  
Dalam gunong mat keurajeuen  
Jeuep-jeuep uteuen rimba Tuhan

Rakyat rame hana peue kheun  
Biek jen hewan deungon syeitan  
Jeuep-jeuep raja hana soe theun  
Han ek soe kheun keu raja nyan

Indra Sakti dalam mideuen  
Miseue naleueng rakyat ji nyan  
Bue ngon reungkah lutong cagee  
Ka jihimbee kala pisan

Binatang gle meuploh sukee  
Han ek sampe lon peugah ban  
Wazi raja peuet boh cagee  
Puteh bulee miseue intan

Bak siuroe teukeudi Allah  
Jeuoh langkah cagee peuet nyan  
Bulee puteh ban keureutah  
Miseue gajah raya badan

Cagee peuet nyan jaga nanggroe  
Nyang neumat droe di sulotan  
Meunan sabe hai teungku droe  
Geunap uroe jibeujalan

Troh bak alueue keunan sampie  
Jieu sidroe leumah insan  
Jijak laju keunan ka toe  
Deuh samlakoe ngieng cagee nyan

Ka teukeujot po samlakoe  
Neungieng ka toe cagee keunan  
Teumakot that hana bagoe  
Bak uroe nyoe lon ka simpan

Habeh umu lon uroe nyoe  
Tulong kamoe wahe Tuhan  
Neukeumeung ploh neujak som droe  
Hana adoe meugrak badan

Saiful Muluk yoh nyan neumoe  
Neupeujok droe ubak Tuhan  
Peue binatang ka troh keunoe  
Ubak kamoe laju datang

E hai untong pike keudroe  
Jinoe sampie nyawong hilang  
Banta muda teungoh neumoe  
Cagee bunoe ka troh keunan

Cagee kheun le teuma meunoe  
Bek le neumoe hai sulotan  
Beudoh teungku laju keunoe  
Ulon puwoe bak junjongan

Meunan cagee kheun hareutoe  
Po samlakoe ate seunang  
Pujoe Tuhan po samlakoe  
Neukheun meunoe bak cagee nyan

Han jeuet lon jak hai ulon droe  
Saket lon nyoe rumon badan  
Patah gaki deungon teuot  
Saket atot lon hana ban

Meunan narit putik rambot  
Ie mata srot basah badan  
Han jeuet neujak teungku ampon  
Ateueh rueng lon neukek kaman

Nak lon puwoe nyan u gampong  
Teungku ampon bek dukaan  
Mumat laju bak bulee krue  
Neusintue bak bulee badan

Oh lon baplueng bek meuhue-hue  
Mat bak takue ulon tuan  
Banta deungo cagee peugah  
Neukek pantah ka neupasang

Mangat ate cut meutuah  
Han le payah neubeujalan  
Troph po banta u ateueh rueng  
Cagee baplueng sangat tajam

Meunyum hayéut bungong yueng-yueng  
Jeumeuleung bak bulee badan  
Uroe malam hana piyoh  
Baplueng sunggoh hana lawan

Nyum teumakot puteh lusoh  
Cagee jibloh rimba Tuhan  
Troh bak kuta Indra Sakti  
Po juhari tahe mandang

Jipeutamong banta saidi  
Ubak duli raja makam  
Tahe mandang po samlakoe  
Hireuen laloe oh neupandang

Habeh neungieng ban peuet sagoe  
Hana sidroe leumah insan  
Cagee peuduek po samlakoe  
Bak sagoe cong bale kambang

Teutap sinan bungong uroe  
Cagee peutoe bak sulutan  
Jijak ngadap raja nanggroe  
Ban adat droe kanun reusam

Deelat ampon payong nanggroe  
Lon uroe nyoe jeuoh jalan  
Gaki buket ulon sampoe  
Meuteumeung nyoe sidroe isan

Rupa jroh that hana bagoe  
Barangkasoe tan teuladan  
Ulon teumeung diyub kayee  
Yub peureudee bak keumeunyan

Habeh patah jaroe singkee  
Moe meuree-ree lon eu sinan  
Teuduek sinan ateueh batee  
Diyub kayee ngon sidroe tan

Teuma lon cok hai panghulee  
Puwoe teuntee ubak makam  
Meunan cagee jihareutoe  
Raja nanggroe seuot rijang

Pat tekeubah teuma jinoe  
Taba keunoe lon meung pandang  
Cuba taba laju keunoe  
Ubak kamoe aneuk insan

Ban cagee ngo meunan ulah  
Jak cok bagah cut analan  
U meuligoe peukek leupah  
Jak peuseumah bak sulotan

Jipeuduek le po samlakoe  
Hadapan nyoe raja makam  
Teuma beudoh po samlakoe  
Mumat jaroe ngon sulotan

Badan saket rumon asoe  
Sang bagoe nyawong ka hilang  
Oh sare mumat jaroe  
Duek samlakoe dihadapan

Hireuen Raja Indra Sakti  
That juhari oh neupandang  
Hana lawan barangkari  
Jeuep-jeuep nanggri tan teuladan

Teuka gaseh dalam ate  
Raja duli buka kalam  
Wahe aneuk nyang juhari  
Lon tanyong kri tapeugah ban

Pat bu gampong bunda abi  
Soe geurasi nama intan  
Lon eu gata cit seundiri  
Ho peureugi tabeujalan

Peue nan nanggroe nyak puteh di  
Peue meuncari dalam utan  
Peugah aneuk ubak kamoe  
Tajak keunoe peue pintaan

Nanggroe jeuoh hana sabe  
Nanggroe Meuse teumpat makam  
Asim bin Sifun nama abi  
Peurmaisuri bunda laman

Saiful Muluk lon geurasi  
Lon peureugi jak lam utan  
Lon boh gampong jak dalam gle  
Susah ate ulon tuan

Nyang jeuet deelat lon boh nanggroe  
Seutot lumpoe hai junjongan  
Badi' Jamaloi nyang lon lumpoe  
That sambinoe bungong keumang

Rupa indah hana bagoe  
Jeuep-jeuep nanggroe tan teuladan  
Muluk Cahya ayah putroe  
That seureuloe dalam alam

Mat keurajeuen peuet boh nanggroe  
Nyang phon Bumboi geurasi nan  
Idan Gamba teumpat putroe  
Le that bagoe dum mainan

Nan nyang keulhee nanggroe Cahya  
Indah rupa hana lawan  
Dipasi kon troh u rimba  
Meuploh laksa dum pahlawan

Nan Bustarum nyang peuet nanggroe  
Ayah putroe peurintah kan  
Luahpi that hana bagoe  
That seureuloe ayah intan

Pat nanggroe nyan tuanku droe  
Ubak lon nyoe neupeugah ban  
Meunan banta dum neurawe  
Ka teupike disulotan

Teuma seuot Indra Sakti  
Hai boh ati ngo lon tuan  
Han lon tupat hai samlakoe  
Han tom peue roe lon deungoran

Lon deungo gah bak uroe nyoe  
Samlakoe gata tanyong ban  
Meunan sabda raja nanggroe  
Po samlakoe susah han ban

Teuduek tahe po samlakoe  
Ka neuiem droe bungong mancang  
Teungoh pike meudeh meunoe  
Keunan sampoe jibeuot hidang

Bue himbee cagee sinaroe  
Lam meuligoe dum dendayang  
Tahe mandang po samlakoe  
Neukalon nyoe dum binatang

Ban neukalon sangat ragoe  
Binatang nyoe miseue insan  
Teuma banta buka seuhab  
Makan leugat bungong keumang

Dum makanan nyang lazat-lazat  
Bukon ajab oh neupandang  
Makeuen dua deungan deelat  
Makeuen sapat saboh hidang

Oh lheueh makeuen neusrah jaroe  
Cagee peutoe pinah hidang  
Tarek puan po samlakoe  
Makeuen dudoe sirih pinang

Hingga malam le ngon uroe  
Po samlakoe jak tiduran  
Banta ek lam keulambu gaca  
Sapat dua ngon sulotan

Ateueh bantai kaso sutra  
Banta muda teungeut pangsan  
Hingga beungoh uroe faja  
Bandua ka jaga yoh nyan

Beudoh laju jak srah muka  
Jeb ie kahwa teuma lheueh nyan  
Pajoh ruti asoe kaya  
Peue nyang suka ka na sinan

Dum makanan rupa-rupa  
Disinan na sang lam peukan  
Teuma beudoh poteu raja  
Yue cok banta muda seudang

Yue boh ubat ceupet urot  
Samlakoe cut that neusayang  
Nak phui tuboh puleh atot  
Putik rambot lam keunarang

Meunan sabe beungoh seupot  
Ceupet urot dum dendayang  
Cagee himbee dum peulara  
Jiusaha cut bangsawan

Meunan sabe padum masa  
Lam jijaga page peutang  
Hingga teuma hai seedara  
Meuthee sigra ban saboh nyan

Dalam nanggroe meuthee haba  
Na lam kuta sidroe insan  
Cit geunaseh poteu raja  
Baro teuka keunan datang

Dum na rakyat margasatwa  
Dalam kuta jitron curam  
Binatang gle asoe rimba  
Ka troh teuka dum u dalam

Jak meuteumeung deungon banta  
Ban nyang kada me haluan  
Geunap uroe sabe teuka  
Hana reuda siat reunggang

Han ubah ban manusia  
Meunan rupa ngon teuladan  
Geunap uroe meunan sabé  
Binatang gle meunan datang

Saiful Muluk ka teupike  
Dalam ate neulahe tan  
Bit raja nyoe le that sakti  
Fie budi jroh hana ban

Hana meunoe barangkari  
Hamba Rabbi that bantayan  
Meunan banta leumah pike  
Dalam ate tan laheran

Bak simalam ngo lon rawi  
Indra Sakti neumeukalam  
Ubak banta neupeugah kri  
Tadeungo hai uleebalang

Bek le susah hai samlakoe  
Deungo jinoe lon peugah ban  
Dang meuteumenng nyang talumpoe  
Piyoh sinoe gata intan

Oh mate lon gata gantoe  
Lon samlakoe aneuk ku tan  
Nyoekeu teumpat takeurajeuen  
Dalam mideuen ulon tuan

Nanggroe luah hana peue kheun  
Gle ngon uteuen rimba Tuhan  
Rakyat rame han teupeugah  
Kafilah meulaksa kuyan

Badeuk rimueng lutong gajah  
Himbee reungkah kala pisan  
Nyankeu rakyat ka lon peugah  
That bahrullah jen ngon syeitan

Meunan sabda raja nanggroe  
Po samlakoe seuot rijang  
Deelat ampon raja kamoe  
Tango jinoe lon peugah ban

Han jeuet ulon lom mat nanggroe  
Goh lom sampoe hajat laman  
Meung goh lom meuteumeung putroe  
Teugoe-goe ate didalam

Lon jak sabe seutot putroe  
Meung goh sampoe nyawong hilang  
Meunan seumah po samlakoe  
Raja nanggroe seungab kalam

Hana panyang lon hareutoe  
Kuweuet jaroe ulon tuan  
Nyoe lon peugah keu samlakoe  
Tango adoe sikalian

Na peuet buleuen sinan laloe  
Lam meuligoe bak sulutan  
Hingga teuma bak siuroe  
Samlakoe ate seulindan

Nyang teuringat cit keu putroe  
Malam uroe barangkajan  
Ubak raja neupeugah proe  
Ampon kamoe po junjongan

Idin keu lon tuanku droe  
Bak uroe nyoe lon beujalan  
Meung na umu rijang lon woe  
Tuanku droe bek susahan

Meunan seumah po samlakoe  
Raja nanggroe seuot rijang  
Idin bak lon aneuk jinoe  
Mita putroe bungong keumang

Lon paban bah hai samlakoe  
Gata sidroe han jeuet lon tham  
Meunyo meunan bungong geutoe  
Beudoh jinoe tabeujalan

Ulon paban sayang jinoe  
Gampong nanggroe lon tupat tan  
Meunyo meunan bungong geutoe  
Samlakoe beudoh beujalan

Beuseulamat sigala syoe  
Tuhan sidroe bri.leupasan  
Bumeuteumeung sinyak putroe  
Beutroh tawoe bak lon tuan

Sinoe aneuk lon leueng jaroe  
Samlakoe umu beupanyang  
Meunyo meunan hai samlakoe  
Tadeungo nyoe intan karang

Adat lon bri kuta nanggroe  
Hai samlakoe cit takheun han  
Nyoe neuaneuk bungong jaroe  
Bak lon sidroe nyang laen tan

Raja suet euncien bak jaroë  
Mata pудoe that analan  
Neujok laju keu samlakoe  
Sira meunoe lom neukheun ban

Meunyo na buet uroe dudoe  
Lon samlakoe tateuoh nan  
Indra Sakti nama kamoe  
Bak euncien nyoe meusurat nan

Troh lon teuka bak aneuk droe  
Oh samlakoe taseubot nan  
Nyan wasiet lon bek taubah  
Hai meutuah barangkajan

Beudoh aneuk tameulangkah  
Tulong Allah po ku Tuhan  
Beuphet kulet mangat asoe  
Beutroh tawoe bak lon tuan

Meunan narit raja nanggroe  
Po samlakoe that sukaan  
Sambot euncien mata pудoe  
Sok bak jaroë bungong peukan

Banta beudoh mumat jaroë  
Di meuligoe neutron rijang  
Teubiet kuta jak lam nanggroe  
Troh sampoe lam rimba Tuhan

Ka neuek cot tron paloh  
Teubiet reuoh basah badan  
Jeuep-jeuep alue habeh neubloh  
Lam geurukoh neuseueng ibrang

Han teuringat rimueng pajoh  
Puteh leusoh leupah sayang  
Malam uroe hana piyoh  
Neujak sunggoh hana lawan

Na sibuleuen neujak sabé  
Didalam gle rimba Tuhan  
Habéh neubloé lam-lam awe  
Siluweue han le puntong sikhan

Po banta cut susah ate  
Han neupike nyawong hilang  
Banta muda peusak ate  
Didalam gle rimba Tuhan

Teutap banta jak dalam gle  
Laen syawe lon karangan  
Mbon sititek ie laot peh  
Aneuk bileh jiuet sampan

Jinoe bacut lon boh ranteh  
Meung silapeh sira wayang  
Keureutah keumang kalam beureuteh  
Hana aref lon hai rakan

Lon seumurat meucureh-cureh  
Bek neukheun seh keu lon tuan  
Punggong keuboh mata peudeh  
Gatai beuteh saket badan

Uroe malam lon teumuleh  
Ulon eh oh jula malam  
Dayah U Paneuk meuseujid tuha  
U timu ka meunasah lawang

Han lon ingat teungeut mata  
Han lon kira payah badan  
Meunankeu hai ulonteu nyoe  
Ka sidum noe grak bak Tuhan

Bah le seungab nyang haba nyoe  
Laen jinoe lon karangan  
Bitpi laen lon peugah proe  
Teumon ngon nyoe hai buleuen trang

Meunasah Geuntong meunasah Lhok  
Situmpok gampong Beurawang  
Ayat laen ulon pakhok  
Bek le kawok wahe rakan

Tajak u blang pot bungon crot  
Pileh nyang got wahe nyak ti  
Amma bakdu bakong teuwot  
Teuceundot laju bak gusi

Sidroe raja ulon ceukot  
Deungo beugot wahe akhi  
Tajul Muluk nan sultan  
Tango teelan ulon rawi

Ngon meugah that hana lawan  
Meusyeuhuran jeuep-jeuep nanggri  
Meuploh ribee dum pahlawan  
Taeu badan ban geugasi

Nama nanggroe Hindustan  
Luah han ban nanggroe duli  
Nan Sirinden saboh nanggroe  
Nyan hai adoe ka lon rawi

Di raja nyan aneuk sidroe  
Ureueng binoe that juhari  
Geurasi nan putroe Khaton  
Nyan aneuk phon raja duli

Lam neutimang ngon neuukon  
Lam neudong-dong hana khali  
Beungoh seupot lam neuayon  
Lam neuukon doda idi

Galakneu that puteh sabon  
Neuwa neucom hana khali  
Hingga rayek putroe Khaton  
Umu nam thon ka na cut ti

Raja peugot saboh meuligoe  
Bak duek putroe laen neubri  
Ngon dendayang dua blah droe  
Keu ngon putroe soe peuduli

Sidroe sahbanda jaga putroe  
Nam reutoh droe rakan neubri  
Hana jieh malam uroe  
Kawai putroe bek gob taki

Meuligoe jroh hana lawan  
Pudoe intan cawareudi  
Geusalob meuh tameh lapan  
Hana lawan barangkari

Di meuligoe mon ngon bagan  
Teumpat intan jak meusuci  
Teumpat manoepi disinan  
Bak srah pingan ngon srah gaki

Dilua kuta dalam padang  
Saboh taman that juhari  
Lom ngon luah tan seupadan  
Bunga-bungaan le han sakri

Saboh bale dalam taman  
Pudoe intan dum geusundi  
Dileuen bale saboh kulam  
Turab intan jroh han sakri

Rupa jroh that oh tapandang  
Lang geumilang wahe akhi  
Nyankeu teumpat sinyak putroe  
Troh bak gantoe tren jak mandi

Sibuleuen siblet tron u bumoe  
Jak manoe putroe juhari  
Nyoepi meunan wahe adoe  
Tango jinoe ulon rawi

Kheundak Tuhan poteu sidroe  
Sinyak putroe jeuem teukeudi  
Jak lam taman bak sidroe  
Peumeuen droe po juhari

Dalam taman jak meuhayon  
Teungoh keubon bale sari  
Ngon dendayang yak meuron-ron  
Putroe Khaton jijak dudi

Nakeu watee asa uroe  
Sinyak putroe jak meusuci  
Manoe jilhon sinyak putroe  
Goh lom sampoe umu cut ti

Teungoh manoe sinyak putroe  
Teuka sidroe biek jen pari  
Jicok laju sinyak putroe  
Jimat jaroe deungon gaki

Jipeupo le tajam han ban  
Sinyak putroe ka jitaki  
Han teubiet su watee jimoe  
Hantu pindoe le sakti

Dendayang ngieng han le putroe  
Jipoh-poh droe hana sakri  
Habeh jimoe dum sinaroe  
Gadoh putroe teungoh mandi

Jieu keudeh jingieng keunoe  
Han meubunyoe cut putroe ti  
Susah ate dum sinaroe  
Takot paloe nibak duli

Neupoh mate dum geutanyoe  
Watee tawoe keunong tadi  
Teuma jikheun le nyak sunoe  
Tango kamoe dumteu sare

Jak tariwang u meuligoe  
Jak hareutoe ubak duli  
Adat neupohpi taiem droe  
Nibak lon nyoe meunan pike

Nibak gata pakri bagoe  
Cuba kheun proe lon deungo kri  
Sinyak Lilan seuot meunoe  
Nibak kamoe hana pakri

Ban nyang pakat gata sidroe  
Bandum kamoe tan meuungki  
Keumah pakat dum sinaroe  
Laju jiwoe ubak duli

Jiek laju u meuligoe  
Bandum jimoe ngon meu'i-i  
Deelat ampon tuanku droe  
Han le putroe cut puteh di

Tahe hireuen bandum kamoe  
Teungoh manoe gadoh cut ti  
Kamoe mita keudeh keunoe  
Ban sijak nyoe han meuho li

Tan meuteumeung cut sambinoe  
Saleh putroe ka jen taki  
Han jan habeh jihareutoe  
Ayah putroe seumpom gaki

Sira neukheun laju meunoe  
E sambinoe nyak juhari  
Peue cit kaeu kah sinaroe  
Gadoh putroe han meuho li

Keu peue guna aneuk bisoe  
Keu putroe han jipeuduli  
Beungeh raya hana bagoe  
Neuheu dudoe teuma wazi

Hai syahbanda tajak keunoe  
Ayah putroe tanyong cut ti  
Ho ka taba sinyak putroe  
Aneuk kamoe ho peureugi

Soe na tamong lam meuligoe  
Jak cok putroe nyang juhari  
Po syahbanda seuot meunoe  
Ampon kamoe wahe duli

Hana leupah barangkasoe  
Pinto beusoe kong lon gunci  
Kamoe kawai malam uroe  
Jaga putroe bek gob taki

Lom neuseuot raja nanggroe  
Bek kreueh gigoe gata wazi  
Tajak mita jinoe putroe  
Jeuep-jeuep nanggroe tajak sudi

Dilon aneuk cit nyan sidroe  
Bak uroe nyoe han meuho li  
Meuhan meuteumeung ingat keudroe  
Ban sinaroe kah kugasi

Aneuk lon nyoe sang kapubloe  
Cut sambinoe keu pancuri  
Kupoh mate ban sinaroe  
Gaduh putroe hana meukri

Tajak seutot laju jinoe  
Aneuk kamoe tajak sudi  
Meuhan meuteumeung sinyak putroe  
Ban sinaroe kukoh gaki

Meunan narit raja nanggroe  
Beudoh jinoe dum sipai  
Dum na rakyat mita putroe  
Jeuep-jeuep nanggroe jijak sudi

Rakyat jijak dum meuron-ron  
Nyang ladom tron bineh pasi  
Jijak mita putroe Khaton  
Jeuep sigala don jijak sudi

Habeh jijak banda duson  
Ka meuron-ron dum sipai  
Tinggai raja di meuligoe  
Deungon putroe peurmaisuri

Neumoe sabe malam uroel  
Ingat putroe han meuho le  
Neuseumpom droe keudeh keunoe  
Sabe neumoe hana khali

Oh neuingat aneuk gadoh  
Ate reuloh peurmaisuri  
Sabab aneuk cit nyan saboh  
Cut putroe jroh moe meu'ii

Putroe bae jimeuraoh  
Neuteuoh keu aneuk han le  
E hai aneuk bungong jurnaloh  
Soe lon-teuoh gata han le

Peurmaisuri dada neupoh  
Sangat reuloh dalam hate  
E hai aneuk bungong peukan  
Gata ka tan cut puteh di

Oh lon ingat hanco badan  
Taba sajan lon hai nyak ti  
Keupeue guna gleueng ngon subang  
Gata ka tan keusoe lon bri

Wahe aneuk bungong uroe  
Reudok tampoe han le meuri  
Lon meujaga malam uroe  
Cut putroe lon doda idi

Han le gata aneuk Khaton  
Ho kujak lon nyak puteh di  
Keu peue guna bantai suson  
Blang ngon gampong soe peuduli

Bukon sayang lon eu peutoe  
Ka meupaloe gadoh gunci  
Neumoe sabé raja nanggroe  
Neupoh-poh droe peurmaisuri

Teuoh guna deungon budhoe  
Keu aneuk droe weueh that ate  
Jeuet keu dum nan bae putroe  
Panyang rampoe hana meukri

Muwoe kisah ureueng nanggroe  
Geunap uroe mita cut ti  
Tan meuteumeung sinyak putroe  
Rakyat dum woe ubak duli

Cit syahbanda nyang goh lom woe  
Nam reutoh droe ngon keulasi  
Habeh jijak jeuep-jeuep nanggroe  
Sinyak putroe jijak sudi

'Amariah jijak sampoe  
Nyankeu nanggroe apa cut ti  
Nama raja lon hareutoe  
Apa putroe Muluk Ali

Judo raja saboh putroe  
Nama meusoe Keumala Sari  
Syahbanda keunan ka sampoe  
Nam reutoh droe ngon keulasi

Jihadap le raja nanggroe  
Beuet jaroe dua tinggi  
Deelat ampon tuanku droe  
Lom ka sampoe datang mari

Lon jak mita tuan putroe  
Jeuep nanggroe lon peureugi  
Putroe Khaton ka meupaloe  
Bak siuroe jeuem teukeudi

Hana meuho teungoh manoe  
Tuan putroe sang jen taki  
Meuhan meuteumeung tuan putroe  
Bandum kamoe keunong gasi

Hana jeuet woe le meung sidroe  
Meung tan putroe pututong gaki  
Han jeuet habeh jihareutoe  
Neupoh-poh droe Muluk Ali

Neumoe yoh nyan raja nanggroe  
Ngon putroe keumala Sari  
Oh neuingat ate seungkoe  
Sinyak putroe han meuho li

Hana panyang lon hareutoe  
Moe cut putroe deungon duli  
Hingga lheueh nyan teuma dudoe  
Raja nanggroe kheun bak wazi

Hai Syahbanda tango kamoe  
Lon kheun jinoe tadeungo kri  
Meunyo han jeuet woe u nanggroe  
Bah le sinoe tabeureunti

Bandum gata teuduek sinoe  
Bak kamoe neupajoh gaji  
Ulon bri boh dum sinaroe  
Kawai nanggroe deungon pasi

Meudang meuteumeung sinyak putroe  
Jeuep-jeuep nanggroe tayue sudi  
Syahbanda seuot le meunoe  
Ampon kamoe diyub gaki

Baranggapeue ulon ikot  
Adat neucarot ulon rali  
Bah le kamoe jaga laot  
Ban nyang patot neubri gaji

Sabda raja ulon ikot  
Hana patot dawa dawi  
Yoh nyan syahbanda jaga laot  
Beungoh seupot jak u pasi

Taeu rakyat kalang kalot  
Bineh laot ula ili  
Urueng nanggroe jak meuengkot  
Ban nyang patot jicok wase

Meuhan jibri ka jidhot-dhot  
Keunong carot bak po wazi  
Jalo kawe jalo pukat  
Jicok adat barangkari

Meusabohpi hana silab  
Baranggapat jikumisi  
Eungkot jareng eungkot pukat  
Ngon eungkot blat bandum sare

Han jeuet publoe baranggapat  
Ba u darat bayeue wase  
Meunankeuh buet suroh deelat  
Teuduek siat oh nan lanti

Saboh haba oh noe teutap  
Laen sahbat ulon rawi  
On teureutoe eumpeuen ulat  
Boh pisang klat eumpeuen nuri

Putroe Khaton lon riwayat  
Jiba leugat le jen pari  
Dalam awan peupo pantah  
Putroe ceudah aneuk duli

Dalam rimba sampie sudah  
Ngo lon peugah wahe akhi  
Saboh meuligoe rupa indah  
Deungon luah hana sakri

Po meuligoe ngo lon peugah  
Bek jeuet salah lon hai nyak ti  
Nabiullah Noh po naseukkah  
Geunaseh Allah poku Rabbi

Keunan putroe jijak keubah  
Bungong mirah nyang juhari  
Sira jikheun meunoe ulah  
Bek le susah bungong giri

Sinoe taduek hai meutia  
Peue nyang suka ulonteu bri  
Peue nyang nafsu galak gata  
Tapinta bak lon hai nyak ti

Meunan narit jen ceulaka  
Putroe rugha hana sakri  
Lheueh jipeugah dum sibarang  
Po lam awan di jen pari

Jijak tapa dalam awan  
Oh troh bak jan jikeumbali  
Uroe Jumu'at ngon seunanyan  
Troph jiriwang u meuligi

Sajan jime saboh hidang  
Didalam meuribee bagi  
Han tatupeue peugah macam  
Makanan nyang lazat jati

Oh ban sare troh jiriwang  
Peiduek hidang ateueh peuti  
Lheueh nibak nyan hantu pindoe  
Jicom putroe nyang juhari

Jicom jiwa hana bagoe  
Galak han soe po jen pari  
Buet nyang salah hana sampoe  
Tuhan sidroe han neurali

Lheueh jicom-com putroe muda  
Peugah haba po jen pari  
Sinyak putroe nak bek rugha  
Jen cilaka peugah cakri

Ka jipeugah dum keu hai droe  
Sinaroe habeh jirawi  
Hana habeh lon hareutoe  
Bah le dudoe takeulayi

Lheueh nibak nyan jen cilaka  
Dalam hawa jipeureugi  
Sinan jiduek dalam tapa  
Troph bak masa jikeumbali

Meunan sabé jeuep kutika  
Seungab haba oh noe lanti  
Teuduek oh noe saboh leua  
Peuet rupia nam blah tali

Ayat laen ulon tuka  
Ban nyang kada ulon rawi  
Siat sapeue ayat lon ba  
Sang-sang gura bak lon pike

Simpang Ulim toe ngon Julok  
Idi Rayek toe Peudada  
Amma Bakdu bakong mabok  
Oh tateugok that meurasa

Meuwoe kisah Saiful Muluk  
Tango beutrok lon calitra  
Dalam huteuen neujak seuntok  
Bungong tajok sayang raya

Neubloh alue jeueb-jeueb pucok  
Neumasok rata jeueb rimba  
Jitoh hujeuen tam tum reudok  
Seubak seubok han neukira

Ngon geulanteue rayek-rayek  
Meugeureutok ujeuen raya  
Bitpi meunan hana dawok  
Banta seuntok arong rimba

Bukon sayang aneuk jampok  
Mata rayek hibat rupa  
Bukon sayang Saiful Muluk  
Ka sarok didalam rimba

Banta neumoe meusok-meusok  
Ate jurok aneuk raja  
Sabe neujak ho-ho nyang troh  
Droeneu peujok bak Rabbana

Bukon sayang bungong keumbee  
Meuhambo bee angen teumpa  
Banta piyoh diyub jambee  
Moe meuree-ree ngon ie mata

Duek teupako tumpang ulee  
Hana lagee sayang raya  
Uroe malam hana neuthee  
Bu han tom bee le neurasa

Banta pajoh boh-boh kayee  
Peue meuteumee dalam rimba  
Pihak duek pruet habeh lagee  
Bungong keumbee sayang raya

Bukon sayang tok beuragoe  
Jigeurudoe kayee raya  
Bukon sayang po samlakoe  
Han le asoe tinggi rungka

Bu han tom na jeueb-jeueb uroe  
Meungkon le droe banta muda  
Nibak Tuhan neupeujok droe  
Neuleueng jaroe lakee do'a

Ya Tuhanku po di kamoe  
Hambateu nyoe that seungsara  
Han saho troh lam rimba nyoe  
Tulong kamoe Ya Rabbana

Tan pat laen lon peugah droe  
Tuhan sidroe that kuasa  
Oh sare lheueh neumohon droe  
Rahob jaroe ubak muka

Beudoh laju cut samlakoe  
Neujak sidroe lon lam rimba  
Peusak untong bungong geutoe  
Huteun duroe han neukira

Tan neupioh malam uroe  
Hingga sampoe saboh rimba  
Rimba seupot huteuen duroe  
Bloh samlakoe laju sigra

Tan le pioh malam uroe  
Seungkoh asoe jalan safra  
Na peuet buleuen neujak sidroe  
Ka troh sampoe ubak kuta

Leumah neueu kuta beusoe  
Banta peutoe keunan sigra  
Neungieng kuta jroh peuet sagoe  
Pinto beusoe gunci hana

Lam kuta saboh meuligoe  
That seureuloe ceudah rupa  
Tameh lapan meuh sinaroe  
Meuligoe salob suasa

Nabiullah Noh po meuligoe  
Yoh saboh roe ka neurungka  
Tahe mandang po samlakoe  
Teukab jaroel neungieng rupa

Ka teupike bungong geutoe  
Lam hate droe hana nyata  
Soe keurajeuen lam kuta nyoe  
Disinoe lam rimba raya

Ureueng hanapi meusidroe  
Soh meuligoe ngon astana  
Meunan pike po samlakoe  
Sira peutoe pinto kuta

Dalam ate meusoe gumoe  
Meuligoe nyoe na eumpunya  
Na ureueng po bak teumpat nyoe  
Saleh soe-soe pane raja

Kadang cit na nyang lon lumpoe  
Lam meuligoe aneuk raja  
Kadang Tuhan neupeusampoe  
Nyang lon lumpoe sinoe nyata

Bah lon tamong kaman jinoe  
Lon jak eu nyoe dalam kuta  
Neubuka le pinto beusoe  
Po samlakoe tamong sigra

Ubak Tuhan neupeujok droe  
Troh samlakoe leuen astana  
Neuek laju lam meuligoe  
Neue sidroe ureueng hana

Tulak pinto mangat bunyoe  
Troh u ramoe banta muda  
Buka tabeng deungon jaroe  
Crang-crang bunyoe meusu geunta

Saiful Muluk di seuramoe  
Kalon bagoe rupa rupa  
Neueu tabeng ngon keuleumbu  
Ayu-ayu ban seulingka

Saiful Muluk ate rindu  
Tamong laju lam astana  
Neungieng tingkap meuceureumen  
Tulak angen sisek naga

Lam meuligoe banta meuen  
Ate ingin hana tara  
Po banta dong di seuramoe  
Keudeh keunoe neungieng lingka

Neueu ureueng tan meungsidroe  
Inbat meunoe banta muda  
Sira banta neukheun meunoe  
Di seuramoe neumeurika

Bukon sayang that meuligoe  
Han le asoe soh seumua  
Han le raja deungon putroe  
Dum sinaroe ka seurapha

Hana tinggaipi meusidroe  
Soh meuligoe sayang raya  
Cut banta ngieng keudeh keunoe  
Di seuramoe ban seulingka

Leumah neungieng saboh pinto  
Banta tajo neujak buka  
Oh ban sare teuhah pinto  
Leumah neueu tire rawa

Neulob tabeng ayu-ayu  
Lom keuleumbu crang cring geunta  
Samlakoe cut ate rindu  
Leumah neueu aneuk dara

Ban neukalon dara baro  
Ateueh kaso sang peulita  
Hana sapeue teubiet tuto  
Nyang na tahe keunan mata

Rupa jroh that sinyak putroe  
Barangkasoe hana nyang sa  
Kulet puteh na sang uroe  
Kilat gigoe dum peurmata

Peukayan hu indah nibak han soe  
Intan pudoe ngon meutia  
Saiful Muluk ate lakoe  
Neungieng Putroe sang ka gila

Tahe mandang po samlakoe  
Meujak muwoe nyan dilua  
Sang neujeuet han keunan peutoe  
Neungieng putroe ate suka

Banta peurab teuma dudoe  
Sinyak putroe neukeumeung wa  
Baro keumeung meugrak jaroe  
Samlakoe teuringat sigra

Dalam ate ingat meunoe  
Ulon sidroe rab cilaka  
Kadang biek jen sinyak putroe  
Meuhat paloe lon binasa

Meunan pike po samlakoe  
Surot jinoe le u lua  
Banta surot u seuramoe  
Ate wawoe dalam dada

Sajak panton kheun samlakoe  
Tango bunyoe mangat raya  
Mahok puteh bulee sabon  
Jitoh boh phon dalam raga

Beudoh putroe cut meuuhon  
Ka troh ulon saweue gata  
Mirahpati bulee hijo  
Aneuk tulo dalam ceuntra

Beudoh pocut dara baro  
Ka troh linto judo gata  
Puteh-puteh bungong meulu  
Nyang mirah hu bungong jeumpa

Bek le taeh lam keulambu  
Beudoh laju lon ka teuka  
Beudoh cut nyak bintang timu  
Nyoe pat teungku dong dilua

Ban jideungo meunan laku  
Putroe bungsu beudoh sigra  
Putroe salob ngon keulambu  
Bee meuharu mawo ata

Jigisa le keue u timu  
Leumah jieu banta muda  
Hana sapeue teubiet tuto  
Nyang na tahe atueuh banta

Dalam ate ka teusawo  
Jeuet keu judo bak jikira  
Sinyak putroe ate rindu  
Oh ban jieu sang beujiwa

Galak ate kon sigeutu  
Tan jimeusu jingieng saja  
Puleh hireuen sinyak putroe  
Jipaleng droe beudoh sigra

Cok rampagoe mat u jaroe  
Lason jinoe pineueng muda  
Puliek pineueng panca lugam  
Masak plah nam muda plah dua

Putroe suliek tajam-tajam  
Cok geurandam sijudo dua  
Jicok ranub limong supeh  
Jipileh nyang gura-gura

Jiboh keunoe ka roh keudeh  
Cut puteh laloe ngon banta  
Jiboh ranub dalam bate  
Mata sabé atueuh banta

Tangke jikoh han taturi  
Buet sinyak ti utoh raya  
Jiboh ranub surang-sareng  
Sang keurubeng papeuen bahtra

Bungong lawang lom jipateng  
Jipuseng bakong meulila  
Di Aceh kon sampoe u Kleng  
Hana bandeng oh tapeusa

Hase ranub dalam karah  
Putroe indah jak seumupa  
Bacut-bacut jibeuot langkah  
Bee meupeuah minyeuk ata

Ceurana meuh ka jihayak  
Meugrak-grak oh santot dada  
Keun~~ong~~ rakam watee jijak  
Jitulak geurancong ija

Jitiek aleh leuntek linto  
Ulee baho sang meugisa  
Ban sare troh babah pinto  
Tadeungo syo jiseumapa

Kayee ramphak jroh hijo on  
Meuhimpon cicem lam rimba  
Naneu keunoe teungku ampon  
Jak saweue lon po meukuta

Kureueng majeulih kamoe duson  
Meuah ampon lon adekda  
Dua lhee go sapa putroe  
Po samlakoe seuot sigra

Bintang kala jroh meutaloe  
U nanggroe leumah cuaca  
Neubo kamoe bungong geutoe  
Ka troh keunoe ubak gata

Teuma putroe geuba bate  
Neusambot le banta muda  
Sira jikheun haba mise  
Bungong pade le bicara

Koh bak maken keu bajoe weue  
Awe tabeue peugot raga  
Nyoe tuanku ranub tabeue  
Leupueng pageue kureueng rasa

Bek he deelat neukheun sapeue  
Masen tabeue bek neukira  
Ranub uteuen pineung boh awe  
Lon dalam gle jarak banda

Bek tuanku saket ate  
Han meusampe kureueng rasa  
Meuhong anyi bek neupike  
Bek neuruhe lon meukuta

Meunan narit bungong pade  
Neuseuot le banta muda  
Kru seumangat he sambinoe  
Bak lon adoe that mulia

Bak gata nyak na sidumnoe  
Nibak lon nyoe sapeue hana  
Bak gata nyak ranub uteuen  
Bak lon buleuen seulaseh jawa

Di lon putroe ek lon makeuen  
Bek takheun-kheun sapeue haba  
Bak adek pineung boh awe  
Bak lon mise sang meutia

Di lon putroe han sapeue le  
Treb lam gle ka lon bungka  
Han peue lon bri hai boh ate  
That meusampe lon adekda

Meukri ret deh meukri ret noe  
Ban dua droe utoh raya  
Meuseuot sambot ban dua droe  
Sinyak putroe deungon banta

Lale banta pajoh ranub  
Beudoh pocut maguen sigra  
Putroe cok breueh boh lam kanot  
Meumot-mot ate keu banta

Jiboh sikai roh siare  
Cut putroe ple roh lam guha  
Jitaguen bu deungon gule  
Hana lale sunggoh raya

Jicroh eungkot meuse kuble  
Sang di keude kon lam rimba  
Sare masak sikalian  
Cut intan dalong jihila

Jipasoe le bu lam pingan  
Ato cawan ban silingka  
Cawan ubit cawan sabon  
Putroe cok phon cawan sira

Ato leugat dalam dalong  
Cawan mangkong keu panglima  
Jiboh eungkot meukaleueng peueng  
Peunoh dalong cawan lingka

Saboh cawan eungkot kirong  
Beurambong deungon beulama  
Saboh cawan boh sie teucroh  
Saboh jiboh sie meucuka

Saboh cawan eungkot meuneng  
Keurimen deungon beulana  
Saboh cawan eungkot kareng  
Seureundeng ngon ceuriek buta

Saboh cawan jiboh rapang  
Beulideueng deungon jeunara  
Saboh cawan eungkot taleueng  
Saboh jilheueng reundang jawa

Saboh cawan udeueng lipeh  
Jipeueh ngon udeueng tima  
Saboh cawan eungkot bileh  
Ret noe ret deh eungkot raya

Saboh cawan ikan gapah  
Jiboh siblah eungkot paya  
Saboh cawan eungkot seungko  
Ngon aneuk gro jampi dua

Saboh ceupe boh itek jruek  
Jipeuduek boh manok dua  
Lam mangkong lhok jiboh gule  
Ceupe leunde campli sira

Jiboh rot wie eungkot taguen  
Boh rot uneun eungkot raya  
Hidang cukop ka jipasoe  
Tob cut putroe sange raya

Han sapeue tan lam meuligoe  
Sabab putroe jen pari ba  
Meunyo buet jen han peue tanyong  
Bit lam gunong sang lam banda

Sinyak putroe ulon seumong  
Kheun beukeunong bek meutuka  
Putroe beuot hidang laju  
U nab teungku banta muda

Cut putroe kheun narit payu  
Jaroe buju di jeumala  
Bintang kutub tanda nanggroe  
Matauroe jroh cuaca

Singet geupet basah jaro  
Tuanku droe makeuen sigra  
Eungkot laot lon deungo gah  
Seulinjuek patah lam piala

Teungku makeuen peue na mudah  
Lon paban bah han sapeue na  
Bek weueh ate po junjongan  
Eungkotpi han ube seuma

Hana malee ulon tuan  
Jeuoh peukan jarak banda  
Ureueng meukat han troh keunoe  
Teumpat lon nyoe dalam rimba

Adat takheun dalam nanggroe  
Na pat lon bloe po meukuta  
Hana malee lon tuanku  
Laju bri bu deungon sira

Meunan narit bungong meulu  
Seuot laju banta muda  
Bukon sayang bak beuraleuen  
Timoh dileuen lam bak capa

Beudoh keunoe hai cut buleuen  
Tajak makeuen sigo dua  
Putroe seuot ngon teuseunyum  
Meunoe jikheun narit seunda

Bukon sayang cicem ujeuen  
Dalam uteuen jijak tapa  
Dilon teungku ban lheueh makeuen  
Jak nyoe siseun ban lagee na

Meunan narit putroe seudang  
Uleebalang seuot sigra  
Ceumpala cut po meulinggang  
Cicem subang po meugisa

Meuhan makeuen hai cut intan  
Pinah kaman hidang sigra  
Tujoh buleuen nyang ka tan bu  
Hai cut bungsu deuk lon hana

Putroe deungo narit teungku  
Beudoh laju duek beuseuma  
Putroe buka hidang laju  
Makeuen teungku sapat dua

Yoh nyan banta ka teukeujot  
Neungieng eungkot rupa-rupa  
Ka teupike bungong rambot  
Sang dilaot kon lam rimba

Banta makeuen ban nyang patot  
Ka neuleugot reundang jawa  
Phon banta cok cawan dikeuc  
Roh aneuk lhu ngon beulata

Le that eungkot han tan sapeue  
Po banta geue ri nyang suka  
Banta makeuen laju rijang  
Ngon cut intan sapat dua

Mangat ate that sukaan  
Ladat han ban bak nyum rasa  
Oh lheueh makeuen pinah hidang  
Putroe tatang ngon ceurana

Putroe cok le ranub lipat  
Peuab leugat keu cut banta  
Ban dua droe ate mangat  
Sukaan that hana tara

Pajoh ranub geboh ie klat  
Banta leugat buka haba  
Ubak putroe banta sisat  
Sinansapat duek seureuta

Mirahpati po meuhuet-huet  
Jisujut ubak seulasa  
Bek weueh ate wahe pocut  
Lon meukeusud tanyong gata

Peue buet adek teidueuk sinoe  
Lam rimba nyoe ngon teuh hana  
Lon eu ureueng tan meung sidroe  
Gata adoe peue bu bangsa

Atawa jen gata putroe  
Atawa soe manusia  
Pat bu gampong deungon nanggroe  
Tapeugah soe ibu bapa

Soe geuboh nan gata putroe  
Peugah jinoe lon ngo nyata  
Han jan habeh banta tanyong  
Cut bungong tijoh ie mata

Soe geuseubot gata putroe  
Peugah jinoe lon ngo nyata  
Banta muda ka teuceungong  
Sang han keunong teupareksa

Hana sapeue le neutanyong  
Duek teuceungong banta muda  
Sinyak putroe seuot meunoe  
Sira moe jimeusuara

Deelat ampon tuanku droe  
Tango jinoe lon calitra  
Bangsa insan ulonteu nyoe  
Ayah kamoe raja raya

Tajul Muluk nama ayah  
Meusyeuhugah sigala donya  
Dua nanggroe neupeurintah  
Kaya limpah du lon raja

Ulonteu nyoe teungku ampon  
Putroe Khaton geuboh nama  
Nan Seurindat nanggroe dilon  
Sinankeu phon ayah raja

Nyang saboh treuk Hidustan  
Luah han ban hai meukuta  
Dua nanggroe po junjongan  
Ayah laman nyang kuasa

Lawet nalan tuanku droe  
Meuligoe laen neurungka  
Saboh kulam lua meuligoe  
Teumpat manoe lon meukuta

Lua kuta saboh keubun  
Bak teumpat lon jak meuupa  
Bak siuroe teungku ampon  
Lon tuan tron jak u lua

Lon Jak laju dalam keubun  
Jak meuhayon sabe dara  
Lheueh meuayon dum na kamoe  
Meujak manoe tutong raya

Teungoh-teungoh meung seumabon  
Hantu jitron soe thee hana  
Jicok laju teuma ulon  
Teungku ampon keunoe jiba

Masa jiba keunoe ulon  
Umu nam thon po meukuta  
Ka jibapo laju keunoe  
Tuwo kamoe dum peukara

Tan lon tupat gampong nanggroe  
Tuanku droe lon jidaya  
Oh sare troh keunoe sampoe  
Bak lon sidroe jikheun sigra

Wahe nyak cut po sambinoe  
Bek le tamoe putroe muda  
Meung na umu uroe dudoe  
Ulon puwoe teuma gata

Sinoe teuduek wahe putroe  
Bak meuligoe ie peureuda  
Teumpat ceudah hana bagoe  
Barangkasoe han troh teuka

Jen ngon insan han troh keunoe  
Bak teumpat nyoe ube nyang ka  
Meunan jikheun hantu pindoe  
Ubak kamoe masa jiba

Ulon susah tahe keudroe  
Dijih laloe peugah haba  
Jipeugah lom teuma meunoe  
Ubak kamoe jicalitra

Na taturi lon hai putroe  
Ayah kamoe raja raya  
Raja Azrang ayah kamoe  
Lam donya nyoe meugah raya

Nama Arzak ulon sidroe  
Nak tatusoe singoh lusa  
Laot Kalzom nama nanggroe  
Lon hai putroe aneuk raja

Sigala jen dalam nanggroe  
Du lon sidroe nyang kuasa  
Lheueh jipeugah dum sinaroe  
Hantu pindoe po lam hawa

Jijak tapa dalam awan  
Barangkajan po meukuta  
Uroe Hameh ngon Seunanyan  
Po junjongan troh jigisa

Nyankeu sabab hana rakan  
Lon jitawan keunoe jiba  
Putroe Khaton seumah meunan  
Banta yoh nyan sret ie mata

Dalam ate teuka sayang  
Cut intan sidroeji saja  
Ingar keudroe lom keumudian  
Ka meulang-lang dalam rimba

Han saho troh dalam utan  
Tinggai nang peuseutot hawa  
Oh teuringat nyan keulumpoe  
Meataloe tijoh ie mata

Sang dimata po samlakoe  
Sinyak putroe ceudah rupa  
Teungoh banta neumoe laju  
Ka meu'u-u dalam rimba

Sinyak putroe kheun bak teungku  
Jeh pat hantu ka jigisa  
Neuweh dilee hai tuanku  
Bek jibalu po meukuta

Dalam bagan neulob laju  
Beudoh teungku jinoe sigra  
Meunan jikheun uleh putroe  
Po samlakoe beudoh lanja

Dalam bagan neujak som droe  
Po samlakoe teumakot raya  
Hantu ka troh u meuligoe  
Jitubee nyoe manusia

Jitanyong le laju meunoe  
Hai sambinoe putroe muda  
Pat bu mayoh bungong geutoe  
Hana bagoe that meutaga

Pane insan ka troh keunoe  
Patkeu jinoe manusia  
Putroe seuot jikheun laju  
Tuanku pakon silab ka

Lon nyoe insan hana neueu  
Pane lalu laen teuka  
Hana dapat roh jilalu  
Tuanku jeuoh that donya

Meunan narit bungong meulu  
Jen hantu seuot sigra  
Bit ban takheun pirak lipat  
Lon ka silab po jroh rupa

Teuma laju le jipeurab  
Putik langsat jijak wa-wa  
Jiwa jicom puteh lumat  
Hantu laknat that cilaka

Meunan sabe geunap uroe  
Hantu pindoe oh jigisa  
Lhee uroe seulang siblet jiwoe  
Jak com putroe sicilaka

Lheueh jicom-com bungong geutoe  
Hantu pindoe po lam hawa  
Bak jitapa lom ka jiwoe  
Tinggai putroe lam astana

Meunankeu hai jen nyan sidroe  
Jijak jiwoe masok tapa  
Haba hantu seungab oh noe  
Laen jinoe ulon rika

Laen lagee ulon karang  
Ban nyang reumbang ulon tuka  
Bek lagee sot han got bagoe  
Meunan adoe pike hamba

Ayat laen ulon gantoe  
Hai teungku droe sang-sang gura  
Di Tiro meunasah Mancang  
Meunasah Blang toe gle Siblah

Amma Bakdu wayang-wayang  
Putik keumang peugot ticah  
Keu cut putroe lom lon ulang  
Tango rakan ulon peugah

Leupah hantu jiteureubang  
Banta seudang jihei pantah  
Teubiet laju uleebalang  
Teupeh ngon rang sret kupiyah

Dalam bagan meuwoe ulang  
Teukhem intan putroe ceudah  
Jibeudoh le sinyak putroe  
Mat bak jaroe ban dua blah

Teubiet laju po samlakoe  
Duek teupipoe cong peuratah  
Teuma marit putroe Khaton  
Jiseuon jaroe dua blah

Di pasi na timoh aron  
Di keubon geupula geutah  
Neupeumeuh teungku ampon  
Tanyong ulon na sipatah

Pat bu gampong tuanku droe  
Neupeugah soe bunda ayah  
Di tuanku nama neusoe  
Neuhareutoe hai deelat syah

Peue meukeusud neujak keunoe  
Troh bak kamoe neumeulangkah  
Peue na hajat neujak mita  
Troh lam rimba neumeupayah

Lon eu rakan hana neuba  
Hai meukuta cuba peugah  
Meunan tanyong sinyak putroe  
Po samlakoe seuot pantah

Awe lilan puta taloe  
Awe jatoe tasok keu klah  
Ka tatanyong wahe putroe  
Tango adoe ulon peugah

Nanggroe Meuse lon hai adoe  
Hana bagoe jeuoh leupah  
Geukheun Yaman saboh nanggroe  
Sinan putroe lon peurintah

Nan Bagdad keu lhee nanggroe  
Sinan putroe rame leupah  
Buniara peuet boh nanggroe  
Hana bagoe rame leupah

Asim bin Sifun ayah kamoe  
Lam donya nyoe meusyeuhugah  
Saiful Muluk nama lon nyoe  
Nyan sambinoe ka lon peugah

Nyang jeuet pocut lon boh nanggroe  
Lon hai putroe ate susah  
Lon pajoh bu han jitem troe  
Dilon adoe ate bicah

Hana teungeut malam uroe  
Ingar lumpoe ate gundah  
Badi' Jamaloi nyang lon lumpoe  
Hai nyak putroe rupa ceudah

Lon jak mita jeuep-jeuep nanggroe  
Sideh sinoe hana meugah  
Masa lon jak hai sambinoe  
Ngon kamoe rakyat bahrullah

Nyang na tinggai ulon sidroe  
Sinaroe laen ka sudah  
Nam ploh limong kapai beusoe  
Ka meupaloe kheundak Allah

Nam ploh ribee rakyat mate  
Hai cut ti han jeuet lon peugah  
Nyang na tinggai hai sambinoe  
Ulon sidroe Tuhan keubah

Han le mupat gampong nanggroe  
Lon hai adoe ate bicah  
Habeh lon boh lam-lam duroe  
Ka troh keunoe bri poteu Allah

Sabe ate lon teugoe-goe  
Akan putroe rupa ceudah  
Meunan banta neuhareutoe  
Sira moe ie mata limpah

Ban putroe ngo meunan bagoe  
Meataloe ia mata jauzah  
Sayangji that keu samlakoe  
Jipoh-poh droe putroe indah

Lom teuringat keu untong droe  
Nyoe ho sampoe hantu keubah  
Teuma seuot po sambinoe  
Sira moe ie mata jauzah

Ampon tuanku tuanku droe  
Tango jinoe ulon peugah  
Badi' Jamaloi nyang sambinoe  
Adek kamoe cut meutuah

Bit tuanku ban neulumpoe  
Sinyak putroe bit that ceudah  
Hana nyang sa ngon jih sidroe  
Barangkasoe jeuep daerah

Diyub langet ateueh bumoe  
Sambinoe rupa that ceudah  
Meunan narit sinyak putroe  
Po samlakoe seuot pantah

Wahe pocut nyang sambinoe  
Pakon meunoe cuba peugah  
Hireuen that lon wahe putroe  
Takheun adoe sinyak ceudah

Jih nyan biek jen gata insan  
Pakri ban seedara tan sah  
Pakri jeuet roh cut bangsawan  
Toh pakri ban cuba peugah

Meunan narit banta seudang  
Seuot rijang cut meutuah  
Deelat ampon po junjongan  
Deungo kaman ulon peugah

Bak siuroe deelat payong  
Bunda ulon neumeulangkah  
Bunda tamong dalam keubon  
Jak meuhayon rab ngon kubah

Teungoh-teungoh neumeuhayon  
Bunda ulon aloh-alah  
Neupoh-poh droe dalam keubon  
Teungku ampon ngo lon peugah

Peurami Ratu nyan putroe jen  
Keunan geutren bineh kubah  
Neue bunda ka meulaen  
Putroe canden boh ie babah

Geucok bunda geujak puwoe  
U meuligoe geujak keubah  
Geuboh ubat teuma dudoe  
Gaki jaroe bandua blah

Bunda puleh deungon siat  
Keunong ubat cut meutuah  
Putroe jok le ngon malakat  
Bunda lihat sambot bagah

Gob nyan gaduh teuma leugat  
Bandum rakyat hireuen leupah  
Lheueh nibak nyan teungku ampon  
Oh troh bak thon troh geulangkah

Sajan geuba puteh sabon  
Adek ulon sinyak ceudah  
Lon jak ba-ba dalam keubon  
Jak meuhayon bineh kubah

Deungon sinyak tuha ulon  
Na sikhan thon bunda peugah  
Nyankeu sabab teungku ampon  
Seedara lon sinyak ceudah

Ka lon peugah bak asai phon  
Bek sang-sang lon mubeurakah  
Meunan narit putroe Khaton  
Putik sukun teuhah babah

Ban dua droe seungab haba  
Cut banta ngon putroe ceudah  
Ayat laen ulon tuka  
Ban nyang gura ulon kisah

Meureudu ngon keude Pangwa  
U barat ka keude Trieng Gadeng  
Amma Bakdu jeuem poh dua  
Teungeut mata panyot lon plen

Muwoe kisah banta muda  
Bandua ngon putroe canden  
Saiful Muluk kheun bak putroe  
Po samlakoe peugah baten

Wahe pocut deungo kamoe  
Lon kheun jinoe puteh licen  
Nyang got bak lon hai sambinoe  
Bah le tawoe bintang canden

Meunyo pocut teuduek sinoe  
Geutanyoe meuhat jeuet keu jen  
Taweh sinoe bek Meupaloe  
Woe u nanggroe bek ho laen

Oh nan baro kheun samlakoe  
Seuot putroe bintang canden  
Han jeuet taweh tuanku droe  
Hantu pindoe biek raja jen

Lon takot jiseutot dudoe  
Geutanyoe nyawong jipeulen  
Nyangkeu sabab tuanku droe  
Hai samlakoe kon han lon tem

Saiful Muluk jawueb meunoe  
Meung na kamoe bek that ngeuren  
Bak ulon poh hantu pindoe  
Aneuk bisoe ulon peulen

Meunyo jiwoe jih lom keunoe  
Bah le kamoe poh raja jen  
Meunyo jiduek ateueh peutoe  
Lon peataloe sianeuk jen

Oh ka mate hantu pindoe  
Beudoh tawoe puteh licen  
Han jan habeh kheun samlakoe  
Seuot putroe bintang canden

Ampon deelat sialam syah  
Ngo lon peugah haba baten  
Meunyo tapoh deungon mudah  
Dami Allah han mate jen

Sabab nyawong ka jipinah  
Hana leumah ka ho laen  
Dalam peutoe ka jibuni  
Saboh nuri rupa canden

Jikeubah lam laot tuwi  
Sinan duli nyawong dijen  
Bitpi meunan wahe deelat  
Nyang mangat that bak tapoh jen

Meunyo ek na nyan malakat  
Teuntee meuhat ka mate jen  
Meusaket that euncien malakat  
Hana sapat hai teungku lem

Meung na euncien bak Sulaiman  
Po junjongan ka jadeh len  
Putroe Khaton peugah meunan  
Banta yoh nyan bacut meukhem

Sira suet euncien di jaroe  
Mata pudoe cahya hu len  
Ka neujok laju bak putroe  
Neukheun meunoe sira neukhem

Nyoe na bak lon euncien beusoe  
E sambinoe puteh licen  
Saleh nyo nyan hai sambinoe  
Euncien lon nyoe sangat lon syen

Meunan neukheun po samlakoe  
Sambot putroe euncien po lem  
Ban jikalon uleh putroe  
That seureuloe cahya hu len

Ka teusinyom sinyak putroe  
Ngieng samlakoe sira peukhem  
Nyoekeu euncien lon kheun bunoe  
Tuanku droe hana laen

Bek le susah po samlakoe  
Hantu pindoe ka jadeh len  
Jadeh mate jen uroë nyoe  
neucok kamoe wahai polem

Neumeukawen ngon lon jinoe  
Sinyak putroe bek le neutem  
Dijeh ka na laen lagoe  
Meugah han soe biek raja jen

Han sipadan tuanku droe  
Sabab putroe bangsa laen  
Bangsa insan di geutanyoe  
Sinyak putroe bek le neutem

Bah le teungku ngon bangsa droe  
Sinyak putroe biek bangsa jen  
Kon peusuna nibak kamoe  
Lon peureunoe wahe polem

Ban tadeungo narit putroe  
Po samlakoe yoh nyan teukhem  
Seungab haba ban dua droe  
Sinyak putroe ngon teungku lem

Laen ayat ulon gantoe  
Bek le meunoe payah lon salen  
Woe nyang mate lon boh jinoe  
Tango adoe ulon putroe

Timoh kayee timoh ukheue  
Keu bajoeue krak bak maken  
Hikayat nyoe mangat u keue  
Beutatupeue wahe nyak ben

Di titeue na Pante Kulu  
Jalan sulu Utueng peudeng  
Maken u keue mangat laju  
Na tamse bu lawan dageng

Bukon sayang bungong geutoe  
Keunong uroe sret meatabu  
Ka lon balek wahe adoe  
Lon boh jinoe amma bakdu

Saiful Muluk kisah muwoe  
Kheun bak putroe bintang timu  
Wahe adek tango kamoe  
Lon kheun jinoe bungong meulu

Napsu ulon bak uroe nyoe  
Sambinoe lon meung poh hantu  
Cuba adek tapeureunoe  
Pakri bagoe lon peulaku

Meunan narit po samlakoe  
Seuot putroe teuma laju  
Deelat ampon deungo kamoe  
Lon peureunoe meung sigeutu

Bineh laot neujak jinoe  
Euncien nyoe jeureundam laju  
Yoh nyan laot jiguyak droe  
Saboh peutoe keunan lalu

Neucok leugat teuma dudoe  
Neuproh peutoe hai tuanku  
Meunan seumah sinyak putroe  
Po samlakoe ate seu u

Meunyo meunan po sambinoe  
Bah uroe nyoe lon poh hantu  
Han lon jeuet jak meunyo sidroe  
Hai nyak putroe pakri laku

Meunan narit po samlakoe  
Sinyak putroe khem sigeutu  
Sira jikheun haba meunoe  
Geusuen tuloe ka tuanku

Han neujak-jak bak uroe nyoe  
Oh na kamoe ate seu u  
Nyang dilee kon neujak sidroe  
Uteuen duroe rimba . 'a'u

Bak uroe nyoe geusuen tuloe  
Ka na putroe soe peuseb bu  
Banta deungo kheun cut putroe  
Po samlakoe kheun sigeutu

Ret deh rot noe tob-tob gigoe  
Bandua droe ate seu u  
Lheueh nibak nyan teuma dudoe  
Neueu uroe ka watee bu

Beudoh leugat po samlakoe  
Di meuligoe neutron laju  
Seureuta deungon sinyak putroe  
Troph sampoe u mideuen leupu

Neumeuinsan neuleueng jaroe  
Samlakoe neuhimpon bantu  
Ya ilahi wa ya Rabbi  
Po lon neubri troh ban napsu

Beureukat bunda deungon abi  
Beureukat wali geusyik intu  
Ngon beureukat Muhammad nabi  
Beu Allah bri troh ban napsu

Neubri kuat ngon beurani  
Ya Rabbi ate bek kuyu  
Ban nyang hajat bu meusampe  
Beumate ulon poh hantu

Lheuen meuinsan bungong pade  
Neubeudoh le neujak laju  
Bineh pasi ka troh sampoe  
Duek samlakoe teuma laju

Neusuet euncien nibak jaroe  
Samlakoe neureundam laju  
Na sikeujab dalam laot  
Teuka ribot ka'a ka'u

Banta muda sang teumakot  
Putiek rambot ate kuyu  
Yoh nyan laot jiguyak droe  
Troph peutoe keunan jilalu

Neucok laju le samlakoe  
Neumat peutoe ka neuampu  
Ateueh batee ka neutadi  
Reuloh gunci peutoe hantu

Oh ban teuhah peutoe ini  
Cicem nuri leumah neueu  
Deuh neukalon saboh nuri  
Banta saidi neudrob laju

Rupa jroh that hana sakri  
Kuneng gaki panyang iku  
Sinan nyawong di jen pari  
Jibuni lam peutoe itu

Bak uroe nyan hantu sihe  
Susah ate kon sigeutu  
Badan kreuet krot sang-sang reule  
Urat seundi nyang ka hanco

Susahji that hana sakri  
Jibeudoh le jitron laju  
Na sikhan rot jipeureugi  
Leumah lahe jieu laku

Leumah jieu cut putroe ti  
Bineh pasi deungon teungku  
Dalam jaroe cicem nuri  
Hantu pari yoh nyan meusu

Aneuk raja ka jituri  
Ka jikheun le meunoe laku  
Wahe Muluk nyak juhari  
Cicem nuri peulheueh laju

Peulheueh laju cicem kamoe  
Kubri jinoe peue nyang napsu  
Kubri kuta ngon meuligoe  
Kubri putroe soe taguen bu

Han ka peulheueh cicem kamoe  
Kah nyan jinoe habeh umu  
Meunan jikheun hantu pindoe  
Po samlakoe neudeungo su

Cicem nuri mat bak jaroe  
Hantu pindoe kliek meu'u'u  
Sang geulanteue nyang cot uroe  
Meunan bagoe oh jimeusu

Putroe Khaton marit meunoe  
Tuanku droe nyankeu hantu  
Neuwiet takue cicem pindoe  
Mangat paloe aneuk badu

Meunyo neupreh jitron keunoe  
Geutanyoe meuhat jibalu  
Ban neudeungo le samlakoe  
Nuri bunoe neuweh laju

Neuwiet takue deungon jaroe  
Hantu pindoe habeh umu  
Dalam awan srot u bumoe  
Ajai sampoe di jen hantu

Hanco luroh jeuet keu abee  
Aneuk asee habeh umu  
Dalam laot sret meuree-ree  
Paoh ngon yee ate seuu

Oh lheueh mate hantu asee  
Bungong keumbee neuwoe laju  
Seureuta deungon sinyak putroe  
Ban dua droe ate rindu

Padum lawet teuma dudoe  
Kheun samlakoe bak cut meulu  
Wahe po cut bungong uroe  
Peukeumah droe jinoe laju

Peugot raket e sambinoe  
Nak tajak woe keudeh bak du  
Hana guna taduek sinoe  
Lam rimba nyoe teumpat hantu

Meunan neukheun po samlakoe  
Sinyak putroe ate seuu  
Keumah pakat ban dua droe  
Raket jinoe peugot laju

Peugot raket cula caloe  
Peudieng asoe peue nyang nafsu  
Geupeudieng breueh deungon peutoe  
Bak sagoe ikat keuleumbu

Hase cukop dum sinaroe  
Teiduek oh noe saboh laku  
Ragam laen lon boh jinoe  
Bek lagee nyoe han mee taeu

Meunyo sot-sot han got gura  
Ureueng baca ate tunu  
Ureueng deungo sama juga  
Bah lon tuka kaman laju

Gampong Aree toe ngon garot  
Bineh laot pula geutoe  
Amma Bakdu bungong eungkot  
Beungoh seupot nyan taseudoe

Putroe Khaton ulon seubut  
Sinyak cut deungan samlakoe  
Sare hase dum peue cukup  
Cut bintang sret beudoh jinoe

Ek lam raket yoh nyan laju  
Deungan teungku nyang samlakoe  
Muhon tulong bak tuhanku  
Lakee bantu neuleueng jaroe

He ya Allah ya Tuhanku  
Ya Ghafur Tuhan lon sidroe  
Neubri beutroh ban nyang nafsu  
Beutroh bak du woe u nanggroe

Beureukat do'a kusyik intu  
Lon neubantu bak siseun nyoe  
Laot raya lon meung lalu  
Beutroh nafsu dua kamoe

Beuneukabui ya Tuhanku  
Beureukat du ngon ma putroe  
Lheueh meulakee bungong meulu  
Dayong laju raket jinoe

Neupeuili troh u laot  
Dayong neugot malam uroe  
Sama-sama dayong neugot  
Samlakoe cut deunong putroe

Raket sampoe troh u laot  
Dayong neugot cula caloe  
Hana ingat beungoh seupot  
Putik rambot bungong geutoe

Raket jiplueng buju laot  
Sang teumakot po samlakoe  
Padum lawet dalam laot  
Samlakoe cut leumoh asoe

Hankeuh ek le dayong neugot  
Ie mata sret ban dua droe  
Dayong u keue roh u likot  
Teungoh laot meujak meuwoe

Teuka bakat ngon geulumbang  
Bukon sayang po samlakoe  
Raket jiplueng meuyub manyang  
Bungong keumang kuyut asoe

Dalam laot meutang kumang  
Cut buleuen trang rugha jimoe  
Allah Allah hu ya Allah  
Ban peurintah po lon sidroe

Lon keumeung woe ubak ayah  
Bai hai Allah ka meupaloe  
Allah Allah hu ya Rabbi  
Keu lon neubri hajat sampoe

Kamoe dua saleh pakri  
Hai ya Rabbi lam laot nyoe  
Allah hai po Ilahul hak  
Gampong jarak han troh lon woe

Lon paban bah Tuhan kheundak  
Sidum noe hak dua kamoe  
Allah Allah po lon Tuhan  
Jeuoh jalan han troh lon woe

Adat na bulee lon teureubang  
Mangat rijang troh u nanggroe  
Allah hai po Tuhan kaya  
Ka binasa lon uroe nyoe

Lon keumeung woe ubak bunda  
Neupeulara dua kamoe  
Di lampoh cot timoh kulat  
Di lampoh jeurat timoh geutoe

Si cut banta sayangneu that  
Aneuk deelat ka meupaloe  
Puteh-puteh bungong meulu  
Srot meutabu ateueh bumoe

Sinyak putroe moe meu'u'u  
Nyang hana bu peuet ploh uroe  
Sayang jimoe bintang timu  
Bak Tuhanku jipeujok droe

Bukon sayang bungong sukon  
Didalam on layee keudroe  
Bukon sayang putroe Khaton  
Saleh apon jih keu nanggroe

Dalam laot cut bintang lhon  
Raket hayon malam uroe  
Ngon riyeuk meugulong-gulong  
Raket jitron keudeh keunoe

Nibak Tuhan mohon tulong  
Cut bungong rom jileueng jaroe  
Ya ilahi wa ya Rabbi  
Keu lon neubri hajat sampoe

Deungon tulong Tuhan gani  
Lon bek neubri jeuet meupaloe  
Beureukat bunda peurmaisuri  
Beu Allah bri troh u nanggroe

Ngon mukjizat panghulee nabi  
Beureukat abi du lon sidroe  
Lheueh meuinsan tuan putroe  
Poteu Allah bri kuat jaroe

Geudayong le teuma leugat  
Geukarat ngon cula caloe  
Raket jiplueng ateueh bakat  
Kheundak kudrat po alam nyoe

Han jituho timu barat  
Dayong leugat malam uroe  
Teuka angen deungon ribot  
Sang teumakot po samlakoe

Tujoh buleuen dalam laot  
Angen batop keudeh keunoe  
Meuwoe ulang dalam laot  
Hingga sret bak saboh nanggroe

Ka troh ubak saboh pusong  
Nibak lingkong saboh nanggroe  
Ka seulamat Tuhan tulong  
Troph u gampong sinyak putroe

Ujung nanggroe Muluk Ali  
Tuhan neubri keunan sampoe  
Teungoh malam watee sunyi  
Goh lom meuri leumah uroe

Raket ka troh bineh pasi  
Ngon teukeudi Tuhan sidroe  
Leumah jieu le si pai  
Raket ili keunan ka toe

Dalam seupot jieu raket  
Sipai let cula caloe  
Jimat laju ka jiungket  
Jihet-het ka jiboh taloe

Jitarek le rijang rijang  
Ka meuguncang keudeh keunoe  
Neutanyong le muda seudang  
Pakon abang buetteuh meunoe

Di lon hana kumeuutang  
Peulheueh rijang raket kamoe  
Meunan neukheun banta sidroe  
Sipai jawueub le meunoe

Bek le tuto hana sakri  
Kah pancuri kuboh taloe  
Pat kajak cok inong tari  
Jih kataki kapoh lakoe

Dalam seupot kapeuili  
Bek jituri singoh uroe  
Jinoe kuba ubak duli  
Kuyue gasi aneuk bisoe

Ban neudeungo kheun si pai  
Banta saidi ka neuiem droe  
Sang teumakot po juhari  
Saleh pakri singoh uroe

Teuma jiba le si pai  
Dalam sunyi seupot tuloe  
Beungoh uroe troh u pasi  
Leumah cut ti kalon nanggroe

Mangat ate hana sakri  
Potallah bri tan meupaloe  
Ban jipandang atueuh cut ti  
Dum sipai mabok keudroe

Jieu rupa that juhari  
That beureuhi jingieng bagoe  
Taeu jijak han jab gaki  
Jingieng cut ti indah han soe

Habeh gila dum sipai  
Roh jititi lam-lam duroe  
Galakjih that han peue pike  
Jingieng sabe atueuh putroe

Dum sipai han jeuet jak le  
Bungong pade tanyong meunoe  
Sajan panton putroe kheun le  
Su sang bangsi po sambinoe

Teungoh u gle tarek awe  
Cok nyang sabe puta taloe  
Peue takalon galak ate  
Tangieng sabe atueh kamoe

Jeh di gle le timoh madon  
Di panton timoh beuramoe  
Peue taeu ngon takalon  
Gata bukon judo kamoe

Bungong jeumpa puteh meuprak  
Bungong meurak ayeuem jaroe  
Pakon dalem meutulak-tulak  
Peue buet tajak lam-lam duroe

Bukon sayang cicem nuri  
Jinari didalam jaroe  
Pakon tajak han jab gaki  
Sang keudidi jak lam anoe

Ban jideungo kheun putroe ti  
Beudoh sare malee keudroe  
Maleejih that dum sipai  
Narit cut ti bukon seungkoe

Deungon beungeh hana sakri  
Ban dua le jiboh taloe  
Jiba laju bungong giri  
Trok bak wazi ka jipeuwoe

Bak syahbanda oh troh hampe  
Sipai le seumbah meunoe  
Ampon meuah wahe wazi  
Nyoe pancuri ka lon peuwoe

Taboh lam glab aneu<sup>k</sup> babi  
Hana sakri paleh tuloe  
Dalam seupot teungoh ili  
Di pasi ulon drob bunoe

Ban syahbanda kalon lahe  
Dalam ate leumah meunoe  
Geungieng rupa that juhari  
Bak laku ri sinyak putroe

Meunan ingat teuku wazi  
Bak sipai geukheun meunoe  
Jak weh gata keudeh mari  
Lon meung sudi pane nanggroe

Jibeudoh le dum sipai  
Jak u pasi dum sinaroe  
Hireuen tahe di po wazi  
Tan geuturi sinyak putroe

Teutap sinan dilee po ti  
Laen rawi lon hareutoe  
Ragam laen ulon rawi  
Hana meukri le lagee nyoe

Gampong Reng Krueng Meunasah Sagoe  
Cit toe-toe ngon keude Pangwa  
Amma Bakdu ie jok cot uroe  
Tajeb adoe cuba rasa

Keu syahbanda kisah meuwoe  
Sinyak putroe jipareksa  
Bak bidara teupin sungoe  
Manek manoe di mideuen raja

Wahe po cut nyang sambinoe  
Lon tanyong nyoe ubak gata  
Lon meutanyong wahe putroe  
Pat bu nanggroe ibu bapa

Han lon turi han lon tusoe  
Han tom peue roe lon eu rupa  
Peugah po cut bak lon jinoe  
Taboh nanggroe peue kareuna

Jiseuot le sinyak putroe  
Bek dalem droe neupareksa  
Bek neutanyong gampong nanggroe  
Lon nyoe sidroe ureueng gob ba

Lon hai dalem kon biek putroe  
Lon geupubloe namiet raja  
Ulon geucok yoh di nanggroe  
Geupoh lakoe lon geuba-ba

Meunan narit sinyak putroe  
Ate seungkoe po Syahbanda  
Geutanyong lom teuma dudoe  
Pakon putroe meunan haba

Pakon pocut peubeungeh droe  
Han patot roe meunan jeumpa  
Sabab cut nyak han lon tusoe  
Bek meupaloe deungon raja

Takot salah teuma dudoe  
Bak po kamoe raja raya  
Peugah pocut ubak kamoe  
Po sambinoe pane teuka

Soe nan ayah ngon ma putroe  
Siri nanggroe keunoe teuka  
Po Syahbanda tanyong laju  
Tan neumeusu putroe muda

Lon Syahbanda jaroe buju  
Hai cut meulu tanglong donya  
Wahe pocut bintang timu  
Peugah bungsu lon ngo nyata

Sinyak putroe seuot laju  
Ngo sigeutu lem Syahbanda  
Bukon sayang bungong sukron  
Didalam on habeh mala

Nyoe lon peugah bak asai phon  
Tadeungo lon lem Syahbanda  
Nama lon nyoe putroe Khaton  
Umu nam thon jen pari ba

Habeh lon jak sigala don  
Nyoe baro phon troh meugisa  
Nyoekeu baro takalon lon  
Ka lapan thon cre ngon gata

Meunan narit putroe Khaton  
Meuheui ampon po Syahbanda  
Ampon meuah pocut tanglong  
Salah that lon po bak gata

Han lon turi cut meuabon  
Yoh manyak lon kalon rupa  
Ka lapan thon cre ngon kamoe  
Bak uroe nyoe lahe nyata

Lon jak mita jeuep-jeuep nanggroe  
Pocut sidroe han meuho ka  
Lawet hana cut sambinoe  
Han tom lon woe le bak raja

Han jeuet pocut keudeh lon woe  
Geukoh keumiroe uleh raja  
Keunong gasi bandum kamoe  
Nam reutoh droe ngon lasyeuka

Meutan pocut ulon puwoe  
Hana jeuet toe silama-lama  
Po Syahbanda meunan kheun proe  
Tahe putroe Khaton muda

Putroe Khaton tahe hireuen  
Beudoh mameueng po Syahbanda  
Tinggai sinan putroe buleuen  
Jak u mideuen ubak raja

Geujak tajam na sang geuplueng  
Troh u mideuen ngadap raja  
Jaroe-jaroe beuot siseun  
Deelat ampon po meukuta

Ampon meuah tuanku droe  
Pocut kamoe ka meugisa  
Baroe seupot keunoe sampoe  
Ubak kamoe sipai ba

Sidroe banta sajan putroe  
Hana bagoe indah rupa  
Diyub langet ateueh bumoe  
Lam donya nyoe hana ngon sa

Saban-saban ngon cut putroe  
Miseue pudoe ngon meutia  
Han jan habeh jihareutoe  
Raja nanggroe neumeusabda

Hai Syahbanda beudoh jinoe  
Sinyak putroe keunoe taba  
Bandua droe taba keunoe  
Ubak kamoe dalam kuta

Meunan sabda raja nanggroe  
Beudoh dudoe po Syahbanda  
Oh sare ubak putroe  
Jihareutoe sabda raja

Geupeugah le dum sinaroe  
Beudoh putroe ngon cut banta  
Syahbanda mat nibak jaroe  
Bandua droe laju geuba

Dalam kuta geuba sampoe  
U meuligoe peukek sigra  
Ban sare troh u seuramoe  
Cut sambinoe seumah apa

Raja neukheun laju meunoe  
E sambinoe mubahgia  
Meutuah that gata putroe  
Ka troh tawoe bijeh mata

Kamoe mita jeueb-jeueb nanggroe  
Gata sidroe han meuho ka  
Bak ate lon han le tawoe  
He cut putroe bungong jeumpa

Meunan narit raja nanggroe  
Seureuta nyoe com ban dua  
Mangat ate hana bagoe  
Keumuen ka woe dalam rimba

Tan le pike keudeh keunoe  
Raja nanggroe neumeusabda  
Ubak meuntroe neukheun rijang  
Tajak rakan jinoe gata

Tajak tueng aduen lon tuan  
U Hidustan jak tabungka  
Tajak peugah bak cut abang  
Si cut bintang ka jigisa

Meunan titah raja nanggroe  
Beudoh meuntroe laju bungka  
Jiba rakyat nam reutoh droe  
Ban sinaroe giduek guda

Cukop alat dum sinaroe  
Cokma beusoe peudeueng khanj..  
Dua buleuen geucré nanggroe  
Ka troh sampoe ubak raja

Jidong di yub peuek seumah  
Junjong khalifah raja raya  
Deelat ampon si alamsyah  
Patek sah suroh adekda

Bak tuanku neuyue peugah  
Putroe indah ka meugisa  
Ka meuteumeung bungong kipah  
Bek susah po meukuta

Sidroe banta sajan putroe  
That samlakoe hana tara  
Saban-saban ngon cut putroe  
Miseue pudoe ngon meutia

Di Amariah tuanku droe  
Sideh putroe sajan apa  
Han jan habeh jihareutoe  
Ayah putroe neupoh-poh pha

Oh neudeungo aneuk ka woe  
Hana bagoe ate suka  
Suroh raja ubak meuntroe  
Ureueng nanggroe taseuranta

Oh lheueh sabda raja nanggroe  
Beudoh meuntroe jikrah sigra  
Han padum treb teuma dudoe  
Rakyat ka dhoe dalam kuta

Abeh jitren jeueb-jeueb sagoe  
Ban sinaroe tuha muda  
Raja neutren dimeuligoe  
Deungan putroe judo muda

Ateueh gajah neuek laju  
Tuanku ngon putroe muda  
Meusu geundrang deungan tambo  
Awai luho rakyat bungka

Neubeurangkat raja nanggroe  
Jak tueng putroe woe lam rimba  
Deungon rakyat dum sinaroe  
Nam ribee droe sajan raja

Ateueh gajah raja nanggroe  
Deungon putroe nyang jroh rupa  
Sang mise geujak prang nanggroe  
Rame han soe dum lasyeuka

Ureueng inong sajan putroe  
Ureueng nanggroe sajan raja  
Dalam rimba geujak sampoe  
Malam uroe geumeung safra

Dua buleuen geucre nanggroe  
Hingga sampoe ho geuhala  
Teutap siat ayah putroe  
Kisah meuwoe keudeh punca

Nyoe lon peugah apa putroe  
Tango jinoe hai seedara  
Amariah nama nanggroe  
Apa putroe sinan raja

Nama geuhe Muluk Ali  
That bakeuti hana tara  
Nama putroe Keumala Sari  
Judo duli nyang jroh rupa

Aneuk rajapi na sidroe  
Nama meusoe putroe Indra  
Mantong seudang sinyak putroe  
Goh na lakoe aneuk raja

Rupa ilok tan sibagoe  
Tiwah uroe cahya muka  
Muluk Ali di meuligoe  
Ngon samlakoe peugah haba

Leumah neueu ayah Putroe  
Cut abang droe ka troh teuka  
Neutron laju di meuligoe  
Samlakoe tinggai disana

Deungon rakyat dum sinaroe  
Wazi meuntroe ngon bentara  
Sira neujak meupeurasan  
Ban lakuan adat raja

Muluk Ali rakyat sajan  
Sulotan eumpeueng seedara  
Ret deh ret noe bunyi-bunyian  
Tambo geundrang that meutaga

Ban dua ho sabe padan  
Sang peurasan meunan rupa  
Oh sare rab meuhadapan  
Mumat tangan ngon seedara

Lheueh nibak nyan teuma dudoe  
Laju geuwoe dalam kuta  
Deungan rakyat dum sinaroe  
Wazi meuntroe sajan raja

Troh lam kuta raja neuwoe  
U meuligoe neukek lanja  
Duek meupioh dum sinaroe  
Wazi meuntroe sajan raja

Teutap raja di seuramoe  
Cut sambinoe lon peugisa  
Leumah putroe kalon ayah  
Beudoh bagah putroe muda

Seureuta deungon banta indah  
Neutren pantah le ban dua  
Ngon ie mata sare jojah  
Seumah ayah deungon bunda

Putroe neukheun that meutuah  
Allah Allah he adekda  
Sira neucom sira neumoe  
Cut sambinoe ka neuwa-wa

Peurmaisuri neupoh-poh droe  
Com aneuk droe ngon po banta  
Putroe bae bah le oh noe  
Bek le rampoe hana guna

Hana panyang lon hareutoe  
Raja nanggroe neumeusabda  
Neutanyong le bak samlakoe  
Dinab meuntroe ngon bentara

Wahe aneuk bungong uroe  
Lon tanyong proe ubak gata  
Pat bu gampong deungon nanggroe  
Samlakoe soe geuheu nama

Meunan sabda ayah putroe  
Samlakoe tijoh ie mata  
Neupeugah le sira neumoe  
Deungo jinoe po meukuta

Banta beuet dua jaroe  
Meureundah droe hana tara  
Deelat ampon tuanku droe  
Jeuoh nanggroe lon meukuta

Lon keurajeuen peuet boh nanggroe  
Tango jinoe lon calitra  
Nanggroe Yaman nanggroe Meuse  
Hana sabe luah banda

Lhee Bageudad nan geurasi  
Teuma lagi Buniara  
Asim bin Sifun nama abi  
Hana sakri meugah raya

Saiful Muluk ulonteu nyoe  
Nyang troh keunoe po meukuta  
Lon boh gampong deungan nanggroe  
Seutot lumpoe keunoe teuka

Tinggai ayah ngon ma putroe  
Jeuep-jeuep nanggroe ulon bungka  
Deungan rakyat meuribee ka toe  
Kapai beusoe nam ploh dua

Habeh karam dum sinaroe  
Kapai beusoe beukah dua  
Bandum rakyat habeh mate  
Jipajoh le paoh raya

Nyang na tinggai mate lam gle  
Jipajoh le hantu rimba  
Tinggai peuet droe ulon tuan  
Ek lam sampan kamoe bungka

Limong beuleuen peulayaran  
Kheundak Tuhan lom meubahaya  
Saboh buya teuka keunan  
Dalam sampan ka jilumba

Kamoe ban peuet jipeureulan  
Baplueng yoh nyan laju sigra  
Lam laot jipeujok droe  
malam uroe hana reuda

Na peuet beuleuen meunan bagoe  
Pangsan lon nyoe po meukuta  
Ngon kuasa Tuhan sidroe  
Ulonteu nyoe leupah banya

Kheundak Tuhan saleh pakri  
Bineh pasi lon teuhanta  
Ban teukeujot patek ini  
Lon beudoh le teuma sigra

Ban lon thee droe wahe duli  
Ateueh pante lon sidroe saja  
Teuma beudoh lon peuréugi  
U dalam gle rimba raya

Lon ek gunong meuseuk-meuseuk  
Teusireut reubah teuhanta  
Oh meuteumeung boh-boh awe  
Lon pajoh le pruet that lapa

Na peuet buleuen lon jak sabé  
Meuteumeung le sidroe raja  
Nama raja Indra sakti  
Bangsa pari dalam rimba

Na peuet beuleuen sinan lanti  
Sajan duli raja raya  
Beudoh sinan lon peureugi  
Didalam gle meuraba-raba

Uroe malam lon jak sabe  
Susah ate hana tara  
Dua beuleuen didalam gle  
Meuteumeung le saboh kuta

Kuta luah hana bagoe  
Pageue beusoe ban seulingka  
Lam kuta saboh meuligoe  
Indah han soe lon eu rupa

Lon eu ureueng tan meung sidroe  
Lon ek dudoe u astana  
Troph lon lalu u seuramoe  
Lon kalon nyoe rupa-rupa

Deuh lon kalon tuan putroe  
Sinan sidroe tanpi hana  
Oh nan baro kheun samlakoe  
Seuot putroe Dien Peulita

Hai ayah meukuta nanggroe  
Tango jinoe lon peuhaba  
Pasai banta lon hareutoe  
Samlakoe masa neuteuka

Masa neuek u meuligoe  
Gob nyan sidroe ngonneu hana  
Ngon peukayan ruya rayoe  
Gaki jaroe duroe seuba

Lon bri salen teuma dudoe  
Lon pleu asoe pat nyang leuta  
Padum lawet lam meuligoe  
Neupoh dudoe hantu rimba

Oh lheueh mate aneuk bisoe  
Beudoh meuwoe keunoe gisa  
Peulayaran malam uroe  
Tuhan sidroe nyang peulara

Kheundak Tuhan po geutanyoe  
Jidrob kamoe di Kuala  
Kamoe dua jiboh taloe  
Ka jipuwoe bak Syahbanda

Jeuetkeu dum nan lon hareutoe  
Neuphamkeudroe hai ayahanda  
Raja deungo dum sinaroe  
Srot meataloe ngon ie mata

Oh neuingat keu samlakoe  
Hana bagoe inseuh teuka  
Lom neuingat keu aneuk droe  
Jeuoh nanggroe jen hantu ba

Ka lapan thon cre di nanggroe  
Bak uroe nyoe lon eu rupa  
Ngon meutuah cut samlakoe  
Aneuk lon nyoe leupah banya

Bukon that jroh fie budhoe  
Barangkasoe hana nyang sa  
Poteu raja laju neumoe  
Samlakoe teuringat guna

Saban-saban bandua droe  
Bunda putroepi moe rukha  
Deungon aneuk sinyak putroe  
Lam meuligoe riyoh subra

Nyang that rukha tuan putroe  
Sira moe neucom po banta  
Wahe aneuk po samlakoe  
Gata sidroe raya guna

Po Tuhan balah dudoe  
Lon samlakoe hana daya  
Bukon sayang putik sukron  
Angen hayon srot u donya

Tatem puwoe putroe Khaton  
Hai bintang lhon that bahgia  
Bukon sayang putik maken  
Awe lilen peugot raga

Taseuleuah tajak poh jen  
Puteh licen that bahgia  
Gata aneuk sangat lon syen  
Bintang canden that eu seutia

Hana lon bri keu soe laen  
Lon peukawen deungon gata  
Meunan narit ma cut putroe  
Po samlakoe neuiem saja

Banta muda tahe keudroe  
Ingar putroe ceudah rupa  
Goh meuteumeung nyang neulumpoe  
Samlakoe susah han tara

Tan galak nyang ka geupetwoe  
Beuthat putroe ceudah rupa  
Keudeh ate sang teugoe-goe  
Malam uroe hana lupa

Seungap ret deh seungap ret noe  
Laen jinoe lon calitra  
Bukon sayang cicem pala  
Jroh that rupa lagi tari

Gob peungeut silama masa  
Bit rupa lileh han sakri  
Titlam cahit paleh raya  
Cempala sabe jitaki

Oh jitoh boh sapat dua  
Jituka hana jituri  
Oh ceh aneuk jipeulara  
Trok an raya eumpeuen jjibri

Amma Bakdu leupah isya  
Tan ie kahwa jeb ie kupi  
Tajul Muluk lon peugisa  
Kheun bak Raja Muluk Ali

Tadeungo lon he adekda  
Lon ka lama sinoe lanti  
Jinoe hajat lon meujak woe  
Wahe adoe idin tabri

Seureuta deungon sinyak putroe  
Dan samlakoe banta saidi  
Ban neungo meunan hareutoe  
Peukeumah droe Muluk Ali

Yue pangge rakyat sinaroe  
Wazi meuntroe geusyik waki  
Ka meusapat lam meuligoe  
Raja nanggroe meusabda le

Nyang lon pangge dum sinaroe  
Tango jinoe lon peugah kri  
Tajak intat sinyak putroe  
U nanggroe jinoe keumbali

Meunan sabda raja nanggroe  
Dum sinaroe jiseuot le  
Insya Allah tuanku droe  
Ban suroh nyoe han meuungki

Hingga teuma haba nyang toe  
Peukeumah droe dum sipai  
Hase cukup dum sinaroe  
Beudoh jinoe dum peureugi

Beudoh raja deungan putroe  
Neuek jinoe guda tiji  
Dalam kuta teubiet leugat  
Neubeurangkat Muluk Ali

Meuntroe wazi sajan deelat  
Deungan rakyat dum sipai  
Didalam blang ka meusapat  
Ureueng le that han tatukri

Hingga wase watee reumbang  
Neubeurjalan ayah cut ti  
Geujak sabe uroe malam  
Oh leupah blang ka troh u gle

Oh jisurat sare kiam!  
Bandum ka sang jitot beude  
Sira geujak meupeurasan  
Tambo geundrang han peue kheun le

Padum lawet geubeurjalan  
Troh datang lam kuta nanggri  
Troh lam kuta dum sinaroe  
Jipioh droe dum sipai

Raja neuek u meuligoe  
Ngon putroe Keumala Sari  
Putroe Khatun ngon samlakoe  
U meuligoe sajan duli

Hingga teuma lheueh nibak nyan  
Dum jamuan raja yue bri  
Oh lheueh makeuen sikalian  
Hingga malam ho jula le

Hingga meuthee banda duson  
Putroe Khatun ka keumbali  
Beudoh jijak dum meuron-ron  
Jijak kujong putroe siti

Bungong jaroe bak laku hak  
Peue nyang layak maseng geume  
Nyang ladom me meuh ngon pirak  
Ladom hai nyak ringget tali

Rakyat rame dum meusak-sak  
Jeueb-jeueb pihak rata ili  
Tujoх uroe rakyat jitren  
Tujoх geudong peunoh sare

Ngon meutuah Putroe Khatun  
Panyot tanglung that juhari  
Sang haba nyan oh nan teutap  
Lon riwayat Muluk Ali

Padum lawet sinan lambat  
Jinoe hajat woe keumbali  
Oh idin bak kakanda  
Beudoh gisa Muluk Ali

Seureuta deungon balatandra  
Nyang neuba bandum sipai  
Hana panyang lon calitra  
Leupah raja woe keumbali

Tinggai sinan banta muda  
Aneuk raja nyang teurpuji  
Raja bri saboh meuligoe  
Bak pioh droe banta saidi

Dendayang neubri tujoh droe  
Po samlakoe soe paduli  
Aneuk wazi aneuk meuntroe  
Ngon samlakoe hana tom cre

Ho nyang neujak cit na rakan  
Uleebalang aneuk wazi  
Saiful Muluk nyang analan  
Teutap sinan po juhari

Teiduek oh noe saboh syahdan  
Hai rakan laen lon rawi  
Paya Bujuk nanggroe Langsa  
Pulo Rawa bineh pasi

Oh noe habeh saboh haba  
Takap bada tajeb kupi  
Meuwoe kisah lhee droe banta  
Lon calitra aneuk wazi

Said Juhari lon peuhaba  
Lam pruet buya padum lawi  
Nyang buya 'uet dilee masa  
Kira-kira peuet seun haji

Umu peuet thon lam pruet buya  
Han binasa Tuhan neubri  
Lawet ji'uet lhee droe banta  
Han tom buya na raseuki

Buya susah uroe malam  
Keunoe keunan ulee ili  
Sabab ija Nabi Sulaiman  
Ngon sabab nyan tan raseuki

Ngon keuheundak sidroe Allah  
Ngon ijazah ija Nabi  
Ka jiulak cut meutuah  
Jikeubah bak bineh pasi

Bineh laot banta lhee droe  
Dalam uroe bungong giri  
Lheueh jiule po samlakoe  
Buya jiwoe laot tuwi

Ka teukeujot teuma dudoe  
Samlakoe Said Juhari  
Beudoh laju po samlakoe  
Ka jipeugoe Kunan Syamsi

Wahe adek bungong geutoe  
Beudoh adoe nyak puteh di  
Teuma beudoh dua droe  
Duek teupipoe bineh pasi

Said marit teuma meunoe  
Tango kamoe wahe Syamsi  
Geutanyoe peuet wahe adoe  
Tan le sidroe wahe Syahri

Saiful Muluk hana lagoe  
Wahe adoe jinoe pakri  
Saleh ho ka gob nyan sidroe  
Siri nanggroe tajak cari

Saleh mate buya seudoe  
Saboh roe di laot tuwi  
Kadang cit ka rimueng tampoe  
Lam rimba nyoe geupeureugi

Tajak mita kaman jinoe  
Jeueb-jeueb nanggroe tajak sudi  
Meunan Said jihareutoe  
Sira moe ie mata ile

Teuduek sinan dalam anoe  
Sayang jimoe aneuk wazi  
Bukon sayang bungong meuroe  
Reudok tampoe han le meuri

Badan peujuet han le asoe  
Nyang ka deuek troe peuet seun haji  
Tan sigeutu le rupa droe  
Barangkasoe han taturi

Ngon peukayan ruya reuyoe  
Banta lhee droe miseue bangke  
Rupa ceudah hana le got  
Buya seupot padum lawi

Ngon langkah ka paleng palot  
Nyang mantong got ija Nabi  
Geubeudoh le ureueng lhee droe  
Geujak jinoe udalam gle

Geujak sabé malam uroe  
Po samlakoe geujak sudi  
Uroe malam hana pioh  
Puteh leusoh saket gaki

Dalam rimba geujak ka troh  
Laju geublo̩h alue punti  
Ka geukek cot geutren paloh  
Lam geureugoh ulee ili

Meunyum payah saket tuboh  
Puteh leusoh peudeh gaki  
Diyub kayee teuma pioh  
Dang tho reuoh duek bak sunyi

Baro siat duek meupioh  
Hantu ka troh keunan ili  
Hantu tujoh insan tujoh  
Taloe jiboh jaroe gaki

Dalam alue ka jiyue bloh  
Lam geureugoh yub bak punti  
Jipoh sabé hana teudoh  
Ureueng tujoh klik meu'i'i

Dalam uteuen le jiyue bloh  
Jiyue pajoh dum boh punti  
Boh beuraden ngon boh saoh  
Boh paoh ngon boh jeungki

Bak ureueng nyan jiyue pajoh  
Hantu bioh poh bak gaki  
Geupajoh le teuma leugat  
Mabokpi that hana sakri

Muka mirah yo meutat-tat  
Hantu leugat ka jisudi  
Wahe insan pakon meunoe  
Pakon kamoe kudeungo kri

Ureueng tujoh seuot meunoe  
Boh kayee nyoe phet meuta'i  
Meunan narit dum sinaroe  
Hantu pindoe pot boh punti

Jipajoh le teuma keudroe  
Teuhing gigoe jikab bibi  
Teuka mabok ban tujoh droe  
Aneuk bisoe sang ka mate

Jimeulawan cula caloe  
Jipoh-poh droe sampoe gaki  
Hingga pangsan dum sinaroe  
Teupipoe sinan meugule

Leumah neueu le samlakoe  
Hantu pindoe ka meugule  
beudoh leugat le ban lhee droe  
Mat di jaroe kayee mate

Pudep apui yoh nyan laju  
Ka peungeuh hu ban saboh gle  
Hantu tujoh geutot laju  
Aneuk badu habeh mate

Jeuet keu abee badan tujoh  
Hanco luloh hangoh bangke  
Oh lheueh mate hantu biyoh  
Ureueng tujoh meuteumeung le

Ureueng tujoh na tatuban  
Ureueng karam laot tuwi  
Rakyat banta muda seudang  
Jeuep seurukan mate guble

Ka meuteumeung ngon rakan droe  
Po samlakoe mangat ate  
Muwa meucom rot deh rot noe  
Keumeung moe-moe sana sini

Ateueh batee sinan dukhoe  
Dawok laloe hafai sakti  
Zanggi kalon banta lhee droe  
Hana bagoe mangat ate

Jimeuhei le po samlakoe  
Keunoe adoe laju ili  
Tajak nyak cut laju keunoe  
Nibak kamoe na raseuki

Boh kayee le that disinoe  
Pajoh beutroe bandum lon bri  
Banta jak le keunan sampoe  
Ka geupeutoe ubak Zanggi

Ban sare troh keunan banta  
Jidrob sigra hana lanti  
Zanggi peulob dalam guha  
Sayang banta ka jitaki

Lheueh jikeubah ban lhee banta  
Teubiet sigra sinan Zanggi  
Said kalon ureueng le that  
Tanyong leugat le geusudi

Pane nanggroe gata sahbat  
Gampong teumpat cuba rawi  
Peue buet keunoe dalam guha  
Lon eu mata han le meuri

Jiseuot le bandum rata  
Jiraba Said juhari  
Ureueng karam ulonteu nyoe  
Jiba keunoe uleh Zanggi

Lam guha jipeulob kamoe  
Hai teungku droe lon jitaki  
Han jeuet teubiet le meung sidroe  
Zanggi pindoe le that sakti

Oh troh keunoe wahe teungku  
Jibri susu uleh Zanggi  
Oh sare lheueh meujob susu  
Kamoe laju cit buta le

Hana sapeue le deuh meung eu  
Hana laku kamoe nyoe le  
Cit meupreh ajai tuanku  
Habeh umu troh bak janji

Lheueh nibak nyan teuma dudoe  
Ban siploh droe jak dalam gle  
Hana piyoh malam uroe  
Po samlakoe geujak sabe

Ureueng tujoh ka meupaloe  
Ban sinaroe habeh mate  
Nyang na tinggai banta lhee droe  
Malam uroe geujak sabe

Saiful Muluk geujak mita  
Jeueup-jeuep rimba jeuep luak ge  
Sajan tijoh ngon ie mata  
Ate luka bungong pade

E tuanku raja muda  
Lon jak mita gata sabe  
Ya Tuhanku po nyang Esa  
Raja muda han meuho le

Jeuep-jeuep gunong ulon mita  
Hana nyata jeuep luak gle  
Saleh mate raja muda  
Tuhan Esa nyang keutahui

Meunan narit lhee droe banta  
Ro ie mata tan beureunti  
Na peuet beuleuen dalam rimba  
Raja muda geujak sudi

Hana piyoh malam uroe  
Hingga sampoe gunong tinggi  
Gunong manyang that seureuloe  
Banta lhee droe ate ngeuri

Neumeuinsan neuleueng jaroe  
Samlakoe neupujoe Rabbi  
Wahe Tuhan po dikamoe  
Lon uroe nyoe kuat neubri

Beukek leupah ek gunang nyoe  
Tulong kamoe hai Ya Rabbi  
Lheueh meuinsan rahob jaroe  
Ek samlakoe gunong tinggi

Tan geupiyoh malam uroe  
Tuhan sidroe nyang keutahui  
Troph u pucak banta lhee droe  
Deuh samlakoe kalon zanggi

Adat hudep hana guna  
Han le mata bandum sare  
Bandum kamoe habeh buta  
Susah raja hana sakri

Masa jicok kamoe le that  
Ladom sisat didalam gle  
Dalam guha jipeusapat  
Jiintat keunoe raseuki

Hingga teumbon jroh meukilat  
Wahe sahbat jipajoh le  
Ban geudeungo meunan haba  
Laju teuma lon geusudi

Siri teumpat bandum gata  
Soe nan raja cuba rawi  
Pakon karam ho tabungka  
Hai seedara tapeugah le

Meunan Said neupareksa  
Yoh nyan sigra jawueub jibri  
Sira moe ile ie mata  
Deungo hamba wahe akhi

Jeuoh gampong kamoe bungka  
Aneuk raja nanggroe Meuse  
Saiful Muluk geuboh nama  
Sangat aula hana sakri

Geucré gampong geuboh nanggroe  
Seutot lumpoe putroe siti  
Baro oh nan jihareutoe  
Said neumoe hana sakri

Ka jibae banta lhee droe  
Seedara droe ka meuturi  
Teungoh-teungoh geumoe bao  
Ka meugo-go didalam gle

Zanggi jiwoe tamong laju  
Jicok susu ubak syahri  
Nyoe ie susu lhee boh cawan  
Tajeb rakan bek laloe: le

Rasa mameh dum manisan  
Puleh badan han le seui  
Gadoh ngon deuek puleh payah  
Gadoh ngon grah cut puteh di

Ban lhee banta ngo peuneugah  
Cok le pantah ie bak Zanggi  
Pura jeb-jeb habeh geuro  
Teuma meusu Kunan Syahri

Pakon meunoe wahe teungku  
Nyoe ie susu phet meuta'i  
Oh lheueh meujob nyoe ie susu  
Kamoe laju ka buta le

Peuekeuh sabab nyang jeuet meunoe  
Pakon kamoe mata han le  
Habeh buta bandum kamoe  
Pakon meunoe susu lam gle

Han le meuri malam uroe  
Seupot tuloe han leumah le  
Meunan Said ka neukheun proe  
Zanggi pindoe mangat ate

Teuma Zanggi teubiet laju  
Ate seuu hana sakri  
Ka jicok le ngon ie susu  
Jijampu deungan beurandi

Jijeb keudroe laju leugat  
Mabokpi that hana sakri  
Zanggi eh le teuma siat  
Nibak teumpat batee pari

Ateueh batee eh teuhanta  
Teungeut raya hana sakri  
Said kalon hana jaga  
Teubiet sigra aneuk wazi

Jimupakat lhee seureuta  
Nyang tuha Said Juhari  
Wahe adoeteu bicara  
Sicilaka teungeut sabé

Bahle tapoh aneuk beulaga  
Beudoh sigra bek le lanti  
Meunan Said neukheun teupat  
Keumah pakat aneuk wazi

Peudep apui teuma leugat  
Nyang sunggoh that Kunan Syahri  
Kayee geutot dum meubak-bak  
Ate galak Said Khamsyi

Beusoe apui na dua krak  
Ka jirinthak uleh Syahri  
Geutot beusoe ngon got mirah  
Culok pantah mata Zanggi

Banta culok bandua blah  
Apoh apah seumpomgaki  
Aneuk mata habeh bicah  
Haram jadah kliek meu'ji

Jimeulawan reuoh reuah  
Uteuen bicah duroe awe  
Jigeumeucieh jihah babah  
Saket leupah Zanggi sihe

Zanggi mate deungon mudah  
Hana payah Tuhan neubri  
Mangat ate cut meutuah  
Meuheui pantah ureueng jeh le

Wahe rakan dum seedara  
Teubiet sigra dumneu sare  
Bek le sinan dalam guha  
Beudoh sigra bek taduek le

Jiteubiet teuma sigra  
Dalam guha sidroe tan le  
Said seumbo teuma sigra  
Han le buta puleh sare

Habeh puleh ban sineuna  
Teubleut mata Tuhan neubri  
Mangat ate hana nyang sa  
Lhee droe banta jiseumah le

Miseue dilee rupa muwoe  
Dum sinaroe mangat ate  
Lheueh nibak nyan teuma dudoe  
Sinaroe geujak dalam gle

Geujak laju hana padoe  
Ka troh sampie bineh pasi  
Diyub aron geupiyoh droe  
Ban sinaroe duek beureunti

Na sikeujab sinan lama  
Geueu teuka kapai ili  
Ka jilambai uleh banta  
Pot ngon ija hana lanti

Keulasi jikalon nyata  
Peurab lanja bineh pasi  
Jipeutamong lam kuala  
Kapai raya hana sakri

Banta ek le teuma sigra  
Seureuta deungon sipai  
Dalam kapai duek meusapat  
Ureueng le that hana tatukri

Hana panyang lon riwayat  
Kapai leugat jipeuili  
Tarek layeue boh taloe klat  
Angen got that hana sakri

Jipeulayeue malam uroe  
Kapai sampoe laot tuwi  
Mangat ate po samlakoe  
Hana padoe pujoe Rabbi

Kheundak Tuhan po geutanyoe  
Bak siuroe jeuem teukeudi  
Teungoh laot kapai sampoe  
Ka meupaloe Tuhan neubri

Jitron angen teuka ribot  
Harok laot hana sakri  
Jiba u keue roh u likot  
Ka meupot-pot dum keulasi

Di mualim jiceumarot  
Ka jidhot dum sipai  
dum juragan tahe gante  
Ka-a ka-o jurumudi

Tihang patah keumudoe hanco  
Ka teupeuro patah kunci  
Di nanghuda jimoe bae  
Meutajo lam laot tuwi

Jitamah lom angen jatoe  
Ka jitampoe ulee ili  
Ka meulungkob kapai beusoe  
Tuhan sidroe nyang keutahui

Rakyat mate dum sinaroe  
Banta lhee droe goh troh janji  
Goh lom troh hat ajai sampoe  
Samlakoe mantong raseuki

Geugrob pantah banta lhee droe  
Hana paloe Tuhan neubri  
Geulangoe le lhee meusapat  
Pujoе ahad hana khali

Hana meuho timu barat  
Langoe leugat laot tuwi  
Bacut-bacut banta langoe  
Sira moe ie mata ile

Ubak Tuhan geupeujok droe  
Malam uroe langoe sabe  
Dua beuleuen dalam laot  
Riyeuek bapot hana khali

Kayoh u keue ka roh u likot  
That meupot-pot aneuk wazi  
Dicong jeumpa aneuk tiyong  
Simatong dicong bak giri

Lam laot meuapong-apong  
Tuhan tulong aneuk wazi  
Teungoh hanyot bungong tanjong  
Jalo puntong keunan ili

Leumah geungieng le samlakoe  
Keunan ka toe laju hampe  
Geuek keunan banta lhee droe  
Mumat jaroe aneuk wazi

Troh lam jalo po samlakoe  
Duek teupipoe cut puteh di  
Dayongpi han ngon keumudoe  
Samlakoe susah han sakri

Dalam jalo ka geugom droe  
Bungong geutoe moe meu'i'i  
Teungoh laot meujak muwoe  
Angen tampoe ule ili

Yoh nyan pangsan po samlakoe  
Malam uroe han geuthee le  
Kheundak po lon Tuhan sidroe  
Jalo sampoe bineh pasi

Riyeuk bapot angen tampoe  
Meusyo keudroe atueh pante  
Teukeujot le banta lhee droe  
Duek teupipoe aneuk wazi

Leumah geueu ka deuh pusong  
Ujung gampog bineh pasi  
Mangat ate ate sukron  
Tuhan tulong troh ban janji

Banta teungoh troh u darat  
Piyoh siat aneuk wazi  
Sinan piyoh lhee meusapat  
Duek mupakat bineh pasi

Yoh nyan Said marit meunoe  
Tango kamoe wahe Syahri  
Geutanyoe deuk hana bagoe  
Jak lam nanggroe tameuncari

Beulanja tan dalam nanggroe  
Tajak publoe ija nabi  
Tajak meukat dalam nanggroe  
Ban patot nyoe laju tabri

Keumah pakat banta lhee droe  
Beudoh jinoe geupeureugi  
Ngon peukayan ruya rayoe  
Banta got nyoe ija nabi

Dalam peukan geujak sampoe  
Mat bak jaroe ija nabi  
Maseng-maseng mat bak jaroe  
Kheun meunoe Said Juhari

Wahe teungku dum sinaroe  
Soe na tem bloe ija nabi  
Murah lon bri bak uroe nyoe  
Sabab kamoe jeuoh nanggri

Ban jideungo kheun samlakoe  
Ka jipeutoe jijak sudi  
Padum hai nyak nyum ija nyoe  
Peugah jinoe lon deungo kri

Teuma seuot po samlakoe  
Meunyo neubloe murah lon bri  
Nam ploh katoe meuh keureutah  
Beuthat murah jadeh lon bri

Ban jideungo Said peugah  
Teuhah babah dum jisare  
Bandum jikheun Allah-Allah  
Bit that ceudah ija ini

Pat tajak cok meuh keureutah  
Meung kon taplah geudong jati  
Meukan jikheun jeuep-jeuep babah  
Teutap kisah aneuk wazi

Di Iboh na gampong Barat  
Rot ueh teupat jak u Bangki  
Saiful Muluk lon riwayat  
Tango sahbat lon peugah kri

Sajan raja po samlakoe  
Ayah putroe nyang juhari  
Kheundak Tuhan bak siuroe  
Po samlakoe neupeureugi

Po banta tron di meuligoe  
Peumeuen droe ngon sipai  
Neujak meuen dalam nanggroe  
Tujoh ploh droe rakan ili

Dalam peukan banta sampoe  
Duek samlakoe bak kurusi  
Neueu ureueng dum meupadoe  
Teungoh jak bloe ija Nabi

Saiful Muluk keunan peutoe:  
Dong bak sagoe rab ngon Syahri  
Lom keu Said kisah meuwoe  
Mat bak jaroe ija Nabi

Ka jililang ija leumbot  
Goh lom lagot dang jisudi  
Ureueng rame kalang kabot  
Troph an seupot goh lom ijibri

Said diyeueng mat bak jaroe  
Mata laloe dum sipai  
Ka jilakee peuet ploh katoe  
Samlakoe hana lom jibri

Galakji that dum sinaroe  
Han ek jibloe jinoe pakri  
Saiful Muluk dong bak sagoe  
Mata laloe ngieng bak Syahri

Ka teujalok po samlakoe  
Sang ija nyoe ija kami  
Han sapat na jeueb-jeueb nanggroe  
Miseue bagoe ija Nabi

Saiful Muluk teuma peutoe  
Neulakee bloe neutanyong le  
Banta cok le mat bak jaroe  
Nyo ija droe ka neuturi

Ateueh Said neungieng dudoe  
Po samlakoe han neuturi  
Neutanyong le teuma meunoe  
Padum jinoe yum nyang tabri

Na lom kureueng nibak bunoe  
Tahareutoe lon deungo kri  
Said seuot laju meunoe  
Yum ija nyoe han kureueng le

Meung hana meuh nam ploh katoe  
Barangkasoe han ulon bri  
Nam ploh katoe meuh keureutah  
Si sen mirah han kureueng le

Meunan Said ka jipeugah  
Jimeusah-sah cut juhari  
Saiful Muluk ka teujalok  
Pat jijak cok ija Nabi

Barangkasoe han jeuet jipok  
Meukon jicok po ka mate  
Cit atra gob nyan jirampok  
Atra jicok po jipoh le

Cit ija lon nyang na meunoe  
Yoh saboh roe nibak Nabi  
Nyang lon bri keu rakan lhee droe  
Aneuk meuntroe Said Juhari

Ban teuingat keu wazi droe  
Meusoe gumoe dalam ate  
Peukreueh ate bek roh neumoe  
Samlakoe meuhei pulisi

Neudrob leugat ureueng lhee droe  
Waham kamoe sang pancuri  
Keudeh taba u meuligoe  
Bek boh taloe hana meukri

Jidrob laju teuma dudoe  
Banta lhee droe ate ngeuri  
Teumakot that hana bagoe  
Mat bak jaroe le pulisi

Dalam kuta ka jipuwoe  
U meuligoe jipeuek le  
Jikeubah le ureueng lhee droe  
Dalam sagoe seupot tu'i

Lheueh jikeubah upah jiwoe  
Lon peugah nyoe aneuk guli  
Saiful Muluk lon hareutoe  
Tango adoe lon peugah kri

Beudoh sinan po samlakoe  
Laju neuwoe ngon si pa-i  
Oh sare troh u meuligoe  
Duek samlakoe bak kurusi

Teuma neungieng ureueng lhee droe  
Samlakoe hana neuturi  
Badan peujuet han le asoe  
Po samlakoe salah sang ri

Teuma neuhei keunan beutoe  
Duek rab kamoe wahe akhi  
Dua lhee seun hei samlakoe  
Beudoh dudoe aneuk wazi

Duek meusapat ureueng lhee droe  
Po samlakoe bri kanduri  
Saiful Muluk mata laloe  
Han neutusoe han neuturi

Ngon peukayan ruya rayoe  
Bak asoe kalang ka mate  
Gadoh waham po samlakoe  
Nyan wazi droe han neuturi

Oh lheueh makeuen geusrah jaroe  
Hidang jinoe jipinah le  
Pajoh ranub baro bicah  
Banta indah teuma sudi

Wahe rakan nyang meutuah  
Cuba peugah lon tanyong kri  
Gampongteu pat soe nan ayah  
Namateu sah soe geurasi

Ho tameujak gata lhee droe  
Nyang troh keunoe tapeureugi  
Peuekeu sabab taboh nanggroe  
Cuba adoe tapeugah kri

Baro oh nan neutanyong proe  
Banta lhee droe moe meu'i'i  
Sikrak narit han le meusu  
Nyang na laju moe han khali

Oh teuingat ate tunu  
Moe meu'u'u Kunan Syahri  
Saiful Muluk tahe keudroe  
Samlakoe atueuh kurusi

Nyang neutanyong han jipakoe  
Nyang na jimoe tan beureunti  
Yoh nyan Said marit meunoe  
Sira moe geuangkat jari

Deelat ampon tuanku droe  
Jeuoh nanggroe lon hai duli  
Nanggroe Meuse gampong Laman  
Lon eh pantah lon beureunti

Nyang sidroe treuk Syahri Kunan  
Nyang adoe nyan Kunan Syamsi  
Saiful Muluk raja kamoe  
Ulonteu nyoe nyan keu wazi

Gob nyan han le tuanku droe  
Cre ngon kamoe treb ka lawi  
Saleh mate saboh masa  
Tuhan Esa nyang keutahui

Kamoe ji'uet uleh buya  
Lam jiba-ba peuet seun haji  
Goh lom mate lon meukuta  
Goh troh masa Tuhan e neubri

Deungon kheundak po nyang Esa  
Ulon jiba bineh pasi  
Ban teukeujat lon meukuta  
Lon eu raja ka hana le

Jeuep-jeuep nanggroe kamoe mita  
Jeuep-jeuep rimba ulon cari  
Tan meuteumeung jih oh masa  
Raja muda saleh pakri

Kamoe ban lhee ka troh keunoe  
Lam nanggroe nyoe Tuhan neubri  
On nan baro geuhareutoe  
Samlakoe ie mata ile

Sayangneu that wazi lhee droe  
Jeuep-jeuep nanggroe mate guble  
Ngon peukayan ruya rayoe  
Pijuet asoe hana sakri

Saiful Muluk laju neumoe  
Sira meunoe kheun bak Syahri  
Nyoekeu ulon raja gata  
Goh binasa Tuhan neubri

Mantong umu lon seedara  
Tuhan kaya nyang keutahui  
Meutuah that ban lhee gata  
Hai seedara Said Syamsi

Umu peuet thon lam pruet buya  
Lheueh ulua Tuhan neubri  
Said deungo kheun po banta  
Geumoe rukha hana sakri

Geutajo le nyan ban lhee droe  
Po samlakoe com digaki  
Geumeucom-com keudeh keunoe  
Geumeumoe-moe han tatukri

Tango kiroh lam meuligoe  
Jipoh-poh droe Kunan Syahri  
Reubah pangsan ureueng peuet droe  
Samlakoe sinan ngon wazi

Dum dendayang habeh wa-woe  
Buka peutoe jicok kunci  
Cok ie mawo boh bak asoe  
Ban peuet droe sigo jiboh le

Jigeusuek le phon nibak dhoe  
Hingga jaroe sampoe gaki  
Lhee seun saho peuek peutron  
Panyot tangglong ka puleh le

Neubeudoh le ban lhee siseun  
Meugulong ie mata ile  
Puleh pangsan po samlakoe  
Tahe keudroe ngieng bak wazi

Puleh hireuen deungon laloe  
Po samlakoe hei si pa-i  
Jak seumanoe ureueng lhee droe  
Tapleu asoe mangat suci

Meunan suruh bak samlakoe  
Jiba dudoe aneuk wazi  
Jiseumanoe gleh ngon kalang  
Rupa riwang ban aseuli

Jibri salen ngon peukayan  
That analan Said Syamsi  
Miseue dilee rupa meuwoe  
Barangkasoe han taturi

Salah bacut han le asoe  
Sabab deuk troe padum lawi  
Lheueh nibak nyan teuma dudoe  
Samlakoe ateueh kurusi

Ban sare troh u meuligoe  
Com bak jaroe ayah cut ti  
Raja yue duek teuma dudoe  
Samlakoe ateueh kurusi

Poteu raja hireuen laloe  
Neukalon nyoe ubak Syahri  
Han tom neueu dilee nyang ka  
Lhee droe banta han neuturi

Neutanyong le teuma meunoe  
Bak samlakoe ka neusudi  
Wahe aneuk bungong geutoe  
Sinyak nyoe pajan keumari

Pane gampong siri nanggroe  
Tapeugah soe nan geurasi  
Han tom lon eu gob nyan lhee droe  
Samlakoe toh siri abi

Saiful Muluk jawueb meunoe  
Ngon jaroe neuangkat tinggi  
Deelat ampon payong nanggroe  
Di ulon nyoe nyankeu wazi

Nyang lon peugah yoh saboh roe  
Tuanku droe ulon rawi  
Said Juhari nan nyang tuha  
Nyang keudua Kunan Syahri

Nyang sidroe treuk po meukuta  
Geukheun nama Kunan Syamsi  
Cre ngon kamoe saboh masa  
Beujumpa sikarang ini

Kamoe ji'uet uleh buya  
Tan binasa Tuhan neubri  
Jeueb-jeueb laot ka jiba-ba  
Lam pruet buya peuet seun haji

Ban neudeungo dum calitra  
Sret ie mata ayah cut ti  
Hireuen taie poteu raja  
Neungieng : rupa Said Syamsi

Raja neukheun hai bentara  
Mubahgia aneuk wazi  
Subhanallah that ajaiib  
Mate hudep Tuhan neubri

Lam pruet buya ka padum treb  
Bungong kawet raya bagi  
Teungoh duek-duek peugah haba  
Hidang raya keunan hase

Haba nyang rab teuma sigra  
Makeuen sigra raja duli  
Ngon samlakoe sajan seureuta  
Sama-sama aneuk wazi

Oh lheueh makeuen pinah hidang  
Tarek puan sirih lagi  
Pajoh ranub banta seudang  
Lheueh nibak nyan neukeumbali

Tinggai raja di meuligoe  
Banta neuwoe deungon wazi  
Oh sare troh bak teumpat droe  
Bak meuligoe raja nyang bri

Peugah haba ngon rakan droe  
Samlakoe nyang peugah rawi  
Hai Said seedara kamoe  
Ka troh keunoe Tuhan neubri

Tacre gampong tinggai nanggroe  
Seutot lumpoe putroe siti  
Jeueb-jeueb nanggroe uteuen rimba  
Pakri bala Tuhan neubri

Padum habeñ balatandra  
Putroe muda hana lahe  
Disinoe sang keumeung nyata  
Bak rupa lon kalon dali

Samlakoe teuma calitra  
Dum peukara ka neurawi  
Masa phon lheueh nibak buya  
Trok teuma bak gunong tinggi

Neukek-ek sret bungong kareueng  
Lom meuteumeung Indra Sakti  
Teuma trok bak Putroe Khatun  
Sinankeu phon nyata meuri

Sang-sang ka rab lahe nyata  
Putroe muda rab teujali  
Bitpi meunan muda samlakoe  
Meusoe geumoe dalam ate

Goh meuteumeu nyang neupeuwoe  
Nyang neupeuwoe hana rali  
Hana teungeut malam uroe  
Teugoe-goe ate keu cut ti

Teutap oh noe saboh kisah  
Lon peugah entreuk keulayi  
Baroh Tidik gampong Gajah  
Gampong Arah toe ngon Bangki

Ayat laen ulon ubah  
Ban nyang mudah wahe nyak ti  
Malam jula poh dua blaih  
Teungeut leupah lon hai akhi

Keubah kalam tob naseukah  
Lon ehpantah lon beureunti  
Meureudu deungon Trieng Gadeng  
Meujandreng ngon Pante Raja

**Amma Bakdu Nyang Mat Husen**

Gob meukawen jih boh gaca

Ngo lon kisah jinoe laen

Leubéh masen nibak sira

Saboh raja ulon peutren

Tango dalem lon calitra

Raja meugah hana bandeng

Insan ngon jen lam kuasa

Han ek lawan barangkasoe

Jipujoe sigala raja

Mat keurajeuen peuet boh nanggroe

Tango adoe lon calitra

**Phon Bustarom dua Bumboe**

Keu lhee nanggroe nama Cahya

Teuma keu peuet ngo lon peugah

Nanggroe Indah Idan Gamba

**Muluk Cahya nan sulotan**

**Meunan rakan lam calitra**

Hikeumat le ngon saktian

Han soe lawan ubé nyang ka

**Rakyat ramé han soe tuban**

Jen ngon syaitan pari indra

Meuploh ribee ngon pahlawan

Taeu badan gasa-gasa

Judo raja Peurami Ratu

Kon sigeutu indah rupa

Kulet puteh ban keululu

Sang panyot hu tujoh mata

Soe nyang kalon ate rindu  
Neupajoh bu nyum di mata  
Adat meung rab tadrob laju  
Sidum nan hu cahya mata

Kon beurakah lon hai teungku  
Meung ka lheueh bu deukekteu hana  
Di raja aneuk na sidroe  
Hana bagoe indah rupa

Neumeung aneuk ureueng binoe  
Rupa bagoe bintang kala  
Badi' Jamaloi nama putroe  
Jeueb-jeueb nanggroe cit geuthee na

Beuladeh rok geukeumupoi  
Beulanoe toi geureng sutra  
Ngo lon kisah Badi' Jamaloi  
Aneuk kaoi Muluk Cahya

Lam ceumara saboh cumboi  
Lam seulanggoi ok meutia  
Tujoх on ok sinyak putroe  
Intan pudoe ngon meutia

Rupa indah tan sibagoe  
Barangkasoe hana nyang sa  
Kulet puteh jeuet talhoh droe  
Kilat gigoe dum peurmata

Sang keululu dalam seupot  
Kalang kalot limpah cahya  
Sang-sang panyot ban lheueh geutot  
Sang bintang sret di antara

Bit ceudah that si nyak putroe  
Tan sibagoe ngon umpama  
Hana meunan laen putroe  
Lam donya nyoe tan ngon peusa

Bit meugah jroh Cut Paridoh  
Gampong jeuoh nanggroe Cina  
Leubeh that nyoe meuh sineupoh  
Lipat tujoh leubeh ganda

Meugah Putroe Kariman Binti  
That juhari ateueh donya  
Han cit ek sa meungon gaki  
Ngon sinyak ti Badi' muda

Meugah ceudah Diman Asahan  
Judo intan Ratna Keumala  
Leubeh that nyoe wahe rakan  
Cut intan Badi' muda

Han jeuet tangieng ban geubayang  
Reubah pangsan soe ngieng rupa  
Taeh uroe sang-sang sajan  
Taeh malam nyum di mata

Baranggasoe oh jipandang  
Iman guyang dalam dada  
Meugah putroe nanggoe Timu  
Judo Yusuf Ti Zalikha

Leubeh that nyoe bak geumakruh  
Lam seupot deuh taeu rupa  
Raja peugot saboh meuligoe  
That seureuloe hana tara

Soe nyang kalon ate rindu  
Neupajoh bu nyum di mata  
Adat meung rab tadrob laju  
Sidum nan hu cahya mata

Kon beurakah lon hai teungku  
Meung ka lheueh bu deukeuteu hana  
Di raja aneuk na sidroe  
Hana bagoe indah rupa

Neumeung aneuk ureueng binoe  
Rupa bagoe bintang kala  
Badi' Jamaloi nama putroe  
Jeueb-jeueb nanggroe cit geuthee na

Beuladeh rok geukeumupoi  
Beulanoe toi geureng sutra  
Ngo lon kisah Badi' Jamaloi  
Aneuk kaoi Muluk Cahya

I Lam ceumara saboh cumboi  
Lam seulanggoi ok meutia  
Tujoj on ok sinyak putroe  
Intan pudoe ngon meutia

Rupa indah tan sibagoe  
Barangkasoe hana nyang sa  
Kulet puteh jeuet talhoh droe  
Kilat gigoe dum peurmata

Sang keululu dalam seupot  
Kalang kalot limpah cahya  
Sang-sang panyot ban lheueh geutot  
Sang bintang sret di antara

Bit ceudah that si nyak putroe  
Tan sibagoe ngon um<sup>p</sup>ama  
Hana meunan laen putroe  
Lam donya nyoe tan ngon peusa

Bit meugah jroh Cut Paridoh  
Gampong jeuoh nanggroe Cina  
Leubeh that nyoe meuh sineupoh  
Lipat tujoh leubeh ganda

Meugah Putroe Kariman Binti  
That juhari ateueh donya  
Han cit ek sa meungon gaki  
Ngon sinyak ti Badi' muda

Meugah ceudah Diman Asahan  
Judo intan Ratna Keumala  
Leubeh that nyoe wahe rakan  
Cut intan Badi' muda

Han jeuet tangieng ban geubayang  
Reubah pangsan soe ngieng rupa  
**Taeh uroe sang-sang sajan**  
**Taeh malam nyum di mata**

Baranggasoe oh jipandang  
Iman guyang dalam dada  
Meugah putroe nanggoe Timu  
Judo Yusuf Ti Zalikha

Leubeh that nyoe bak geumakruh  
Lam seupot deuh taeu rupa  
Raja peugot saboh meuligoe  
That seureuloe hana tara

Tameh Japan meuh sinaroe  
Bak sagee tameh suasa  
Tulakangen bue meutanggeh  
Saleukek binteh awan miga

Pageue kuta tujoh lapeh  
Meuligoe gleh indah rupa  
Binteh ceureumen ie meuh geucat  
Cit utoh that pari indra

Bara thob got that jirapat  
Jiikat ngon meuh teuteumpa  
Papeuen larek puta taloe  
Lheueng peuet jaroe buleuen purnama

Rupa iloh hana bagoe  
Meuh sinaroe ngon peurmata  
Saleukek bintang awan langet  
Bungong kunyet meugeugisa

Ate gundah gadoh beungeh  
Saleukek langet awan miga  
Jiboh ie meuh keu tulisan  
Rika awan langet donya

Meuligoe jroh sang geutuang  
Keu peunulang putroe muda  
Sireutoh droe nyang dendayang  
Keu ngon intan intan raja

Hana tom cre uroe malam  
Lom jikhadam putroe muda  
Kheundak Tuhan po geutanyoe  
Cut sambinoe susah teuka

Lawet gadoh putroe Khatun  
Cut bintang llhon sabe duka  
Uroe malam hana jitron  
Bungong sukon jimoer rukha

Putroe jimoer that meuruoh  
Jiteuoh beungoh ngon sinja  
Bukon sayang bak jeuraloh  
Hana boh siumu donya

Oh lon ingat ate reuloh  
Oh lon teuoh meugrak rasa  
Ureueng jaga nam reutoh droe  
Malam uroe hana reuda

Cuda gadoh di meuligoe  
Miseue bagoe broh lam mata  
Putroe jimoer hana padoe  
Sambinoe jiteuoh cuda

Teungoh bae sinyak putroe  
Teuka sidroe Pari Indra  
Dua jaroe ka jiseuon  
Pocut ampon bek le rukha

Ka meuteumeung putroe Khatun  
Baro ulon deungo haba  
Ban putroe ngo meunan jikheun  
Putik sukon teukeujot ka

Putroe beudoh mameueng-mameueng  
Sinyak buleuen ate suka  
Hana sapeuepi na jikheun  
Cut meugleueng peutoe jibuka

Jimeungui le cut bintang lhon  
Putroe sok phon siluweue sutra  
Jisawak ija kasab meubon  
Ngon pawon ban talam raya

Hana panyang ulon suson  
Galak that ulon bak meurika  
Oh lheueh meungui putroe seudang  
Dendayang jimeuhei sigra

Oh meusapat dum sibarang  
Sajan bintang aneuk raja  
Teuma laju jiteureubang  
Lam awan meulumba-lumba

Deungon rakyat rame han ban  
Ireng bintang agam dara  
Sikhan uroe jiteureubang  
Putroe seudang troh u donya

Meuntroe piyoh di teungoh blang  
Yub keutapang bale raya  
Jireng uleh dendayang  
seudang-seudang muda-muda

Laen rakyat dum nyang agam  
Geuyue riwang dum sineuna  
Teutap putroe piyoh sinan  
Ureueng ladang kalon rupa

Jieu ka troh putroe bintang  
Jiplueng rijang u astana  
Teugantoh reubah seulinteueng  
Jibeudoh lom plueng meutaga

Dalam kuta tamong leupah  
Beuot pantah jaroe dua  
Ngon napah ka meuhah-meuhah  
Ka jipeugah nyang kon haba

Ampon po cut nyoe ka leupah  
Putroe ceudah buta mata  
Lon kalon bit lam beureukah  
Lon glueng pantah si ceulaka

Putroe Khatun deungo seumbah  
Teuhah babah deungo haba  
Pane putroe lam beureukah  
Peue jipeugah nyang kon haba

Pakon meunan tameututo  
Meutajo hana takira  
Pakon meunan meuhah-meuhah  
Peue tapeugah nyan di gata

Jiseuot lom Putroe Badu  
Hana taeu bube raya  
Dua mata buta lon eu  
Putroe Diu jih ka teuka

Putroe Khatun makan susah  
Peue jipeugah si ceulaka  
Putroe kheun le teuma pantah  
Pioh payah dilee gata

Euntreuk meung na peue tapeugah  
Pakon susah gata duka  
Teuma laju ka jipioh  
Teubiet reuoh lam-lam mata

Puleh payah mangat tuboh  
Jaroe siploh beuot sigra  
Ampon po cut po di kamoe  
Ulonteu nyoe jak mē haba

Lon jak peugah tuan putroe  
Ka troh geuw~~yo~~e po jroh rupa  
Yub keutapang geupioh droe  
Ulonteu woe keunoe sigra

Putroe Khatun deungo lagee  
Sok ngon bajee pinggang ija  
Sutra ijo jitob ulee  
Meuhambo bee meunyeuk ata

Cukup meungui dum u asoe  
Padok uroe gadoh cahya  
Putroe tren le di meuligoe  
Sinaroe dendayang lingka

Teubiet u blang sinyak putroe  
Jak tueng adoe tanglong donya  
Taeu jijak jroh meupadoe  
Di jaroe payong dum rata

Bacut-bacut jibet tapak  
Jihayak payong meugisa  
Ngon rupa jroh that meusigak  
Oh jijak bagoe cempala

Putroe Khatun ka troh u blang  
Dendayang ban siseun lingka  
Badi' Jamaloi yub keutapang  
Leumah bintang kalon cuda

Putroe beudoh laju rijang  
Cut intan jak eumpeueng cuda  
Taeu jijak miseue bambang  
Ija pinggang jipot reula

Jitiek aleh jeuet tabloe blang  
Jipoh linggang yum beubahra  
Taeu blet blot mata subang  
Soe nyang pandang ate gila

Ban dua ho payong keumang  
Jimeutunang adoe ngon a  
Kalang kalot di teungoh blang  
Putroe bintang aneuk raja

Ret deh putroe ret noe putroe  
Ka meuwoe-woe lam blang ray a  
Jimeutunang a ngon adoe  
Ban dua droe sabe padra

Miseue buleuen deungon uroe  
Miseue pудoe ngon mutia  
Di teungoh blang meujak meuwoe  
Di jaroe payong meugisa

Hingga oh rab keunan sampoe  
Sapa adoe dilee mula  
Bukon sayang bungong pade  
Sret meugule angen timpa

Nateuh keunoe nyak boh ate  
Lam sabe lon teuoh gata  
Bukon sayang bungong geutoe  
Angen tampoe isret meukeuba

Hana teunguet malam uroe  
Gata adoe lon prehi teuka  
Lam sabe ate teugoe-goe  
Treb that adoe cre ngon gata

Bukon sayang bungong murong  
Rot meukeupong angen timpa  
Lon teubiet u blang buka payong  
Jak tueng tangglong panyot donya

Jiseuot le bungong tanjong  
Jaweueb saleuem narit cuda  
Bukon sayang a neuk tiyong  
Cicem murong po u para

Lon teubiet u blang tamong gampong  
Ate tutong oh tan cuda  
Bukon sayang aneuk bakoh  
Jitoh boh di dalam paya

Oh teuringat cuda gadoh  
Ate reuloh adoe gata  
Dalam sabe ulon teuoh  
Cuda gadoh han meuho ka

Meunan narit cut putroe jroh  
Srot meukeuboh ngon ie mata  
Oh lheueh sapa mumat jaroe  
Tajo adoe seumah cuda

Cuda sambot sinyak putroe  
Cut sambinoe jimeuwa-wa  
Geumeucom-com geumeumoe-moe  
Keudeh keunoe meucom meuwa

Lheueh nyan teuma bandua droe  
Beudoh geuwoe dalam kuta  
Adoe ngon a bandua droe  
Lom sinaroe dayang dum na

Putroe ek le u meuligoe  
Mat po adoe uleh po da  
Ngon dendayang ban sinaroe  
Ireng putroe ban seulingka

Duek meusapat bandua droe  
Malam uroe le ho sinja  
Dendayang beuot le khanduri  
Keu cut ti sinan bandua

Putroe makeuen dua sare  
Seunang ate adoe ngon a  
Oh lheueh makeuen jaroe geurah  
Tarek karah meuh suasa

Pajoh ranub na sibabah  
Putroe ceudah peugah haba  
Aneuk tiyong di cong panjoe  
Aneuk beuragoe di cong seulanga

Wahe cuda nyang sambinoe  
Tanyong kamoe tacalitra  
Masa gadoh cuda sidroe  
Siri nanggroe ho jibawa

Pat jikeubah di sambinoe  
Ngon soe keunoe oh tagisa  
Baro oh nan tanyong adoe  
Cut putroe tijoh ie mata

Reuloh ate sinyak putroe  
Ingat keudroe yoh lam rimba  
Jiseuot le cut sambinoe  
Sira moe ile ie mata

Leuek jikutru di cong panjoe  
Meureubok manoe dalam cintra  
Ka tatanyong wahe adoe  
Tango jinoe lon calitra

Lon hai adek teungoh manoe  
Jicok kamoe le jen rimba  
Jiba lam gle ulonteu nyoe  
Jeuoh nanggroe hana tara

Han lon tupeue nama nanggroe  
Hana sidroe manusia  
Jikeubah lon lam meuligoe  
Indah han soe indah rupa

Meuligoe jroh hana bagoe  
Dalam nanggroe hana ngon sa  
Umu nam thon lon duek sidroe  
Hana sapeue haro hara

Kheundak Tuhan bak siuroe  
Teuka sidroe aneuk raja  
Geuboh gampong deungon nanggroe  
Seutot lumpoe jeuep-jeuep rimba

Gata hai nyak nyang geulumpoe  
Jeuep-jeuep nanggroe geujak mita  
Baro oh nan kheun cut putroe  
Seuot adoe meunoe haba

Deungon beungeh hana bagoe  
Sinyak putroe tanyong bak a  
Pane raja nyang meulumpoe  
Tapeugah soe wahe cuda

Atawa jen hai da putroe  
Atawa soe manusia  
Pane gampong deungon nanggroe  
Cuda putroe soe bu nama

Putroe Khatun seuot meunoe  
Tango kamoe hai adekda  
Kon bangsa jen hai nyak putroe  
Nyan meulumpoe manusia

Saiful Muluk nan geurasi  
nanggroe Meuse bak geuraja  
Ngon meugah that hana sabe  
Hana mise ngon tapeusa

Rupa jroh that han peue peugah  
Nyak meutuah sa ngon gata  
Ban putroe ngo meunan kisah  
Seuum leupah dalam dada

Jiseuot le sinyak ceudah  
Ka jibantah narit cuda  
Meunyo insan da meutuah  
Bek tapeugah keunoe haba

Beuthat beujroh rupa ceudah  
Geukoh ulee mbah han ho geuba  
Jilumpoe kee jijeuet peugah  
Rimueng heumpah sulet raya

Hana kutem sigajah plah  
Tajak peugah wahe cuda  
Meunyo insan da meutuah  
Hina leupah kureueng bangsa

Meunyo geuthee uleh ayah  
Meuhat geuplah jih geusula  
Ngon lon cuda han sipadan  
Bek le kalam jimeuhaba

Putroe laen lon bri kaman  
Ceudah ruman hana nyang sa  
Nibak dada mom meureuntang  
Kayem u blang oh seumula

Salah bacut tan dendayang  
Putroe seudang mantong dara  
Keu jih jinoe lon bri putroe  
That sambinoe hana tara

Bek jipeugah lon jilumpoe  
Jiboh nanggroe jijak mita  
Tapeukawen ngon putroe nyan  
Cuda meunan jak meuhaba

Bek meugalak keu lon tuan  
Meunyo insan nyankeu jeumba  
Deungon lon cuda han sipadan  
Jih nyan insan lon nyoe indra

Rupa lon jroh hana macam  
Barangkasoe tan ngon tapeusa  
Neujak peugah cuda meunan  
Ngon ulon han sabe padra

Bek meunasu keu lon tuan  
Mate geucang han ho kuba  
Bah jitiek droe dalam kubang  
Buya kuran han kuhawa

Han kujinoh bangsa insan  
Lon tuan ceudah that rupa  
Meunan narit putroe intan  
Cuda yoh nyan sro ie mata

Weueh that ate sinyak putroe  
Sabab adoe geucang banta  
Tahe mandang cut sambinoe  
Sira neumoe tob ngon muka

Sayang jih that keu samlakoe  
Hana bagoe weueh jirasa  
Ka jikheun lom uleh adoe  
Tango kamoe wahe cuda

Meung na umu bak malam nyoe  
Singoh uroe jak meuupa  
Dalam taman jak meuhayon  
Dalam keubon jak meusuka

Ate rindu cuda dilon  
Jak meuhayon deungon cuda  
Meunan narit cut meuubon  
Putroe Khatun ate suka

Dalam ate putroe Khatun  
Singohkeu phon lon eu rupa  
Watee lon ba jak meuayon  
Lam keubon lon yue preh banta

Teukabo that sinyak putroe  
Jitampa droe ceudah rupa  
Lon keumeung eu singoh uroe  
Pakri bagoe oh na banta

Putroe Khatun meunan pike  
Singoh bah le kuba banta  
Bitpi meunan han jilahe  
Dalam ate meunan kira

Lheueh meututo bungang pade  
Beudoh eh le malam jula  
Eh meusapat bandua droe  
Beungoh uroe ka rab faja

Putroe Khatun beudoh sidroe  
Tinggai adoe dalam tika  
Jitron laju di meuligoe  
Laen sidroe goh lom jaga

Jijak laju sinyak putroe  
Bak samlakoe banta muda  
U meuligoe jiek laju  
Jieu teungku mantong indra

Mantong teungoh di tuanku  
Lam keuleumbu tire rawa  
Putroe Khatun tamong laju  
Peugoe teungku banta muda

Ka jipinah bantai suson  
Putroe ukon po cut banta  
Jaroe leumoh miseue luson  
Leupie sang mbon lam piala

Dua lhee seun putroe ukon  
Teungku ampon hana jaga  
Putroe ceupet teuntang teuot  
Jiurot sampoe u dada

Lhee seun saho putroe urot  
Ka teukeujot aneuk raja  
Beungehneu that po samlakoe  
Neukheun meunoe laju sigra

Saleh soe- soe peugoe kamoe  
Bak beungoh nyoe han tom nyang ka  
Meunyo inong kukoh jaroe  
Ureueng lakoe kuyue sula

Lam tutupan jih kupasoe  
Lon jipeugoe hana jeumba  
Meunan narit po samlakoe  
Seuot putroe Khatun muda

Di pasi geupula geutoe  
Di nanggroe geupula jeumpa  
Meung gob laen han jipeugoe  
Meung kon putroe woe lam rimba

Ban neudeungo ka neutusoe  
Beudoh jinoe neuwiet sila  
Banta tanyong teuma meunoe  
Pakon putroe meugriet raya

Peue meukeusud lon tapeugoe  
Hai sambinoe peue hajat na  
Han jan beungohpi meung uroe  
Hai cut putroe peue na haba

Raya hajat jeuet lon peugoe  
Kon galak droe po meukuta  
Lon tuanku ka troh keunoe  
Tango nyoe saboh rasia

Lon jak peugah tuanku droe  
Sinyak putroe ka troh teuka  
Oh nan baro putroe peugah  
Banta indah tanyong sigra

Jinoe ho ka putroe ceudah  
Pat takeubah keunoe taba  
Jak cok laju nyak meutuah  
Taba pantah ubak hamba

Putroe Khatun jawueb bagah  
Hai khalifah ngo lon kata  
Hana patot lon ba keunoe  
Sang-sang kamoe juru basa

Aeb keuji ulonteu nyoe  
Meunyo keunoe sinyak lon ba  
Sang tuanku lon bri adoe  
Jeuep-jeuep nanggroe gob ceureuca

Meunan pike bak lon sidroe  
Jikheun lon nyoe sang beurua  
Meunan narit putroe ceudah  
Teuka susah banta muda

Banta tanyong laju pantah  
Nyak meutuah pakri daya  
Lon keumeung putroe indah  
Pakri ilah ngon bicara

Sinyak putroe teuma peugah  
Bek susah duli meukuta  
Euntreuk lon ba dalam keubon  
Cut bintang lhon aneuk raja

Bah le awai teungku ampon  
Lam keubun neupreh meukuta  
Tuanku preh bak meuayon  
Euntreuk dilon sinyak lon ba

Meunan narit putroe Khatun  
Bajek sukon ate sukon  
Lheueh jiwasiet dum sinaroe  
Sinyak putroe laju gisa

Jiwoe laju bak teumpat droe  
U meuligoe jiek lanja  
On sare troh u meuligoe  
Sinyak putroepi ka jaga

Jitanyong le teuma meunoe  
Pane neuwoe wahe cuda  
Lon eu hana lam meuligoe  
Cuda putroe han meuho ka

Lon sangka ho cuda putroe  
Ate lon nyoe bukon guga  
Sangka gadoh miseue puroe  
Beungoh uroe lon eu hana

Putroe Khatun seuot meunoe  
Lon peugoe gata hana jaga  
Han lon preh wahe adoe  
Pruet lon seungkoe arat raya

Lon tren laju teuma sidroe  
Lon eu uroepi ka faja  
Dalam keubon ulon tamong  
Mantong bingong lon adekda

Lon ba sikrak lom ngon runong  
Ngon syet bungong nyak keu gata  
Meunan jikheun Putroe Khatun  
Puteh sabon han le haba

Hana sapeue le jitanyong  
Narit keunong kheun le cuda  
Bak jikira bit nyo meuhat  
Ban nyang teupat haba po da

Han jitupeue putroe ubat  
Jak meubiat deungon banta  
Teutap putroe dilee siat  
Laen sahbat lon calitra

Seureuta lon balek ayat  
Mangat teupat oh tabaca  
Musem timu tameupukat  
Musem barat tabloe publoe

Amma bakdu nyoe nyang cakap  
Ab buleukat takab tumpoe  
Saiful Muluk lon riwayat  
Tango sahbat aduen adoe

Deungon Said duek mupakat  
Meusyawarat banta peuet droe  
Dalam keubon lon jak siat  
Nibak teumpat sinyak putroe

Said Juhari seuot leugat  
Ampoñ deelat po dikamoe  
Ban nyang napsu deungon hajat  
Ikot meuhat kamoe lhee droe

Meunan Said geukheun teupat  
Banta deelat peukeumah droe  
Banta peuet droe hase keumah  
Geutron pantah di meuligoe

Tajak laju banta indah  
Ban peuneugah Khatun putroe  
Leupah kuta bungong kipah  
Lam blang luah geuhila droe

Leumah neueu ka deuh keubun  
Cut bintang Ihon laju peutoe  
Tahe mandang putik sukon  
Neungieng keubun that seureuloe

Neupeurab le laju mameueng  
Bungong seupeueng hireuen laloe  
Buka pinto tamong leugat  
Troph bak teumpat ureueng sidroe

Ureueng jaga sinan teutap  
Soe nyang liwat ka geuseudoe  
Tok Samadin nan geulkab  
Ngon tungkat geumat bak jaroe

Raya panyang hana bandeng  
Muka ceuken bingkeng tuloe  
Ban geukalon puteh licen  
Laju geutron datok pindoe

Dalam ate sangat gigeng  
Tok Samadin beungeh tuloe  
Banta muda jimeung hantam  
Datok suang laju peutoe

Ka teukeujot banta seudang  
Datok reumpang keunan ka toe  
Jitanyong le datok suang  
Aneuk jalang peue buet keunoe

Ho ka meujak peugah rijang  
Yoh goh simpan nyawong sampie  
Peue kajak eu hareuem jadah  
Habeh reubah bungong kamoe

Ureueng tuha that amarah  
Seuot pantah po samlakoe  
Lon hai kuya bek tamaraah  
Ngo lon peugah dum sinaroe

Lon hai kuya gampong jarak  
Bukon lon jak ngon galak droe  
Meung kon na soe nyang peutulak  
Hana lon jak bak teumpat nyoe

Putroe Khatun bunoe peugah  
Geuyue langkah ulon keunoe  
Kon galak droe tok meutuah  
Deungan titah tuan putroe

Ban geudeungo dum peuneugah  
Teuhah babah datok pindoe  
Ka teumakot hanpeue peugah  
Takot salah nibak putroe

Geiduek laju bak teumpat sot  
Yo meukhot-khot datok pindoe  
Hana sapeue le meuceukot  
Yo meukhot-khot leungo asoe

Tungkat peudeueng geugeulawa  
Dalam rimba geusron dudoe  
Seureuta deungon geukheun sigra  
E bintara nyang samlakoe

Jak hai aneuk laju gata  
Ho nyang suka bak ate droe  
Di lon aneuk meung kujaga  
Nyang po atra tuan putroe

Tok Samaden meunan kata  
Beudoh banta le nyan peuet droe  
Neujak laju pantah-pantah  
Galak leupah po samlakoe

Ate-ate banta indah  
Neujak pantah hana bagoe  
Dalam keubon laju neujak  
Neungieng sibak kayee jatoe

Banta kalon jroh meusigak  
Di yub bak na batee pudoe  
Pioh siat teungoh jijak  
Ate galak po samlakoe

Neuduek sinan teuma leugat  
Tanyong pakat bak rakan droe  
Yoh nyansabda banta deelat  
Wahe sahbat tango kamoe

Susah ate lon bukon that  
Taduek siat gata jinoe  
Ulon meujak keunan siat  
Lon jak eu pat sinyak putroe

Seuot Said teuma leugat  
Ban nyang hajat tuanku droe  
Meunan Said geukheun teupat  
Beudoh leugat po samlakoe

Po banta jak dalam keubon  
Trok bak ayon si nyak putroe  
Tahe mandang putik sukon  
Cut bintang lhon teukab jaroe

Neueu kulam saboh sinan  
Ngon peunuman nibak sagoe  
Anoe puteh sang beulian  
Turab intan deungon pудое

Sang ceureumen ie jeureungeh  
Rasa mameh sang ie madu  
Saiful Muluk dong di bineh  
Khem teuseuheh neumeunyanyoe

Ngon suara leumak mameh  
Dong di bineh kulam putroe  
Ka teupike banta deelat  
Nyokeuh teumpat putroe manoe

Tahe mandang puteh lumat  
Neudong seungab sinan sidroe  
Neueu ureueng tan meulalat  
Neutren leugat neujak manoe

Oh lheueh manoe neumeusalen  
Bintang canden mangat asoe  
Oh lheueh meungui puteh licen  
Jak ho laen po samlakoe

Dalam keubon ka neupeutak  
Po banta jak mita putroe  
Neujak kalon peue nyang galak  
Ka neujak-jak sinan sidroe

Ate manyoh rindu deundam  
Neupreh datang tuan putroe  
Teutap banta dalam taman  
Lon karangan keu cut putroe

Meuwoe kisah puteh leusoh  
Ngo teungku beh lon hareutoe  
Ka troh watee jeuem poh siploh  
Geupah geupoh lam meuligoe

Dum dendayang putroe meuhei  
Jiyue meungui dum sinaroe  
Beudoh meungui Cut Jamaloi  
Manek kaoi sinyak putroe

Cok kasturi boh lam jeumboi  
Ayak aroi jiro lam jaroe  
Jiboh leugat lam seulanggoi  
Bungong jisoi tujoh bagoe

Oh lheueh meungui putroe bintang  
Jitren rijang di meuligoe  
Seureuta deungan dum dendayang  
Jijak sajan ireng putroe

Jitiek aleh jroh meulinggang  
Leumah subang mata pudoe  
Rupa ilok ban buleuen trang  
Soe nyang pandang mata laloe

Badan ceudah jroh meutrieng blang  
Sang geutuang meunankeuh proe  
Soe nyang kalon ate bimbang  
Nyum bek leukang taeu bagoe

Han jeuet tangieng meung bu bayang  
Reubah pangsan le teupipoe  
Badi' Jamaloi that analan  
Hana meunan laen putroe

Hana bandeng ngon putroe nyan  
Ka lon pandang jeueb-jeueb nanggroe  
Oh takalon putroe intan  
Ek bantangan dum geutanyoe

Baranggasoe oh jipandang  
Ate guyang hireuen laloe  
Iman gadoh akai hilang  
Soe nyang pandang ate wawoe

Cut putroe jak didalam blang  
Ngon dendayang jihayak droe  
Ka'a ka'u sare kiam  
Dendayang galak han bagoe

Troh lam keubon putroe seudang  
Neuek rijang bale pudoe  
Meupioh le dum sibarang  
Putroe seudang ban dua droe

Tho ngon reuoh puleh badan  
Beudoh rijang dua putroe  
Sira kheun ubak dendayang  
Sibarang tinggai disinoe

Lheueh teuma laju jitren  
Ngon Cut Khatun ban dua droe  
Ban dua droe jak meuayon  
Putroe Khatun deungon adoe

Neumeusyae neumeupantun  
Tulâk ayon crang cring bunyoe  
Sideh awai disinoe phon  
Meutulak cron ban dua droe

Teungoh-teungoh jimeuayon  
Puteh sabon pruetjih seungkoe  
Jikheun ubak Putroe Khatun  
Hai cuda lon ka meupaloe

Han jeuet cuda lon meuayon  
Pruetku di lon laju seungkoe  
Meunan narit putik sukon  
Putroe Khatun seuot meunoe

Bek le hai nyak tameuayon  
Jak lam keubon peumeuen droe  
Lom ngon uroepi ka tutong  
Puteh sabon jak tamanoe

Meunan narit Putroe Khatun  
Tren lam ayon sinyak putroe  
Geujak meuen dalam keubon  
Putroe Khatun jak ba adoe

Geujak laju dua sare  
Galak ate hana bagoe  
Jak seumeuen cut juhari  
Jijak cari po samlakoe

Jiba keunoe jiba keudeh  
Deuh jieu jeh bungong geutoe  
Tahe mandang bungong puteh  
Ka teuseureh lam ate droe

Cut Jamaloi galak habeh  
Ate puleh sinyak: putroe  
Ban jikalon Saiful Muluk  
Ka teuseupok cut sambinoe

Sinyak putroe ate mabok  
Sret bungong ok putoh taloe  
Ho nyang neujak Saiful Muluk  
Keunan seuntok ngieng cut putroe

Keunan sabe mata daok  
Rupa ilok po samlakoe  
Dong meusapat dua putroe  
Keudeh mata di putroe nyoe

Po adoe lale ngieng banta  
Nyang di po a tob-tob gigoe  
Ka teuseunyom Khatun muda  
Jingieng mata si nyak putroe

Cut Jamaloi tanyong sigra  
Wahe cuda neueu jih soe  
Na taturi wahe cuda  
Pane raja keunoe sampoe

That meusambot lon eu rupa  
Hana nyang sa barangkasoe  
Bak ate lon sang nyo raja  
Ceudah rupa gob nyan sidroe

Sabab ngon lon gob nyan rupa  
Laen han sa barangkasoe  
Galak lon that wahe cuda  
Neujak maba u meuligoe

Natatusoe pane raja  
Peugah cuda ubak adoe  
Han tom lon eu ube nyang ka  
Meunan rupa that samlakoe

Rupa ceudah puteh licen  
That bit canden gob nyan sidroe  
Ngon nyan cuda lon meukawen  
Nyang laen hana lon tem roe

Meugah that jroh bit raja jen  
Leubeh canden gob nyan sidroe  
Tajak cuda peugah baten  
Lon meukawen cuda putroe

Han jeuet lon ngieng cuda cänden  
That meupuseng mata lon nyoe  
Meunan narit puteh licen  
Khatun canden seuot meunoe

Gata ka na biék raja jen  
Keu peue laen wahe adoe  
Ngon nyan hai nyak bek meukawen  
Na raja jen nyang di nanggroe

Han lon jeuet jak peugah baten  
Jipeulen ulon hai adoe  
Ulon jipoh le raja jen  
Puteh licen keudeh jak woe

Jiseuot lom putroe ceudah  
Da meutuah pakri adoe  
Meuhan cuda neujak peugah  
Uroe nyoe bah lon kupoh droe

Oh lon jak han meugrak langkah  
Galak leupah lon han bagoe  
Putroe Khatun seuot bagah  
Tob ngon babah ngieng bak adoe

Hana lon turi nyak meutuah  
Pakri bah lon peugah jinoe  
Ngon gata nyak saban leupah  
Hana tiwah keudeh keunoe

Peue tagaro meutan gatai  
Meung ka tinggai peue tapuwoe  
Putroe Khatunle that akai  
Jipeugah hal han jitusoe

Pura-pura han jituri  
Meunan po ti kheun bak adoe  
Cut Jamaloi jieu pakri  
Bek meuri bak sinyak putroe

Sabab jikheun hana galak  
Jimeung timplak singoh uroe  
Jidong mantong bungong meurak  
Po banta jak keunan ka toe

Banta neungieng puteh muprak  
Bukon galak po samlakoe  
Neuplueng laju ka neutinjak  
Neukarat bak sinyak putroe

Neukeumeung drob bungong meurak  
Habeh galak po samlakoe  
Teungoh neuplueng ka meuseumpom  
Hana troh lom ubak putroe

Bukon sayang taeu sidom  
Tika barom rubang taloe  
Saiful Muluk ka meuseumpom  
Meuteugom didalam duroe

Bak meukarat neumeung teugom  
Meuseumpom sinan teupipoe  
Han jeuet neungieng dum nan carong  
Bungong teuprom ceudah han soe

Bak geureuphang ateueh ateueng  
Aneuek udeueng panyang duroe  
Saiful Muluk ka teugageueng  
Seulinteueng didalam duroe

Teungoh u gle tarek awe  
Cok nyang sabe puta taloe  
Si cut banta han meumot le  
Sang ka mate po samlakoe

Dalam uroe ka meugule  
Bungong pade ka teupipoe  
Putroe Khatun ka teupike  
Ka jiplueng le laju sidroe

Jiduek laju bungong pade  
Geue bak ate po samlakoe  
Jieu nafah sang hana le  
Panyot kande jipoh-poh droe

Bak jisangka bit ka mate  
Ka jimoe le sinyak putroe  
Hai tuanku bungong pade  
Sret meugule dalam anoe

Oh lon ingat han meusampe  
Teungku mate bak uroe nyoe  
Jimoe bae jimeerawé  
Bungong pade rugha han soe

Oh jiingat masa lam gle  
Reuloh ate cut sambinoe  
Cut Jamaloi ka teupike  
Pakon sabé cuda geumoe

Saleh gob nyan kadang mate  
Gotkeuh bah le lon jak jinoe  
Meunan ingat bungong pade  
Jipeutoe le bak samlakoe

Troh bak banta cut jeunulang  
Tahe mandang sinyak putroe  
Putroe kalon banta seudang  
Sinan pangsan dalam uroe

Teuka gaseh cut analan  
Oh i jipandang po samlakoe  
Ka teuka grak bungong karang  
Meulinggang reubah teupipoe

Teuploh ngon ok teugeureubang  
Meupasang atueh samlakoe  
Bukon sayang lon eu tirom  
Beureugom jicong: bak panjoe

Sinyak putroe ka meusumpom  
Meuteugom atueh samlakoe  
Bukon sayang lon eu reupeueng  
Beulideueng nyang panyang duroe

Putroe meugom banta linteueng  
Ka teugageueng dalam duroe  
Ateueh banta putroe buleuen  
Dalam leumueng po samlakoe

Bukon sayang ceuntra mula  
Meudang ara meujen tuloe  
Ka meutindeh ureueng dua  
Po banta deungon cut putroe

Dalam uroe hana jaga  
Nyang di po da jipoh-poh droe  
Putroe Khatun Jimoe rugha  
Jieu banta deungon adoe

Ka pangsan sinan ban dua  
Lam uroe kha ka teupipoe  
Bah le oh nan seungab haba  
Ureueng dua dalam uroe

Nyoe laen ayat lon tuka  
Sang gura ayat lon gantoe  
Bukon sayang aneuk keubeue  
Didalam weue lheueh u lua

Seungab dilee nyang ka tabeue  
Jinoe u keue leubeh gura  
Gampong Reng Krueng Reng Mancang  
Gampong Reng Blang toe Meuraksa

Amma bakdu jula malam  
Lon tuan teungeuet that mata  
Putroe Khatun lon peuriwang  
Deungo rakan bek le gubra

Mantong jimoe sinyak putroe  
Jieu adoe goh lom jaga  
Susah jih that hana bagoe  
Bandua droe ka teuhanta

Han jitukri nyan mita proe  
Jimeueng peugoe nyak cut banta  
Takot pakri teuma dudoe  
Malee putroe kalon rupa

Ka teupike teuma meunoe  
Po samlakoe oh han jaga  
Ulon kuplueng laju kuwoe  
Tinggai adoe deungon banta

Nak bek malee bandua droe  
Bek jeuet dudoe malee mata  
Meunan ingat sinyak putroe  
Beudoh jinoe laju sigra

Cok ie mawo ro lam jaroe  
Geusuek bak dhoe ureueng dua  
Phon diulee troh u jaroe  
Hingga sampoe gaki dua

Dua lhee seun peujak peuwoe  
Cut putroe nyang bijaksana  
Keunong ie mawo leupie asoe  
Puleh putroe deungon banta

Ban teukeujot po samlakoe  
Neuwa putroe meukab dada  
Putroe Khatun kalon bagoe  
Plueng jijak woe u astana

Tan jipeugah bak dayang droe  
Cut putroe soe ngieng hana  
Tinggai banta deungon putroe  
Hana padoe meucom meuwa

Ka neucom-com sinyak putroe  
Po samlakoe galak raya  
Hana panyang lon hareutoe  
Maklum adoe ngon seedara

Kon meung gob nyan barangkasoe  
Ka sampe barang tacinta  
Han peue panyang lon boh sinoe  
Geutanyoe meunan cit rasa

Nyoepi meunan di samlakoe  
Ngon putroe nyang ceudah rupa  
puleh galak ban dua droe  
Ka sampoe ube neupinta

Neujak piyoh teuma dudoe  
Neupeutoe bak bale raya  
Ek cong bale bandum droe  
Duek cut putroe sajan banta

Puleh payah putik sukon  
Cut bintang lhon buka haba  
Puteh-puteh bungong sukon  
Didalam on habeh mala

Kureueng meujeulih kamoe duson  
Meuah ampon bak meukuta  
Reusam kanun hana bak lon  
Jeuoh gampong lon indra

Nyoe lon tanyong teungku ampon  
Peugah bak lon po meukuta  
Pat bu nanggroe siri gampong  
Teungku ampon soe bu nama

Soe nan ayah peugah bak lon  
Keunoe neutron peue jak mita  
Peue neujak eu dalam keubun  
Meureumpok lon ngon meukuta

Meunan seumah putik sabon  
Panyot tanglong seuot sigra  
Ka tatanyong gampong nanggroe  
Tango putroe lon calitra

Nanggroe Meuse lon hai putroe  
Sinan adoe bak lon raja  
Saiful Muluk nama lon nyoe  
Nyang troh keunoe raya pinta

Lon boh gampong deungan nanggroe  
Seutot lumpoe lon adekda  
Gata pocut nyang lon lumpoe  
Dalam peutoe lon eu gamba

Oh nan baro kheun samlakoe  
Seuot putroe dien peulita  
Patotkeu biet tuanku droe  
Dilon baroe lon ngo haba

Cuda peugah di meuligoe  
Tuanku droe ka troh teuka  
Dum neupeugah sigala proe  
Cuda sidroe nyang calitra

Teuma lon kheun sira lon khem  
Hana lon tem ngon meukuta  
Hana galak lon teungku le  
Sira lon khem pura-pura

Lon keubit-bit ulon kheun nyan  
Lon meuwayang deungon cuda  
Meunan putroe peugah macam  
Seuot rijang banta muda

Teungoh u gle koh meurawan  
Peugot tungkang biduk raya  
Meuploh laot lon jeumeurang  
Meureutoh blang ulon hila

Gle nyang seupot lon niet padang  
Gunong manyang lon niet data  
Laot sigatra lon jeumeurang  
Putroe seudang lon jak mita

Sikureueng thon lon boh nanggroe  
Gata putroe nyang lon cinta  
Meuhan meuteumeung bungong geutoe  
Hareuem nanggroe han lon gisa

Masa lon tron ka lheueh sumpah  
Lon cok langkah buleuen Safa  
Meuhan meuteumeung putroe ceudah  
Deumi Allah han lon gisa

Han le lon woe ubak ayah  
Nyak meutuah peue tasangka  
Hareuem laen dilon nikah  
Nyak meutuah meung kon gata

Oh nan baro banta peugah  
Seuot pantah putroe muda  
Kruseumangat tuanku droe  
Hajat sampoe po meukuta

Nyang neuhajat keu lon sidroe  
Neuboh nanggroe lon neumita  
Tuhan neubri ka troh sampoe  
Lon nyoe sidroe di meukuta

Lon tuan neuteumeung puwoe  
U nanggroe teumpatneu raja  
Lom banta kheun teuma dudoe  
Neudeungo nyoe putroe muda

Tatem pocut laba rugoe  
Peugah putroe lon ngo nyata  
Cuba neukheun wahe adoe  
Pakri bagoe nibak gata

Jiseuot le sinyak putroe  
Tuanku droe kon hai seunda  
Bungong peukayan keumang seupot  
Beungoh srot bungong keupula

Barangkari ulon ikot  
Lon turot han kheun meukuta  
Bukon sayang bak rangkileh  
Bak paleh dua peue nama

Keu teungku that ulon gaseh  
Nyawong habeh han lon kira  
Cicem punggok tren u bumoe  
Puyoh manoe dalam cintra

Jinoe ka troh hajat sampie  
Bak uroe nyoe po meukuta  
Si nyak putroe jimeupanton  
Meutulak cron deungon banta

Bukon sayang lon eu siwah  
Jimeureupah ngon cempala  
Meunyo meunan cut meutuah  
Tabri sumpah ngon sijahtra

Uroe dudoe bek meuungki  
Beuseb janji lon ngon gata  
Di lon putroe sumpah lon bri  
Bek meuungki singoh lusa

Seuot putroe nyang juhari  
Ngo lon kheun kri po meukuta  
Ija puteh keu pupanji  
Kapai hendi peudieng lada

Neungo teungku sumpah lon bri  
Tanda janji kong seutia  
Meunyo ubah lon keu duli  
Bak titi ubah ie muka

Bunda ayah bek lon turi  
Uroe page di blang mahsya  
Bukon sayang mirahpati  
Jinari ateueh seulasa

Meung goh keumang aron di pasi  
Mantong janji lon meukuta  
Seunapang cina tumbak dibabah  
Jiboh tatah di Irupa

Habeh janji deungon sumpah  
Meunyo ubah meulungkop donya  
Bukon sayang bungong giri  
Keudidi meuen lam paya

Seungab tuto bandua si  
Habeh janji ureueng dua  
Nyang mangat bee ukheue usi  
Ureueng tari dum jak mita

Hana panyang ulon rawi  
Tho ngon gusi teungeut mata  
Tamse ureueng jeb ie kupi  
Pajoh ruti asoe kaya

Muwoe kisah cut putroe ti  
Ka seb janji ureueng dua  
Aneuk tiyong dicong rambot  
Aneuk got-got dicong ara

Bek le teungku seuot sambot  
Uroe seupot jak tagisa  
Bukon sayang gapeueh panjoe  
Angen tampoe srot meukeuba

Beudoh teungku nak tajak woe  
Jeh ho uroe watee asa  
Meunan jikheun sinyak putroe  
Po samlakoe beudoh sigra

Tron cong bale bandua droe  
Mumat jaroe putroe ngon banta  
Jak dua mumat-mat jaroe  
Samlakoe ngon putroe muda

Meunyum malee sinyak putroe  
Bak samlakoe jikheun sigra  
E tuanku panyang nanggroe  
Deungo kamoe po meukuta

Bek tuanku sigo tawoe  
Malee kamoe deungon cuda  
Neupateh lon tuanku droe  
Euntreuk neuwoe oh rab seunja

Bah le awai ulon sidroe  
Bah le dudoe po meukuta  
Kira-kira ka troh lon woe  
Tuanku droe seutot sigra

Meunan narit sinyak putroe  
Peulheueh jaroe le cut banta  
Seureuta neukheun le samlakoe  
Jak hai putroe dilee gata

Bak tinggai lon dilee sinoe  
Bah le kamoe dudoe gisa  
Teuma beudoh sinyak putroe  
Laju jiwoe po jroh rupa

Ngon dendayang dum sinaroe  
Laju jiwoe dalam kuta  
Dalam keubon tinggai samlakoe  
Neupreh sampie uroe sinja

Si nyak ceudah laju jiwoe  
Ngon dayang droe u astana  
Cut Jamaloi ka troh jiwoe  
U meuligoe jiek sigra

Putroe Khatun di meuligoe  
Jieu adoe ka troh gisa  
Ka teusinyom ban dua droe  
Tob-tob gigoe nyang di poda

Hana sapeue jimeututo  
Bungong keundo teukhem saja  
Jitamong le putroe ijo  
Ateueh kasos jiduek lanja

Putroe Khatun teuma meusu  
Narit payu phon jibuka  
Bukon sayang bungong meulu  
Oh beungoh hu seupot mala

Wahe adek bintang timu  
Tango bungsu narit cut da  
Cempala cot roh lam taloe  
Buga jatoe ubat mata

Lon meutanyong hai nyak putroe  
Insan sidroe ho ka taba  
Teungoh u gle tarek awe  
Cok nyang sabe peugot raga

Saleh hai nyak tapoh mate  
Lon eu han le manusia  
Oh lon ingat masa lam gle  
Reuloh ate lon adekda

Meunyo hai nyak nyang ka mate  
Jak cok bangke keunoe taba  
Peugah adoe bek taiem le  
Weueh that ate lon keu banta

Meunan narit bungong pade  
Jiseuot le po jroh rupa  
Timoh di blang naleueng awe  
Di pante naleueng krui guda

Pakon cuda haba mise  
Narit singke silagoena  
Got hai cuda tapoh mate  
Bek udep le dalam donya

Sang indatu lon neucungke  
Dum nan singke narit cuda  
Nyang got neupoh lon beumate  
Bek lon ngieng le mata cuda

Bukon sayang bungong langsat  
Keunong kilat sret meukeuba  
Tob ngon rincong lon boh ubat  
Nyang saket that timplah haba

Nyum beumate lon ngon siat  
Dum nan saket narit cuda  
Allah-allah cuda putroe  
Han patot nyoe meunan jeumba

Cut Jamaloi yoh nyan jimo  
Seuot meunoe teuma po da  
Bek le tamoe he nyak putroe  
Taiem adoe bek le rugha

Gantoe he nyak lon peureunoe  
Bek le tamoe nyak jroh rupa  
Ka lon peugah seupot baroe  
That samlakoe manusia

Han tapateh he nyak putroe  
Insan sidroe ta seurapa  
Weueh that ate lon hai adoe  
Asee pindoe tapeutaba

Ka meutuka bak uroe nyoe  
He sambinoe ka roh gata  
Nyankeuh hai nyak baranggasoe  
Bek tampa droe ceudah rupa

Bek teukabo wahe adoe  
Baranggasoe kon meugata  
Meunan jikheun si nyak putroe  
Di po adoe maken rugha

Jiseuot le sira jimo  
Po sambinoe kheun bak cuda  
Allah-Allah cuda putroe  
Han patot nyoe timplak haba

Pakon cuda haba timplak  
Han patot hak meunan jeumba  
Narit adoe leupah sikrak  
Lon timplak di keue mata

Lon hai cuda ate rusak  
Mangat neutak di keupala  
Putroe Khatun deungo meunan  
Seuot yoh nyan laju sigra

Sangat utoh ngon bijakan  
Jipeuseunang ate duka  
Jeuet jipeuglah haba timplak  
That cangklak jiboh-boh haba

Cit that utoh puan pirak  
Deungon rancak le bicara  
Ka jipeugah meunoe meudeh  
Mangat puleh ate luka

Putroe Khatun bit that areh  
Utoh habeh jibeuboh haba  
Cut Jamaloi han le beungeh  
Khem teuseuheh suka cita

Leupie ate muka rumeh  
Rindu mameh ngon ie muka  
Sijuek ate di po adoe  
Jipiyoh droe duek ngon cuda

Cut Jamaloi han le jimoe  
Seungab oh noe siat haba  
Gampong Usi toe gampong Cot  
Nyang teupat rot jak u Tiba

Amma bakdu bakong teuwot  
Takheun beugot hai seedara  
Saiful Muluk ulon ceukot  
Neumeung seutot putroe muda

Oh leupah woe putroe got  
Banta seutot laju sigra  
Ubak Said ka neupeutoe  
Neupeugah proe dum peukara

Wahe adek deungo kamoe  
Gata jinoe tajak gisa  
Po banta woe u meuligoe  
Ubak putroe nyang jroh rupa

Yoh nyan Saidpi laju woe  
Beudoh jinoe le ban tiga  
Teutap Said bak teumpat droe  
Lon hareutoe banta muda

Hingga ka troh laju neuwoe  
Ubak putroe le neuhila  
Banta ka troh u meuligoe  
Leumah putroe kalon rupa

Banta neuek u seuramoe  
Sinyak putroe ate suka  
Beudoh po a cok rampagoe  
Teuma adoe cok ceurana

Puliek pineueng pancalogam  
Masak plah nam muda plah dua  
Putroe puliek rijang-rijang  
Cok geurandam sigra-sigra

Cut Jamaloi nyang that tajam  
Jicok puan nyang meucintra  
Jicok ranub limong seupeh  
Jipileh nyang gura-gura

Jiboh keunoe ka roh keudeh  
Ka jingieng jeh nibak seulasa  
Beudoh adoe jikoh tangke  
Jipasoe le lam ceurana

Jiboh ranub dalam bate  
Mata sabe ateueh banta  
Tangke ujung han taturi  
Buet sinyak ti putroe dua

Utohji that hana sakri  
Jilisi ban siseun lingka  
Jiboh ranub Surang sureng  
Sang geurubeng papeuen bahtra

Bungong lawang lom jipateng  
Jipuseng bakong meunila  
Hase ranub dalam puau  
Cut intan beudoh bandua

Jitron laju bungong peukan  
Sapa tuan banta muda  
Badan sabe rupa saban  
Nyo sipadan adoe ngon a

Ban dua droe that analan  
Tamse intan ngon meutia  
Cut putroe jak jroh meurungkho  
Santeuet baho jih bandua

Ban sare troh babah pinto  
Tadeungo syo jiseumapa  
Ijo-ijo naleueng sambo  
Ijo biro naleueng sira

Bek le teungku dong di pinto  
Neulalu keunoe bak tika  
Saiful Muluk deungo tuto  
Banta lalu laju sigra

Neutamong le keumang ijo  
Ateueh kaso duek po banta  
Peurab laju dara baro  
Seumah teungku putroe dua

Seumah teuot com di gaki  
Putroe siti bijaksana  
Teuma putroe duek beureunti  
Kanan kiri putroe dua

Putroe cok le ranub bate  
Neusambot le banta muda  
Jimeusu lom bung~~ong~~ pade  
Hana mise putroe buka

Leukek jikutru di cong sukon  
Aneukek tiong dalam cintra  
Nyoe na teungku ranub sion  
Ranub leupon tawo buga

Ngon srah babah deelat ampon  
Bekkeuh ulon neuceureuca  
Reusam kanun hana bak lon  
Kamoe duson nyoe ban dua

Reudok han tom ngon geulanteue  
Kilat soseue hana reuda  
Nyokeuh banta ranub tabeue  
Leupong pageue adekkanda

Bek tuanku neukheun sapeue  
Masen tabeue bek takira  
Meunan narit sinyak putroe  
Seuot le nyoe banta muda

Kru seumangat hai nyak putroe  
Bak lon adoe seulaseh jawa  
Ateueh ulee lon cut putroe  
Nibak kamoe that mulia

Banta cok le deungon bungkoh  
Puteh leusoh sambot sigra  
Nyoe na bak lon hai adoe jroh  
Ranub gob boh di rot raya

Ulon pasoe dalam bungkoh  
Putroe beh lon bri keu gata  
Saleh po cut ek tapajoh  
Adoe beh ranub ka tuha

Nyankeuh adoe ka lon peugah  
Bek tamarah lon adekda  
Nyankeuh pocut ranub mirah  
Ngon srah babah po jroh rupa

Meuseuot sambot ban dua blah  
Putroe ceudah deungon banta  
Meudeh meunoe poh beurakah  
Ban dua blah sabé suka

Peugah haba seun sigeutu  
Tulak bau dendayang ba  
Peiduek leugat di keue teungku  
Teuma meusu putroe muda

Ngon jaroe jibeuot laju  
Cut meulu laju meuhaba  
Aneuk seureundet putoh taloe  
Han le jiwoe dalam ceuntra

Singet geupet basah jaroe  
Makeuen beutroe bu ngon sira  
Eungkot laot deungo gah  
Seulinjuek patah lam piala

Teungku makeuen peue na mudah  
Deelat syah bek le peue haba  
Meunan narit sinyak putroe  
Samlakoe neujawueub lanja

Kru seumangat wahe adoe  
Keupeue putroe panyang haba  
Mirahpati jidong dileuen.  
Cicem ujeuen po u para

Peurab keunoe hai cut buleuen  
Tamakeuen ngon lon beursama  
Po samlakoe meunan neukheun  
Tanglong mideuen meusuara

Taek u gle takoh dapon  
Uram keu rinyeun ujung keu bara  
Di lon deelat barlhueuh makeuen  
Jak nyoe siseuen kamoe dua

Neuseuot le banta seudang  
Haba wayang narit seunda  
Aneuk tiona cong geulumpong  
Cicem subang po lam hawa

Meuhan makeuen hai buleuen trang  
Pinah hidang kaman sigra  
Meunan narit banta seudang  
Peurab rijang putroe muda

Duek meusapat ureueng lhee droe  
Rot wie adoe rot uneuen a  
Nyang diteungoh po samlakoe  
Dua putroe sidroe raja

Makeuen sapat ureueng lhee droe  
Cut putroe deungon po banta  
Neupajoh bu sibuju jaro  
Nikmat ka troe troh u dada

Oh lheueh makeuen geusrah jaro  
Dayang peutoe pinah sigra  
Pajoh ranub teuma dudoe  
Meudeh meunoe peugah haba

Mangat ate po samlakoe  
Ka na putroe dua-dua  
Miseue ureueng teungoh grah that  
Troph bak teumpat mon nyang raya

Timapi na sinan teulhat  
Teuntee leugat ie geumita  
Meunan miseue wahe sahbat  
Teudong ibarat ureueng dua

Nyang buet laen han troh lon pham  
Wallah alam han troh juga  
Reudok timu ujeuen di barat  
Hana meuhat ube kada

Hingga malam jula leugat  
Ie meusapat dayang dum na  
Sebkeu dum nan nyang ibarat  
Lon riwayat banta muda

Habeh teungeut dum sinaroe  
Lam meuligoe sapa-sapa  
Hana jaga le meung sidroe  
Tinggai putroe deungon banta

Putroe Khantunpi ka jak eh  
Di cut puteh jaga dua  
Di seuramoe teudrek sideh  
Seun silapeh peugah haba

Ban dua droe ate gaseh  
Tan na eh laloe poh cakra  
Po banta kheun narit meuceh  
Ngo cut puteh saboh haba

Saboh mise jinoe lon kheun  
Wahe buleuen tapham le gata  
Meung jeuet gata nyak keu rimueng  
Lon bungo'g trueng kameng raya

Mangat jicok bah jibaplueng  
Nak jirayueng ho nyang suka  
Ban putroe ngo kheun samlakoe  
Seuot putroe dien peulita

Aneuk punggok tren u bumoe  
Cempala manoe dalam ceuntra  
Saboh sinan siploh sinoe  
Bak kamoe atueh jeumala

Lom putroe kheun meunoe phon-phon  
Neudeungo lon po meukuta  
Meunyo meunan teungku ampon  
Neutueng ulon po meukuta

Taek au gle koh beureuhoi  
Uram keu toi ujung keu bara  
Neumeung hajat cut Jamaloi  
Ka troh kaoi po meukuta

Bek le teungku ate syugoi  
Cut Jamaloi neuteumeung ba  
Bungong jeumpa sikarang lhee  
Bungong teubee jroh meugisa

Bah le lon kheun nyang meuteuntee  
Neujak lakee lon bak maha  
Meung na hajat bungong keumbee  
Bak peureudee neupeuteuka

Meung kon meunan hai pangulee  
Goh lom teuntee ulon neuba  
Akhe dudoe jeuet keu malee  
Oh ka meuthee peue lom guna

Meunan seumbah sinyak putroe  
Po samlakoe seuot sigra  
Pakri ulon wahe adoe  
Meung nanggroe lon tupat hana

Lon tupat han lon turi tan  
Toh pakri ban lon bicara  
Meunan sabda banta seudang  
Seuot rijang banta muda

Bek susah that po junjongan  
Tango kaman lon calitra  
Jinoe neujak u kayangan  
Lon tuan disinan maha

Putroe Ajut geurasi nan  
Nama gob nyan po meukuta  
Nyan bunda ayah lon tuan  
Seulayeue gob nyan laen hana

Nam reutoh thon umu sampoe  
Tuanku droe goh lom tuha  
Hikeumat le hana bagoe  
Nanggroe Bumboe gob nyan raja

Han soe lawan lam donya nyoe  
Maha lon nyoe utoh raya  
Han jan habeh kheun cut putroe  
Po samlakoe seuot sigra

Bah le lon jak bak peureudee  
Bungong keumbee lom meuhawa  
Meuhan geubri nyang lon lakee  
Geuplah uleepi lon rila

Han ulon tren dalam juree  
Meung goh teuntee geubri gata  
Ureueng dua teungoh meuproe  
Jaga putroe di astana

Kateukeujot sinyak putroe  
Jingo adoe mantong meucakra  
Jimarit le lam meuligoe  
Hai nyak putroe bek meujaga

Simalam beungoh ek tameupro  
Bit nyo putroe malee hana  
Meunyo meunan tapeugot droe  
Gata adoe han meuguna

Peue cit di gob hai sambinoe  
Tasiboe beungoh ngon sinja  
Bu beutaboh hidang tatob  
Beumeusambot deungon rupa

Watee geueh geukheun ugob  
Beudoh tapot nyak le gata  
Breueh beu puteh geupet tahei  
Oh tasanggoi beugot gura

Baranggasoe jimeukaoi  
Cut Jamaloi kon meung gata  
Oh geueh beugot tasatoh  
Geuuroh beurijang jaga

Meung na meunan hai putroe jroh  
Gata saboh that mulia  
Lheueh makeuen ranub seunuleueng  
Nyankeuh ureueng peuet peukara

Meung na meunan hai cut putroe  
Jeueh-jeueb nanggroe geujak mita  
Meung got fi-e deungen budoe  
Han peue adoe tapeutaba

Meunan jikheun Khatun putroe  
Jaweueb adoe narit cuda  
Jak u pasi tacok tirom  
Sideh tadom dalam bangka

Peue gundah goh nyang keumalon  
Peue na geuhon gata cuda  
Jeh di gle sala meuriti  
Di pasi aron meubanja

Dua kamoe nyang meucakri  
Peue paduli gata cuda  
Bukon sayang aneuk iboh  
Jeueb-jeueb lampoh beureugom ba

Kamoe dua peukab taroh  
Pakon kiroh gata cuda  
Dalam cintra aneuk bayeuen  
Jeh di leuen aneuk cempala

Jikalee jeuet bah le lon kheun  
Hai cut buleuen cahya mata  
Meunyo han jeuet bah lon iem droe  
Hai nyak putroe ban nyang suka

Han jeuet teugah gata adoe  
Ban nafsu droe takeurija  
Han jan habeh kheun cut putroe  
Seuot adoe laju sigra

Dalam paya timoh beuramoe  
Dalam anoe timoh drang jawa  
Han peue aja ngon peureunoe  
Adoeteu nyoe na sikula

Bek neugundah hai da putroe  
Ka seb raghoe adoe gata  
Meunan narit di po adoe  
Ka geuiem droe teuma po da

Di jih sabe lam jimuproe  
Sinyak putroe deungon banta  
Hingga faja beungoh uroe  
Lam meuligoe habeh jaga

Habeh jaga asoe meuligoe  
Seungab oh noe siat haba  
Teuduek siat dilee oh noe  
Laen bagoe lon calitra

Ayat laen lon boh jinoe  
Bek treb meunoe han le gura  
Nangroe Idi lada usoe  
Buket panjoe geuseumuga

Siat-siat ayat lon gantoe  
Mangat adoe oh tabaca  
Bukon sayang cicem beureugom  
Jikarom boh mirahpati

Amma Bakdu simalam dom  
Jak cok tirom bineh pasi  
Meuwoe kisah bungong teuprom  
Lon peugah lom cut juhari

Sajan cuda si nyak putroe  
Peuet ploh uroe sinan lawi  
Seureuta deungon po samlakoe  
Sinan laloe hana tom cre

Leumah pike bak siuroe  
Jikheundak woe putroe pari  
jipeugah le bak samlakoe  
Dum sinaroe ka jirawi

Deelat ampon tuanku droe  
Lon kujak woe idin neubri  
Hana treb lon dong di nanggroe  
Siploh uroe habeh lawi

Meunan seumah sinyak putroe  
Po samlakoe jawueb neubri  
Beukit po cut jadeh tawoe  
Lon hai putroe jinoe pakri

Pat takeubah ulon sidroe  
Gata tawoe cut puteh di  
Cut Jamaloi utoh raghoe  
Cut sambinoe akai takwi

Han jan habeh narit banta  
Putroe muda jijawueb le  
Pakon teungku putoh asa  
Ban nyang hawa lon peuhase

Bek tuanku mate duka  
Bak lon rila baranggari  
Ban neudeungo meunan haba  
Ate suka banta saidi

Lom putroe kheun teuma meunoe  
Ampon kamoe wahe Juli  
Meung troh ulon u nanggroe  
Lon bri sidroe keunoe Zanggi

Lon yue jak tueng deelat ampon  
Kareuna ulon habeh janji  
Ubak maha lon yue peutren  
Teungku ampon bek that ngeuri

Oh troh keudeh neulakee lon  
Bek neutren-tren meung han neubri  
Meunyo meunan cut meuabon  
Izin bak lon nyak puteh di

Beuta ingat keu lon tuan  
Beuta sayang lon hai nyak ti  
Meunan banta neupeugah trang  
Beudoh rijang cut puteh di

Jimeungui le putroe seudang  
Ngon dendayang biek jen pari  
Putroe sok bajee teureubang  
Dum sibarang cukop hase

Lakee idin lom bak po da  
Putroe muda meung keumbali  
Oh lheueh idin dum sigala  
Jitren sigra cut putroe ti

Leuen meuligoe sampoe datang  
Jiteureubang putroe siti  
Dalam hawa meuwoe ulang  
Ban seulayang taloe jibri

Saiful Muluk ate leukang  
Tahe mandang neungieng cut ti  
Teudong tahe mata mandang  
Neungieng bintang han le meuri

Tautap susah po samlakoe  
Si nyak putroe meuhei Zanggi  
Badi' Jamaloi ka troh jiwoe  
Bak teumpat droe nyak juhari

Jiek laju u meuligoe  
Si nyak putroe meuhei Zanggi  
Hai pahlawan tango kamoe  
Ulonteu nyoe na peue janji

U Hidustan tajak jinoe  
Bak uroe nyoe bek le lanti  
Tacok leugat insan sidroe  
Bak meuligoe meuceuradi

Hajat ulon tueng keu lakoe  
Insan sidroe that juhari  
Saiful Muluk nama meusoe  
That samlakoe hana sakri

U Bustarum taba leugat  
Bak teumpat bundanya abi  
Habeh wasiet jiamanat  
Beudoh leugat teuma Zanggi

Jipo tajam miseue kilat  
Troh le siat hana lawi  
Leuen meuligoe jitren leugat  
Bak teumpat banta juhari

Zanggi kalon po samlakoe  
Teuduek sidroe bak kurusi  
Bri mulia keu samlakoe  
Seumbah jaroe com di gaki

Zanggi peugah teuma dudoe  
Wasiet putroe ka jirawi  
Neuyue jak tueng tuanku droe  
Uleh putroe nyang juhari

Habeh dumpeue jihareutoe  
Po samlakoe mangat ate  
Teuma neukheun laju meunoe  
Nibak lon nyoe tan meuungki

Ban nyang hajat si nyak putroe  
Idin kamoe wahe Zanggi  
Meunan neukheun po samlakoe  
Zanggi jinoe jipeurab le

Jicok laju banta sidroe  
Jimat jinoe uleh Zanggi  
Jibapo le teuma dudoe  
Po samlakoe ate ngeuri

Jipo tajam hana bagoe  
Ka sampoe bak maha cut ti  
Jipeutren le po samlakoe  
Bak meuligoe Ajut pari

Oh troh keunan bak meuligoe  
Jikheun meunoe uleh Zanggi  
Nyankeuh raja tuanku droe  
Maha putroe nyang juhari

Yoh nyan banta neubet jaroe  
Ateueh putroe junjong neubri  
Dua lhee seun neubet jaroe  
Maha putroe tan paduli

Putroe Ajut lale keudroe  
Gob nyan laloe amai sakti  
Teuka susah po samlakoe  
Han ek pakoe maha cut ti

Teuma teuka ureueng sidroe  
Nan ka meusoe Podang Sari  
Surot gata hai samlakoe  
Bah lon pakoe nyan keulayi

Podang Sari teuma peutoe  
Ka jipakoe maha cut ti  
Podang Sari beuet jaroe  
Ampon kamoe di yub gaki

Cut Jamaloi neubri lakoe  
Bek meupaloe bintang pari  
Oh nan baro jihareutoe  
Maha putroe jiseuot le

Toh nyang galak cuco kamoe  
Lon bri jinoe hai dang Sari  
Ri nyang galak bak ate droe  
Nyankeuh lakoe keu jih lon bri

Meunan sabda maha putroe  
Neupeugah proe bak dang Sari  
Podang Sari seuot meunoe  
Ampon kamoe di yub gaki

Nyang na galak insan sidroe  
Hana bagoe that juhari  
Saiful Muluk nan samlakoe  
Meuse nanggroe teumpat abi

Geuboh gampong deungon nanggroe  
Seutot lumpoe peutang pagi  
Badi' Jamaloi nyang geulumpoe  
Jeueb-jeueb nanggroe geujak sudi

Putroe Khatun gob nyan peuwoe  
Yoh saboh roe ka jen taki  
Hikeumat le hana bagoe  
Po samlakoe le that sakti

Oh nan baro jihareutoe  
Maha putroe jawueub neubri  
Raja Meuse ho ka jinoe  
Kaba keunoe han lon turi

Lon keumeung eu po samlakoe  
Insan sidroe kadang pakri  
Meunan sabda maha putroe  
Beudoh le nyoe Podang Sari

Ka jiba le po samlakoe  
Ubak putroe maha cut ti  
Putroe Ajut eu samlakoe  
Rupa bagoe matahari

Banta muda laju peutoe  
Com bak jaroe maha cut ti  
Putroe Ajut kheun le meunoe  
Cuco kamoe jadeh lon bri

Jadeh lon bri meuh seuneupoh  
Nyang seumeuloh Jamaloi Sakti  
Bitpi meunan puteh leusoh  
Lon meutanggoh tiga hari

Muluk Cahya nanggroe jeuoh  
Nyankeuh tanggoh siat lawi  
Bek le susah bungong iboh  
Ulon peutroh ban nyang janji

Wahe cuco intan payong  
Jak lam keubon intan pari  
Sira cuco jak meuayon  
nyoe pat sabon jak meusuci

Neubeudoh le cut bintang lhon  
Leugat neutron ngon Dang Sari  
Neujak meuen dalam keubun  
Neumeung ayon ule ili

Neumeusya neumeu panton  
Tulak ayon le Dang Sari  
Teutap banta neumeuayon  
Laen dilon geumulai

Deungo beugot rakan kaom  
Laen suson ulon rawi  
Awe cot tapeugot kateng  
Awe lilen puta tali

Amma bakdu sinyak bahren  
Gob meukawen keu jih lakoe  
Ngo lon kisah jinoe laen  
Keu raja jen lon hareutoe

Jikeurajeuen laot Kalzum  
Nan Meureudum saboh nanggroe  
Raja Arza' nan sulotan  
Meugah han ban jih nyan sidroe

Hikeumat le ngon saktian  
Han ek lawan barangkasoe  
Saboh pahlawan nyang teuga that  
Ek jime brat siblah nanggroe

Arkas Janggi nan ka meuhat  
Ngon tungkat ube bak panjoe  
Di raja nyan jigaseh that  
Jibri rakyat nam ribee droe

Bak siuroe duek meusapat  
Musyawarat raja nanggroe  
Sidroe wazi peukek seumah  
Bak khalifah beuot jaroe

Ampon deelat sialam syah  
Nyoe lon peugah tuanku droe  
Aneuk deelat nyan ka mate  
Ka jipoh le insan sidroe

Bak geutapa didalam gle  
Sinan mate po samlakoe  
Meung mayet hana meuho le  
Jiboh bangke laen nanggroe

Han jan habeh wazi peugah  
That amarah raja pindoe  
Jiek seudong muka mirah  
Beungeh leupah hana bagoe

Raja beungeh kon bubarang  
Hai pahlawan sigra jinoe  
Sabda raja bak pahlawan  
Wahe rakan tango lon nyoe

Tajak mita sidroe insan  
Bak lon tuan peuwoe keunoe  
Pakon jipoh nyan aneuk kee  
Jiseumalee ulonteu nyoe

Kameng gasi aneuk asee  
Kumeulakee beuek jinoe  
Barangkaho tajak mita  
Jeuep-jeuep rimba jeuep-jeuep nanggroe

Oh meuteumeung keunoe taba  
Kumeung siksa aneuk bisoe  
Meunan titah nibak raja  
Beudoh sigra sidroe meuntroe

Arkas Zanggi beudoh lanja  
Seumah raja jipo jinoe  
Jipo tajam habeh kuat  
Jikarat ka cula caloe

U Seurunded jipeuteupat  
Jitakat ateueh meuligoe  
Oh troh keunan jibeurangkat  
Jiek leugat lam meuligoe

Si cut banta jijak sasat  
Tan jitupat po samlakoe  
Keudeh keunoe ka jilihat  
Hana dapat di meuligoe

Jiteubiet le sinan meuhat  
Jipo leugat laen nanggroe  
U Bustarom jibeurangkat  
Bak teumpat maha cut putroe

Dalam keubun jitron laju  
Jilalu ateueh meuligoe  
Saiful Muluk leumah jieu  
Bintang timu teungoh manoe

Saiful Muluk hana neneu  
Lalu teungku sinan manoe  
Jitron leugat Zanggi hantu  
Jidrob laju mat bak jaroe

Jibapo le ngon meu'u'u  
Ate ragu po samlakoe  
Neukeumeung kliek han teubiet su  
Bungong meulu ka meupaloe

Jipo tajam pahlawan jen  
Nanggroe laen ka troh sampie  
Laot Kalzum leugat jitron  
Puteh licen mat di jaroe

Po samlakoe ate ngeuren  
Neukalon jen peunoh nanggroe  
Jipeutamong dalam kuta  
Ubak raja jipeujaroe

Nyoekeu insan po meukuta  
Manusia ka lon puwoe  
Nyang poh aneuk po junjongan  
Si anu nyan tuanku droe

Ban jideungo haba meunan  
Banta yoh nyan jiboh taloe  
Ka jiikat banta seudang  
Sulotan jitanyong meunoe

Wahe raja rupa that jroh  
Pakon tapoh aneuk kamoe  
Peue na salah nyang jeuet tapoh  
Aneuk saboh di ulon nyoe

Peuekeu sabab kapoh mate  
Bek ka iem le peugah jinoe  
Meunan narit raja jahe  
Bungong pade jimeung seudoe

Samlakoe neupeukreueh ate  
Neuseuot le teuma meunoe  
Neupeugah le bintang canden  
Hai raja jen tango kamoe

Aneuk gata buet that lalem  
Nyawong kuplen aneuk bisoe  
Ho cit kuba jih han kupoh  
Tango beujroh lon hareutoe

Sabab jicok putroe Khatun  
Ka siploh thon tan jipuwoe  
Nyankeu punca jeuet beungeh lon  
Bak asai phon jicok putroe

Ube nyang na putroe ceudah  
Jijak rampah jeuep-jeuep nanggroe  
Dalam rimba jijak keubah  
Paleh leupah jih nyan sidroe

Nyang meunan buet han jeuet keubah  
Kuhampah beuteusuet gigoe  
Nyankeu sabab ka kupeugah  
Raya salah aneukteu nyoe

Kukoh takue aneuk kafe  
Pubuet lam gle jiba putroe  
Nyankeu sabab kupoh mate  
Akai jahe aneuk bisoe

Dalam laot jih kugule  
Kuboh bangke laen nanggroe  
Kuboh bijeh aneuk sihe  
Bek hudep le dalam nanggroe

Ban jideungo tuto seungkoe  
Saket ate raja pindoe  
Beungehji that hana sabe  
Jibeudoh le tajam han soe

Jitarek le peudeueng rijang  
Jikeumeung poh po samlakoe  
Jibeut peudeueng ka meulayang  
Tajo rijang mat bak jaroe

Piyoh dilee syahi alam  
Adat neucang han meugantoe  
Saba dilee po junjongan  
Sabab insan jeuoh nanggroe

Kareuna jih ureueng ladang  
Kadang-kadang pakri dudoe  
Jih ka geutueng po junjongan  
Le sulotan raja Bumboi

Meung ka neupoh jih neusimpan  
Meuhat jeuet prang uroe dudoe  
Nyankeu sabab lon kheun meunan  
Bek junjongan jeuet lom rugoe

Adat neupoh jih ube glang  
Po jeunulang aeb bunyoe  
Meuhat deelat inong geucang  
Meunan nyum sang pike lon nyoe

Ban raja ngo tuto bujang  
Teuka sayang keu samlakoe  
Jitiek peudeueng laju rijang  
Raja mandang tahe keudroe

Beureukat euncien bak Sulaiman  
Banta seudang han meupaloe  
Deungon tulong nibak Tuhan  
Nakeu jalan keu samlakoe

Hana jadeh jipoh yoh nyan  
Beureukat nyan euncien di jaroe  
Meunan teukeudi nibak Tuhan  
Banta seudang han meupaloe

Teuma marit raja suang  
Wahe bujang tango kamoe  
Manusia jak glap rijang  
Bek roh kucang aneuk bisoe

Jibeudoh le uleebalang  
Jiglap yoh nyan po samlakoe  
Jiboh lam glap banta seudang  
Ate girang wazi meuntroe

Uroe malam teutap sinan  
Ngon makanan hana sapeue  
Na treuk nyang bu meung iepi tan  
Bukon sayang cut samlakoe

Teutap lam glap banta seudang  
Uroe malam dawok neumoe  
Teutap banta lam dukaan  
Oh noe tamam lon hareutoe

Jiled nyang phon oh noe tamat  
Wahe sahabat piyoh haba  
Jiled duapi lon surat  
Saba siat dang lon rika

Meung na umu mantong hayat  
Lon surat beuhabeh haba  
Jiled dua gura ngon hibat  
Prang raya that hana tara

Padum raja nyang kuat-kuat  
Jimeung lipat banta muda  
Han ek talo Saiful Muluk  
Bungong tajok that bahgia

Dudoe teuma bandum jitakluk  
Droe jipeujok ubak banta  
Haba indah han peue tanyong  
That jitamong dalam dada

Ulah lagee karang bungong  
Agam inong galak suka  
Suara mangat lagee keunong  
Meudeungong ban gaseng jawa

Bak lon karang han that keunong  
Meudeungong bak ureueng baca  
Jeuetkeu dum nan ulon peugah  
Meung le leupah kureueng gura

Jiled dua jinoe lon peugah  
Insyah Allah jinoe lon rika  
Meung na umu Tuhan keubah  
Meung na Allah bri kuasa

Jiled keu dua lon seuleuah  
Piyoh payah sikutika  
Meudang hase lon seuleuah  
Haba indah hana tara

Lom muhon tulong nibak Allah  
Beukek sudah ulon rika  
Nyang na bacut rakan sahbat  
Lon seumurat han that lanja

Le nyang karot deungon sisat  
Harah le that dum meutuka  
Lon seumurat seun-seun bacut  
Hana that jeuet lon seedara

Harah kengkeueng banja han santeuet  
Lon adoe cut dungoe raya  
Beukit na karot bacut sapat  
Meuah sahbat kon lon saja

Han that kayem lon seumurat  
Le nyang silab ngon meutuka  
Jak u pasi pot beuramoe  
Tapuwoe pasoe lam raga

Soe nyang baca hikayat nyoe  
Keu kamoe peumeuah sigra  
Di ateueh gle cot Sikurah  
Kayee reubah dum meutimpa

Sebkeuh oh noe ulon peugah  
Tamat kisah han le haba

Tamat jiled keu sa

**Perpustakaan  
Jenderal**